

Vtilia admodum

AD PRÆDICAMENTA ARISTOTELIS scholia, à Ioanne Arboreo Laudunensi, ex eruditis authoribus selecta, & nuper commode locupletata.



PARISIIS

Apud Simonem Colinæum,

1538.

THE HISTORY OF THE

REIGN OF KING CHARLES THE FIRST

BY SAMUEL JOHNSON

IN TWO VOLUMES

LONDON: Printed by A. MILLAR, in Pall-mall.

1729.

THE HISTORY OF THE

REIGN OF KING CHARLES THE FIRST

BY SAMUEL JOHNSON

IN TWO VOLUMES

LONDON: Printed by A. MILLAR, in Pall-mall.

1729.

THE HISTORY OF THE

REIGN OF KING CHARLES THE FIRST

BY SAMUEL JOHNSON

IN TWO VOLUMES

LONDON: Printed by A. MILLAR, in Pall-mall.

1729.

THE HISTORY OF THE

REIGN OF KING CHARLES THE FIRST

AVNICO PHILOSOPHORVM

phœnici, viro sanctioribus sacri eloquij studijs additissimo Iacobo Fabro Stapulensi, Ioānes Arbo-
rens Landunas S.

Non me præterit quosdam sui nominis illustrandi cupidissimos, sua imperatoribus alijsq; summo in honoris fastigio enitentibus nuncupatim dicasse opera: vt fauorem, subsidium, & beneuolentiam plausibilis captarent, tutiusq; momori morsus & calumnias euitaturi, in publicum prodirent. Alios vero beneficiorum indispiscendorum siti laborantes, nihilo ab ijs, qui parasiticum munus assentationisq; palpatoria officia obeunt, discretos, opulentioribus auro & argento suffarcinatis suos labores nuncupasse: ceteros me Hercules honestis studijs destinatos viris sanèquam doctis (quos tanquam terrena numina certatim suspiciunt purioris literaturæ amantissimi) suas lucubrationes omnium puritatis & calculis approbatas, candido pectore condonasse: quorum vestigia & propensio rem in doctos animum sectatus, non potui sanè tibi inter quosque illustratissimos philosophorum principes vexillifero & antesignano, munusculum istud dicatim non offerre. Quandoquidem tanta tui semper apud me fuit obseruantia, tantusque tui nominis, non humani dixerim, sed diuini amor: vt sine vilissima ingratitudinis nota te præterire non possim. Verum enimvero tui mores specta-

5
tissimi, tuâque insignis veræ Philosophiæ doctrina, qua
cæteris palmam præripis, & diuina illa (vt nihil tuis
laudibus dignum omittam) sobria & modesta in sacris
literis excolendis eruditio, qua tuus animus à rerum
humanarum lætione emeritus, pascitur, delectatur,
fruitur, mentem impulerunt & acrius concitarunt: vt
pro fernetiore beneuolentia qua me prosequeris, gra-
tiam tibi deditissimus remetirer. Etenim est quid in te
præstantissimum, quod facit vt tua nunquã apud me
aliosque contra maleuolos conuiciatores & nasutulos,
tibi equissime patrocinales, frigescat memoria: puta
studium tersum, politum, emaculatum, & à nullis nisi
sciolis, ac monis inuisum: quo mediussidius misocalos,
philodicos, bonarumque disciplinarum cõtemptores suis
armis exarmaisti: eorumque sputa, viperinam linguam,
& conuicia infirmaisti: qui de asini umbra sese misere
afflictores tecum non auderent iusto philosophiæ sa-
cramento contendere. Sed lusciniæ nugis insidentes, &
stentorea, si dicam, voce obclamantes, malunt de fa-
bulamentis, offuciisque circulatorijs, & malarum disci-
plinarum calumnijs ad orcum Plutonis & fanum ten-
dentibus digladiari: quos satis comminiscor humanita-
tis studia contemptim, & superciliose parvipendentes
ὄνομα λυγρὰ appellandos. qui bellissimum natæ iner-
tiæ & insitiæ patrocinium, cum nullum verbum nisi
putidum auribus percipere possint, ad suauiloquen-
tiam obsurdescunt & hebescent. Verum, proh dolor,
verborum sordibus horridi, & à musis admodum alie-

ni, optima deterrimis, odorata infectis, scita absurdis
permiscentes, deuoratam ad Aristotelem explicandū
interpretationem reliquerunt. Tu vero Philosophiæ
locupletandæ bene natus, inter ceteros vnus & præ-
cipuus, mare concha concludens, non semel sed ad nau-
seam, si dixerim, Philosophum regustasti: & regusta-
tum laconico sermone, venusto tamen, & germana At-
ticorum elegantia explicatissimum reddidisti: & per-
domitis à te veluti ab Hercule Alexicaco sophophilo-
rum monstris, fecisti vt seriæ Aristotelis disciplinæ
iampridem apud barbaros ac analphabetos exulantes,
& ab amuso blattarum commercio depulsa, ad hæc fe-
licissima tempora redirent: & eam nec tamen pœniten-
dam desudasti operam, vt plurimos discipulos præ-
clara fama excellens, non modo in tuam sed & Ari-
stotelicam hæresim congregaueris: qui nunc possunt op-
timi præceptoris præsidio adiuti, euulsis herbis noxijs
segetem discernere à cespite. Est porro, vt nihil veri-
tati denegem, nihilque dictu dignum reticeam: aper-
tum satis argumentum, quo honestum animi officium
refundere, & me tibi deuinctissimum reddere debeam.
Cum ad bonam frugem, neglectis nebulonum somnijs,
dextro genio me recepissem: tuisque euoluendis operi-
bus, omnium sane Philosophantium vsui maxime ne-
cessarijs, animum sellularijs aliàs disciplinis institu-
tum duce mihi Ioue conuertissem, illisq; mira cum qua-
dam voluptate delinitum cupidius infixissem: cœpi al-
tiori mentis cogitatu, sagacioriq; rationis trutina per-

pendere, quid mihi commoditatis petricosi illi & duri
mirum in modum rudentium cardui, & insuaves illæ
urticæ sensui plurimum officientes attulerant. quod
cum ab ijs digressum faciens satis compertum habuis-
sem, ad amœnius & multo fœcundius pabulum flatus
alitis impulsu festinandum, cœpi primum tui campi
mira rerum varietate conspersi, & inter ceteros à stu-
diosis deligendi, flores decerpere: quos ubi selectim
decerpissem, alijs ab olfactu decidentibus, mihi sanè
voluptati fuit animum illis fragrantissima quæque re-
dolentibus perfundere. Demum ut logicæ disciplinæ
studiosissimis commodius consulerem, operæpretium
duxi nostras ad Prædicamenta Aristotelis annotatio-
nes, tua virgula censoria castigatas, in apertū efferre:
quas classicis philosophiæ authoribus acceptum refe-
rentes, quo tibi offeruntur animo suscipias velim.
Bene Vale.

Ex eloquentissimo sedis Placidæ musæo.

Vtilia admodum

AD PRAEDICAMENTA ARISTOTELIS scholia, à Ioanne Arboreo Laudunē, si ex eruditis authoribus selecta, & nuper cōmode locupletata.

¶ Præludium.



Laboratis ad Porphyrianā institutionem Scholijs, quæ viam parant faciliẽ ad prædicamenta Aristotelis dilucidius intelligenda, totū adaugēdis philosophiæ rationalis studijs animum intendētes, æquius q̃ fieri potuit ac commodius, auspicatos labores ad Aristotelis categorias facillimis Scholijs apertius explicandas cōuertimus: vt ad cælestem illam Metaphysicæ disciplinæ philosophiam anhelātibus, essemus præsidio: magnūmq̃ adferremus adiumentum. Vt autem commodior futura sit elucubratio, quæ ab eruditis authoribus elucubrata fuere, quibus ingenuus lector iuuetur, fiātque ad hæc intelligenda propensior, nostris annotatiunculis inferere contendemus. Sed priusquā ad anteprædicamenta nostrum flectamus sermonem, diligenter inspiciemus, de quibūsnam fecerit in hoc præclaro opere inscriptionem. An de vocis
a.iiij.

bus res ipsas significantibus , an vero de rebus , elementis seu sermonibus designatis. ¶ Cum eruditius Philosophi interpretibus fidem adhibendam esse nemo diffiteatur: ad Boëtium vnum præ cæteris interpretem diligentissimum accedentes, licebit asserere Aristotelem hanc de sermonibus seu vocibus rerum genera significantibus fecisse inscriptionem : & eo mouebimur argumēto, Philosophum non de rebus , sed sermonibus res significantibus speculari : Eorum quæ secundum nullam complexionem dicuntur , singulum aut substantiam significat, aut quantitatem, vt ait in hoc opere Philosophus. Quod si de rebus differere voluisset, non dixisset significat: cum res significantur & non significant. quare manifestum erit Aristotelem suam fecisse inscriptionem de sermonibus res ipsas significantibus . Tum etiam prædicamēta iuncta, faciunt affirmationem. Affirmatio vero non nisi in oratione locum habet, at oratio vocibus & non rebus cōpingitur : quare prædicamentorum opus præclarissimum , sermonibus & non rebus accommodabitur . Desinant igitur homululi & ineptissimi interpretes, verius bonarum literarum pestes nocentissimæ, de ipsis rebus in hoc instituto verbosius obstrepere. Nec ridicula & abiijcienda suarum realitatū (quas plus æquo disseminarunt) multitudine & confusione, lectorem obtundant. Sed sinant amputatis suorum monstrorum capitibus, & supercilijs demissis , bonas literas, verāq; Philosophiam optime indolis altricem, felicius suas alas extendere, & de portentis domitis triumphum agere. Deins

de omnis logica, syllogismorum ratione est constituta : syllogismi vero propositionibus : propositiones sermonibus & elementis res ipsas significantibus. igitur hoc opus cæteris viam parans felicissimam, vocibus & non rebus accommodabitur. ¶ Forte quis contendet: Aristoteles de ipsis rebus hoc in opere disputat : & res sermonibus sunt agglutinatae & coniunctæ. igitur res ab hac institutione non sunt reiiciendæ . ¶ Diluit objectionem Boëtius, dicens: quoniã res semper cum propria significatione cõiunctæ sunt: & quicquid in res venit , hoc idem in rerum vocabulis inuenitur, quare recte de vocabulis disputas, proprietatem significatium vocũ de ijs quæ significabatur, id est de rebus assumpsit. & necesse fuit quodam modo de rebus disputationem misceri: cum non aliter nisi ex rebus proprietates in sermonibus appareant. Solum igitur ostendit obiectio res ipsas sermonib⁹ iunctas, minus principaliter hic diuersari : sed cum omnis ars logica de oratione sit, in hoc opere principaliter Philosophus de vocibus disseruit . ¶ Adhuc pugnabit quispiam : Si Philosophus hæc cõnectat vocibus prædicamenta , non erit denegandum, nos posse de vocibus res ipsas significantibus acquirere scientiam. Sed probatur id fieri non posse: infinitorum nulla est scientia ac cognitio: sed infinite sunt voces res significantes : igitur nullam de vocibus possumus habere sciẽtiã. Minor probatur: res infinite sunt: infinitas autem esse voces, quæ significant ipsas res, esse necesse est : cum cuiq; rei sua vox respõdeat eam significans : igitur infinite sunt voces

res significantes. ¶ Vinceret obiectio, si Aristoteles hoc in opere de infinitis rerum significacionibus tractaret: sed decem solum prædicamenta constituens, voluit infinitam vocum significantium multitudinem, ad ipsa tanq̃ ad principia referri: verbi gratia, homo, animal, equus, asinus, lapis, lignum, stagnū, & alia huiusmodi quæ infinita sunt, ad substantiam referuntur: vbi vides perspicue significantia absolute & simpliciter substantiam, sub eodem degere principio & prædicamento. Rursus, linea, superficies, corpus, numerus, pedale, bipedale, quãtitatem designantia: ad prædicamentum quãtitatis reuocantur. Deinde album, nigrum, bonum, malum, & multo plura, genere qualitatis concluduntur, & ita de alijs vocibus aliorum prædicamentorum, rationibus & nominibus conclusis. Vastam igitur admodū & infinitam rerū diuersarum multitudinem, paucissimo decem prædicamentorum numero cōclūsit: ut quæ infinita & indeterminata ad scientiã descendere nō possent, decem generibus proprijs & finitis vocibus diffinita, sciētię cōprehensione continerentur. & nihil nobis suadet ratio nisi infinitam vocum multitudinem (quæ ratione mentis circundari non potest) non posse in sciētiã cadere, tamen decem elemētorum seu prædicamentorum, infinitam vocum multitudinem completentium, possumus acquirere sciētiã & cognitionē. Diuus Aug. philosophiæ peritissimus, vno opusculo ad has cōmentādas cathēgorias ca. 3. agit cum alijs quæstionem de quibūsnā magis Aristoteles voluerit inchoare tractatū, hanc non

deserit indiscussam quæstionem. Primo inquit de ijs quæ sunt, secundo de ijs quæ percipiuntur, tertio de ijs quæ dicuntur. Primo sunt res omnes, quas natura peperit: secundo percipiuntur ea, quorum imagines in animo videndo formam⁹ & recõdimus: tertio dicuntur illa quibus ea quæ sunt impressa animo efferuntur. Id namque quod quis concipit animo, lingua prosequente declarat. Sed ut Themistio nostræ ætatis erudito Philosopho placeat, de his Arist. tractare incipit, quæ percipiuntur, quæque ipse vocat Græco nomine *σημαινομένα*, siue *φαντασίαι*, id est imagines rerum insidentes animo. Hactenus August. ¶ Sciscitari poterit quispiam, cur de prædicamentis disserere contentus, ab æquivocis, vniuocis, & denominatiuis auspicatus est? ¶ Respõdebis, de aliqua re disputantes, solitos esse quibusdam uti prenotamentis: & ea præmittere, quibus positis, posset facilius de sequentibus haberi doctrina. Quare quicquid sibi visum est ad prædicamentorum intelligentiam conferre, prius quàm fertilissimum prædicamentorum campum ingrederetur, exposuit.

¶ De æquivocis, vniuocis, & denominatiuis scholia.



Vnde ab æquivocis exordiri voluerit Philosophus: quã de æquivocis descriptionem nobis reliquit, aperire licebit. *Æquivoca dicuntur, quorum nomen solum commune est: secundum nomen uero substantiæ ratio diuersa. ut animal & homo, & quod pictum est. horum enim solum nomen commune est: secundum nomen uero substantiæ ratio di-*

uersa. si enim quis assignet, quid sit eorū utrunq; quo animal est, propriam assignabit utriusq; rationem.

Antequā ad perfectam huius definitionis intelligentiam proficiscamur, adnotatu digna propalabimus. ¶ Duplex assignatur æquiucum: quoddam æquiucās, quoddā vero æquiucatum, si illorum verborum vsus permittatur. ¶ AEquiucum æquiucans, est dicibile vno nomine & diuersis rationibus plura significās. vt canis. Nam vno nomine canem domesticū, canem marinum, & canem cælestem significat, diuersæ tamen rationes seu notiones illis significatis respondent. Nam ijs tribus propositionibus, & earum prædicatis diuersę notiones respōdent, canis domesticus est canis, canis marinus est canis, canis cælestis est canis. Similiter homo quatenus significat hominem viuū & pictū, est æquiucum æquiucans. Nam eadem dictio illa duo significata designat: licet illi diuersę notiones accommodētur. Nam homo alia notione & ratione, accipitur pro homine viuō, & alia pro homine picto. Diuus Aug. tomo 4. lib. 2. quæstionum ad Simplicianū dicit, Nemo dubitet vocare hominē pictū hominem, quandoquidem & singulorum quorūq; picturam cum aspiciamus, propria quæque nomina incunctanter adhibemus, velut cū intuentes tabulam aut parietem dicimus, ille Cicero est, ille Sallustius, ille Achilles, ille Hector. ¶ AEquiucū æquiucatum, est dicibile æquiuci æquiucantis significationem explicans: vt canis domesticus. Est enim dicibile (cum loco incomplexi sumatur) huius æquiucātis canis, significationem

ei respondentem explicans, & de illo æquiūocato æquiūocans prædicatur essentialiter. Nā hæc prædicatio est essentialis, canis domesticus est canis: vt illa saltē essentialis dicatur, in qua superius de inferiori prædicatur. Scio latere in prædicato variam significationē, neq; ansam arripias vt confestim tibi persuadeas illam prædicationem esse alicuius prædicabilis prædicationē, euariat enim homonymum prædicatum ab accōmoda prædicandi ratione. Nec me subsannes, nam nō desunt qui ita loquuntur. Et hæc tria æquiūocata, canis domesticus, canis marinus, canis cælestis, totam huius æquiūocantis canis, naturam explicant. ¶ Nonnulli tamen propius accedētes ad Aristotelem, dicunt æquiūoca æquiūocata rebus, & non vocibus accōmodari: vt hominē viuū & hominem pictū, dicimus æquiūoca hominis. huic arripit opinioni Boëtius dicens, æquiūoca res esse: æquiūocationē vero vocabulū. Quod ab alijs dicitur æquiūocum æquiūocans, à Boëtio dicitur æquiūocatio. Et intellectus æquiūocationis, teste Simplicio, ipsis æquiūocatis est prior, nam ab illa fluunt æquiūocata. ¶ Hac adaperita annotatione, quidnam sibi cōmodi referat æquiūocorum definitio, licet ostēdere. Aequiūoca æquiūocata, sunt quædā dicibilia, quæ habent nomen æquiūoci æquiūocantis cōmune, quod de illis prædicatur substantialiter essentialitēq; diuersis cōceptibus & significationibus: vt homo viuus. & homo pictus, sunt hominis dicibilia: de quibus illud nomē cōmune prædicatur essentialiter diuersis rationibus. Non putes nomen cōmune hoc in loco solū

sumi pro termino cōmuni qui nomīnis inflexio-
nem recipit: sed pro dictione eadem sumitur. Est
enim Socrates, æquiucatio Socrati viuo & pi-
cto: & tamen non est terminus cōmunis, sed est
eadem dictio illis æquiucatis, accōmodata: quæ
secundū diuerfas notiones & rationes, modo ad
Socratē viuum, modo ad Socratē pictum defle-
ctitur: hanc interpretationem multi approbant.
Quoniam de æquiucis, æquiucatis, & æquiuo-
cantibus, in nostris terminorum formulis disse-
ruimus, de illis nunc subtricebo. ¶ Volens Boëtius
illam æquiucorū definitionē explicare, hoc vti-
tur prænotamento: Omnis res, aut nomine, aut
diffinitione mōstratur: namq; subiectam rem aut
proprio nomine vocamus, aut diffinitione quid
sit ostendimus. vt verbi gratia, quandam substan-
tiam vocamus hominis nomine, & eiusdem defi-
nitionem damus: dicentes hominē esse animal ra-
tionale mortale: ergo quoniā omnis res, aut de-
finitione, aut nomine declaratur: ex his duobus,
nomine scilicet & definitione, diuersitates qua-
tuor creantur. ¶ Omnes namq; res, aut eodē no-
mine, & eadem definitione iunguntur, vt homo
& animal. vtraq; enim animalia dici possunt, &
vtraq; vna definitione iungūtur. est nāq; animal,
substantia animata sensibilis: & homo rursus, sub-
stantia animata sensibilis: & hæc vocantur vni-
uoca, & græcè synonyma. ¶ Alia vero quæ neq;
nominibus, neque definitionibus coniunguntur:
vt ignis, lapis, color: & hæc vocantur diuersiuoca,
græcè heteronyma. ¶ Alia vero quæ diuersis no-
minibus nuncupantur, & vni definitioni, designa-

tionisque subduntur: vt gladius, ensis. Nam diuersa cum sint nomina, eandem rem designant: & hæc latinè dicuntur multiuoca, græcè vero polyonyma. ¶ Alia nomine congruunt, sed definitionibus discrepant: vt est homo verus, homo pius. nam vtrunq; vel animalia vel homines nuncupantur: si vero quis velit hominem, picturamq; definire, diuersas vtriusque definitiones coaptabit, & hæc vocantur æquiuoca, & græcè homonyma. Aequiuoca igitur ex Aristotele dicuntur res æquiuocæ, idem commune nomen accipientes, sed rationem & interpretationem diuersam. ¶ Nec arbitrandū est in solo nomine fieri æquiuocationē, sed etiā in verbis, cū dicim⁹ cōplector te, & cōplector à te: eodē verbo deprehēditur alia ratio faciēdi, & alia patiēdi. In præpositiōib⁹ quoq; & cōiūctionib⁹ frequēter æquiuocatio reperitur. ¶ Adnotant Boëtius & Simplicius cōmune multis dici modis. Dicitur commune, quod in partes diuiditur: vt terra sorte habitata. Dicitur cōmune, quod in partes non diuiditur, sed vicissim in vsus habentium transit: vt seruus communis, vel equus. Dicitur etiā cōmune, quod vtēdo, cuiusq; sit propriū, post vsū vero in cōmune remittitur: vt est theatrum. nam cum eo vtor, meū est: cum inde discedo, in cōmune remisi. Dicitur quoq; cōmune, quod ipsum quidem nullis diuisum partibus, totum vno tempore in singulos venit: vt vox vel sermo, ad multorū aures vno eodēmq; tempore totus atq; integer peruenit. Secundū hanc cōmunis significationē, innuit Philosophus æquiuocis rebus, cōmune esse vocabulū. nam anima

lis vocabulum, homini viuo & hominī picto est cōmune: sed secūdum illud nomen, ratio substantiæ est diuersa. Nam vt ait Aug, in hoc opere: Cum dixeris verū hominem animal esse quod risum capiat, & vim rationis admittat: cū de picto idem non possis dicere, necessario inueniuntur esse disparia. ¶ Ne plus æquo reddat obscurum lectorē rationis significatio, cōsiderabimus rationem multimode dici. Est enim ratio animæ, quā vocant nonnulli rectum animæ iudiciū, est & ratio cōputandi. Deinde ratio naturæ ipsa similitudo nascētū. postrema est ratio huic accōmodata proposito, quæ in definitionibus vel descriptionibus redditur, & nonnunq̃ pro ipsa definitione seu descriptione, & interdum pro nomine sumitur. Cum dixit Philosophus secūdū nomen cōmune, rationem substantiæ esse diuersam: & diffinitionis & descriptionis nomen; vt dicit Boëtius, inclusit. Dicit Faber rationem substantiæ secūdum cōmune nomen aliquibus esse diuersam, quando diuersis rationibus de illis substantialiter essentialiterq; dicitur. ¶ Contēderet quispiam in Aristotelem, si æquiuoca quæ dicuntur æquiuocata: æquiocationib⁹ seu æquiocis æquiucantibus designentur, & quibus auulsis id appellationis retinere non possent, cur Philosophus subticuit æquiuoca æquiucantia, aut ea in apertum non extulerit. ¶ Non oportuit Aristotelem æquiuocum æquiucans diffinisse: nam æquiucatis quæ diffinita sunt, relatiua dicuntur: cū non sit quidpiam æquiuocū æquiucans, nisi ad æquiucata: nec æquiucatum, nisi respectu æquiuo-

cantis: modo cognito vno relatiuorum, facile & alterum dignoscimus. Ideo authores solū alterū relatiuorū, vt plærunq; definire solent: quare nō oportuit Aristotelem diffinisse æquiuationem seu æquiucū æquiucans, sed æquiucatum pro his quæ ipsis æquiucātibus significātur: & vno, alterum cognoscitur. ¶ Cum æquiuoca sint casu vel ex hominum voluntate, adnotandum erit æquiucorum duas esse partes. aut enim, vt dicit diuus Augustinus, fortuitu fiunt, aut voluntate, seu consilio, vt dicit Boëtius. Fortuitu fiunt, cum quodam casu simile quis alteri nomen accipit: vt Alexander Priami filius, & Alexander Magnus. casus enim id egit, vt idē vtriq; nomē poneretur. Voluntate, cum similitudo nominis ex industria imponentis affigitur. ¶ Horum alia sunt secundū similitudinē: vt homo pictus, & homo verus: quo nunc vtitur Aristoteles exemplo. Alia secundum proportionem: vt principium. nanq; principium est in numero vnitas: in lineis punctus. & hæc æquiucatio secundum proportionem esse dicitur. Alia vero sunt, quæ ab vno descendunt: vt medicinale ferramentum, medicinale pigmentum: ab vna enim medicina æquiucatio ista descendit. Alia, quæ ad vnum referuntur: vt si quis dicat salutaris vectatio est, salutaris esca est, hæc idcirco sunt æquiuoca: quòd ad salutis vnū vocabulum, alia tamen & alia ratione referuntur.

¶ Vniuoca dicuntur quorum nomen commune est: & secundum nomen eadem substantiæ ratio, ut animal & homo atq; bos, communi enim nomine horum utrunq; animal nuncupatur, & est substantiæ ratio eadem. si

quis enim assignet utriusq; rationem, quid utrumque est quo animal est, eandem assignabit rationem. Cum de vniuocis vniuocatis loquat Philosophus, adnotabimus quæ nã sint vniuoca vniuocata, & quæ nam vniuoca vniuocantia. Vniuocantia, sunt dicibilia, quæ de pluribus eodẽ nomine & eadẽ ratione prædicantur, vt homo & animal, cū de istis subiectis Socrates, Plato, vniuoce prædicantur: nã illis cõpetunt, & nomine & ratione: cū hominis aut animalis diffinitio, illis æque congruat. Vniuocata, sunt dicibilia, de quibus idẽ nomen essentialiter & eadem ratione prædicatur. Non putes essentialiter hoc in loco nobis indicare prædicationem essentialem vniuocantis ad suum vniuocatum. Nam album est vniuocũ vniuocãs Sorti, Platoni, si fuerint albi. de quibus tamen nõ prædicatur essentialiter. Sed essẽtialiter designat rationem seu conceptũ. Sensus istius ppositionis, homo de suis vniuocatis prædicatur essentialiter, est iste, homo de suis vniuocatis prædicatur secundũ significationẽ essentialẽ & eundẽ conceptũ. Definuntur vniuoca vniuocata, vt nõnullis placet, pro dicibilibus, de quibus idem dicibile prædicatur secundũ idem nomen & eandẽ rationẽ essentialẽ: hoc est eandẽ significationẽ & conceptũ: vt animal vniuoce dicit̃ de his vniuocatis, homo, equus, vno nomine, cū homo sit animal, & equus est animal, & secundum eãdem rationẽ. nam de illis prædicatur secundum eandem diffinitionem essentialẽ. Nam quærenti quare homo est animal: apta dabitur responsio, quia est substãtia animata sensibilibis. Et si quis quærat, quare equus est

animal, similiter respondebitur, quia est substantia animata sensibilis. Sed illa diffinitio essentialis congruere non potest homini viuo & picto: bene quidem primo, sed non secundo. Nam si quis percontetur, quare homo pictus est animal, respondendum est, quia est pictura, animalis similitudinem referens. quare dicendum erit animal esse æquiuocum æquiuocās homini viuo, & picto, & idipsum esse vniuocum vniuocans omnibus his quibus sua diffinitio essentialis competit, nec illa membra diuersa ratione repugnant. Alij referunt vniuoca ad res ipsas quibus vniuocationis nomen, & ratio eadē aptatur: illa autem vniuoca dicuntur, id est, significātur per vniuocationem, nomine & ratione illis cōmunem: hæc autē vniuoca synonyma dicuntur, quæ & nomine & suā interpretatione iungūtur. & cōuenientius Arist. teste Simplicio, vniuoca, synonyma vocauit (quæ cum nomine, etiā diffinitionem habent eandem) quā Stoici, qui multa simul habēt nomina: vt Paris & Alexander idem. Boëtius sua insigni doctrina, & laudanda diligentia ad Aristotelem proximè accedens, cur hæc vel illa posuerit exempla in suis cōmētarijs non subtrahit. Vniuoca dicit esse genera cū speciebus: & species, speciebus: genera speciebus: vt animal, homo. Nā cū sit hominis, animal genus: dicitur homo animal. ergo & animal & homo animalia nuncupantur. Secundum igitur commune nomen si vtrunque diffinias, dicis animal esse substantiam animatam sensibilem, hominem quoque secundum id quod animal est, si substantiam animatam sensibilem

dixeris : nihil in eo falsitatis inuenies . ¶ Species vero speciebus vniuocæ sunt, quæ vno & eodem genere continentur: vt homo, equus, atq; bos, his cõmune genus est animal, & cõmuni nomine animalia nominantur: ergo secundũ nomen vnum quod illiscõmune est, animalis, vna illis ratio diffinitionis aptabitur: cuncta enim sunt substantiæ animalatq; sēsibiles. Secũdũ igitur posteriorem vniuocationis designationẽ Arist. (qua species speciebus vniuocę sunt: vt homo & equus atq; bos, quæ sub eodẽ genere sunt) sumpsit exemplũ: hæc ille. ¶ Obijcies, probando hominẽ & equũ nõ esse animalis vniuoca: Quãuis homo & equus eodem animalis nomine nũcupentur: tamen habēt diuersas diffinitiones, igitur nõ sunt animalis vniuoca, sed potius equiuoca. antecedens probatur: hominis diffinitio, est animal rationale mortale, equi vero, animal irrationale hinnibile: igitur. ¶ Dilutio obiectionis. ingenue probat ratio adducta, hominem & equũ esse equiuoca, cum secundum nomen generis minimẽ sũt definita: sed secundum particularem speciei definitionẽ. Sunt tamẽ vniuoca, cum animalis definitio illis accõmodatur. Nec putes incõmodum, vt aliquoties ex vniuocis fiant equiuoca, & ex equiuocis vniuoca.

¶ Denominatiua dicuntur quæcunque ab aliquo, solo differentia casu, secundum nomen habent appellationẽ: ut à grammatica grāmaticus: & à fortitudine fortis. Ne quid te lateat an denominatiua nomine tantum, an re tãtum, an vero nomine & re simul definiat, cognoscere oportebit denominatiuorũ varietatem. ¶ Denominatiua nomine tantum, sunt

quæ ab aliquo solo casu differentia sunt: sed secundum illud nomen, non habent appellationem, id est, non designant denominatiuè id pro quo denominantia supponunt, ut pater paternitas, dominus dominatio, quæ idē significant in cōcreto & abstracto. nam quicquid est pater, est paternitas, & ediuerso. ¶ Denominatiua re tantū, sunt quæ non ab aliquo solo casu differentia sunt: attamen secundū nomen denominantis, habēt appellationem: ut studiosus & virtus. non enim conueniunt in exordio, & differunt in fine, & studiosus designat id pro quo supponit virtus. Nam designat, ex Aristotele in suis moralibus, virtutē & probitatem, pro qua supponit hæc vox virtus: nec ista, nec prima ab Aristotele discutuntur. ¶ Denominatiua nomine & re simul, aliter voce & significatione, hoc in loco definita, sunt quæ conueniunt in principio cū denominātibus, & differunt in fine: & denominatiuè illud denotant seu appellāt, pro quo eorū denominantia supponunt: ut grāmaticus & grāmatica. Nam cōueniunt in principio, litteris & syllabis, & differunt in fine. & denominatiuū, videlicet grāmaticus, designat illud pro quo supponit denominans seu abstractū, scilicet grāmatica: similiter fortis & fortitudo sunt denominatiua simpliciter, hoc est nomine & re simul. Nā solo casu differunt, id est, cōueniunt in principio, & differunt in fine, & secundū illud nomen, habēt appellationem: quia fortis appellat illud, pro quo supponit fortitudo. Casus designat finalem cadentiam & terminationem dictionum. ¶ Habent secundum nomen appellationem, quando id appel-

b. iij.

lant, pro quo alterū accipi natum est, & vnū dicit Philosophus ab altero, vt supprincipale à principali deriuari, vt frequenter adiectiuum à substantiuo. Idcirco denominās, vt fortitudo principaliter significabit fortitudinem, alterum vero deductitiè & deriuatè. Illa tamen (vt dicit Faber) vtriusq; significatio, præcipua dici potest. ¶ Significatio autem præcipua ea sola est, qua prædicabilis, & dictionum prædicamentaliū ratio consideratur: vt album significatione albedinis, ingreditur prædicamentum qualitatis: & vere est qualitas, & quā accipiatur pro substantia, tamen ab illa acceptione, neq; prædicabile dicitur, neq; prædicamenti rationem sibi vendicat. ¶ Dicunt intellectum nō recipere denominatiū voce tantum seu nomine: nam in intellectu nullæ sunt determinationes, nec illę proprietates cōueniunt terminis ratione significationis, sed terminationis. Quare denominatiū seu concretū habet in mente quandā imaginem seu notionē à concretis discretā ei respōdentē. ¶ Exponens Boëtius denominatiua, dicit casus ab antiquis nominari aliquas nominū trāffigurationes: vt est à iustitia iustus, à fortitudine fortis. Et quotiescūq; aliqua res alia participat: ipsa participatione, sicut rem, ita quoq; nomen adipiscitur: vt quidam homo, quia iustitia participat: & rem quoq; inde trahit, & nomen: dicitur enim iustus. ergo denominatiua vocantur, quæcunq; à principali nomine, solo casu, id est, sola transfiguratione, discrepant. Nam cum sit nomen principale iustitia, ab hoc transfiguratum nomen iustus efficitur: ergo illa

sunt denominatiua, quæcunque à principali nomine, solo casu, id est, sola transfiguratione nominis discrepantia, secundum principale nomen, habent appellationem. ¶ Tria autem sunt necessaria, ut denominatiua constituentur: prius, ut re participant, post nomine, postremo, ut sit quædam nominis transfiguratio: ut cum aliquis dicitur à fortitudine fortis, est quædam fortitudo, qua fortis ille participat: habet etiam nominis participationem, fortis enim dicitur: ac vero est quædam transfiguratio, fortis enim & fortitudo non eisdem syllabis terminantur: hæc ille. ¶ Denominatiua, græcè dicuntur paronyma: quæ sunt in homonymorum & synonymorum medio constituta, ut dicit diuus Augustinus. libro 1. in 10. categorias cap. 4. & quæ nec paronyma dici possunt, nisi in se habuerint utrorumque contractum, id est nisi & nomen homonymorum & negotium synonymorum videatur habere commune: ut à sapientia sapientem, vel medicum à medicina dicamus: eadem in medico quæ in medicina, & actus similitudo videtur & nominis. Propterea rectè paronymum dictum est, quodd aliunde nomen acceperit: hæc ille. ¶ Præludia Aristotelis ad prædicamentorum intelligentiam, vocant antepredicamenta: quia viam struunt & præparamenta ad categorias multo facilius dignoscendas, & tria assignantur vniuersalia, scilicet diffinitio, diuisio, & regula. Septem vero specialia, scilicet tres diffinitiones, æquiucorum, vniuocorum, denominatiuorum, sub primo cõmuniori contentæ. Duæ

b. iij.

diuisiones sub secundo contentę, duę regulę ad
tertiũ vniuersale anteprædicamentum reductę.

De duplici Anteprædicamentorum diuisione,
Scholia.



Voniam de simplicibus dictionibus
in hoc opere habetur cōsideratio, &
de his Philosophus differere volue-
rit: nũc dissectionem eorum consti-
tuit, quę dicũtur in ea, secundũ cō-
plexionem & incōplexionem. A complexis absti-
nens, quę in libris Peri hermenias edocentur. So-
lum incomplexa prædicamentis (vt paulopost
edocebit) accommodata, prosequetur.

¶ *Prima diuisio anteprædicamentorũ. Eorũ quę dicũ-
tur, alia quidẽ secundũ cōplexionẽ dicũtur, alia uero si-
ne cōplexione. Et ea quę secundũ cōplexionẽ dicũtur,
sunt, ut homo currit, homo uincit. Ea uero quę sine cō-
plexione dicuntur, sunt, ut homo, bos, currit, uincit.*

¶ Quoniam de primis nominibus prima rerũ ge-
nera significãtibus, diuisio facienda est, nõ nomi-
ne, sed genere discrepãtibus, nunc ostẽdit quid si-
ne cōplexiõẽ sit cuiuslibet vocabuli facta platio.

¶ Sine complexione dicuntur voces & dictiones
simplices, vt homo, currit, vincit, & quęcunq; se-
cundũ sonum nominis profèruntur. si Aristote-
lis exemplis subscribere liceat, dicendũ est, verba
adiiectiua esse incōplexa, nec eorum, qui id dene-
gant, recipiendi sunt cauilli, & quę sine cōplexio-
ne dicuntur in prædicamentis locum habent.

¶ Secundũ cōplexionem dicuntur orationes, ser-
mones complexi, vt homo currit, homo vincit,
& quęcunq; (vt dicit Boëtius) aliqua cōiunctione

copulatur, vt Socrates aut Plato, vel quæcūq; secundum aliquod accidens coniunguntur. Nam quia, verbi gratia, in Socratē venit ambulatio, dicimus, Socrates ambulat: & est prolatio ista secundum cōplexionem. Idcirco quia cum dico Socrates ambulat, Socratē sum cū ambulatione cōplexus. Quod autem ait, Eorum quæ dicuntur, nihil aliud demonstrare vult, nisi se de primis rerū vocabulis, huius libelli disposuisse tractatum. Rerū enim vocabula, sunt quæ dicuntur, ipsa enim propria nominamus, hæc ille. ¶ *Eorum quæ sunt, alia de subiecto aliquo dicuntur, in subiecto uero nullo sunt: ut homo de subiecto quidem dicitur quodā homine, in subiecto uero nullo est. Alia autē in subiecto quidem sunt, de subiecto autem nullo dicuntur. in subiecto uero esse dico, quod cū in aliquo sit, non sicut quædam pars impossibile est esse sine eo in quo est, ut quædam grāmatica in subiecto quidē est in anima, de subiecto uero nullo dicitur, & hoc albū in subiecto quidem est corpore. omnis enim color in corpore est. Alia uero de subiecto dicuntur, & in subiecto sunt. ut sciētia in subiecto quidē est in anima: de subiecto uero dicitur, ut de grāmatica. Alia uero neq; in subiecto sunt: neq; de subiecto aliquo dicuntur, ut quidā homo, & quidam equus. Nihil enim talium neq; in subiecto est neq; de subiecto aliquo dicitur. simpliciter autē quæ sunt indiuidua, & numero singularia, de subiecto nullo dicuntur: in subiecto autem nihil aliqua prohibet esse. Quædam enim grāmatica in subiecto est, at de subiecto nullo dicitur. hæc Aristoteles.* ¶ Hæc dissecat diuisionem in quatuor mēbra, quibus omniū prædicamentorū dicibilia, paucis perstringēdo, com-

plectitur . Primum membrum competit voci-
 bus prædicamenti substantiæ: non omnibus, sed
 solum cõmunibus . Genera enim, species, & dif-
 ferentiæ substantiæ, (non autē indiuidua) dicun-
 tur de subiecto, in subiecto vero nullo sunt. ¶ Est
 autem dici de subiecto, superius prædicari de suo
 inferiori : quod satis demonstrat Aristoteles, di-
 cens hominem de subiecto dici quodā homine,
 hoc est, ista vox homo, prædicatur de Socrate,
 aut de Platone, aut de aliquo alio particulari
 homine. ¶ Sed diceret quispiam, rationale (v̄t cõ-
 uertitur homini) dicitur de hoc subiecto homo,
 similiter de animali subiecto dicitur sensibile, &
 tamē rationale nō est superius homine, nec sen-
 sibile animali, igitur. ¶ Hæc obiectio non aduer-
 satur diffinitioni, nec Aristoteli . Quāuis illa de-
 finitio à plerisque non recipiatur, asserētibus di-
 ci de subiecto, esse prædicari substantialiter vel
 essentialiter. Si Porphyrio accedas, non dices ra-
 tionale conuerti homini, quare talis differentia
 prædicaretur de suo inferiori. Si vero consentias
 (v̄t docti asseuerāt) rationale cõuerti homini, di-
 ces rationale de particulari subiecto quodam ho-
 mine dici, v̄t de Socrate aut Platone, quod innuit
 Aristoteles de substātia dicēs: *Omnia alia à primis
 substantijs uel dicuntur de eis, uel in eis sunt* . Cū igitur
 sit aliud à primis substantijs dicetur de eis,
 cum in ipsis non sit . ¶ Esse in subiecto, v̄t rebus
 accommodatur, est accidens cuiuspiam subiecto
 accidere, seu (v̄t dicitur) inhærere . v̄t albedo
 parieti inest, ipsum parietem denominans album.
 & id intelligēdum est, de esse in subiecto secun-

dum accidens : anima enim est in subiecto , vt pars in toto , & tamen non est accidens illi adiunctum : sed non est in subiecto secundum accidens . hoc modo omnis forma rei accidentaria , quæ non est vox , est in subiecto secundum accidens . ¶ Esse in subiecto secundum accidens logice , vt hoc in loco sumitur : est prædicari accidentaliter . vt album est in subiecto corpore . Nam de ista voce corpus , prædicatur accidentaliter . ¶ Secundum membrum huic enuntiationi respondet , alia sunt in subiecto , & de nullo subiecto dicuntur : & eo continentur indiuidua nouem prædicamentorum accidentium : vt hoc quantum , hoc album , quæ de nullo subiecto dicuntur : cum non prædicentur de aliquo , vt superius de inferiori : tamen sunt in subiecto , quia prædicantur accidentaliter . vt hæc prædicatio est accidentaria , Socrates est hoc quantum , Plato est hoc album . ¶ Tertium membrum parti tertiæ diuisionis respondens , complectitur vniuersalia accidentia nouem prædicamentorum accidentium : nam dicuntur de aliquo subiecto vt superius de inferiori : vt scientia dicitur de isto subiecto grammatica , & respectu alterius vocis : & talia sunt in subiecto , cum prædicentur accidentaliter , vt scientia est in subiecto scilicet in anima . ¶ Nec putes incommodum esse , eandem vocem dici de subiecto , & esse in subiecto , facta ad plures terminos consideratione : vt coloratum dicitur de hoc subiecto album , & est in homine subiecto : cum hæc sit prædicatio accidentaria , homo est albus . Quare nec

ganda erit hæc consequentia, ista vox dicitur de subiecto, ergo non est in subiecto: sed concludendum est, non est in subiecto illius de quo dicitur, vt de subiecto. ¶ Quartum mēbrum quartæ particulæ diuisionis respōdens, cōplectitur substantias particulares, seu indiuidua prædicamēti substantiæ: quæ nec dicuntur de subiecto, cum non prædicentur de aliquo vt superius de inferiori: nec sunt in subiecto, cum non possint constituere propriam prædicationem accidentariam. Dicit Boëtius Aristotelem hac angustissima diuisione sermonum omnium multitudinem collegisse. Nam quòd rerū vocabula in decem prædicamēta distribuat, hac diuisione maior non potest inueniri: nihil enim esse potest quod huic diuisioni vndecimum adijci possit: ita ex his quatuor nihil deminuat nec minor vlla diuisio his quatuor fieri potest: nec maior, quàm si denario limite prædicamenta claudātur. Cur autem in his quatuor, diuisio facta sit, lucide exponit. Prima quidem rerum est omnium diuisio, in substantiam atq; accidens. Sed quoniam substantia proferri non potest, nisi aut vniuersalis aut particularis intelligatur. Nam cum dico, homo, rem dixi vniuersalem. quòd illud nomen de pluribus natum est prædicari. cum vero dico, Socrates aut Plato, rem percipio particulare. Et accidens quoq; eodem modo. Nam cum dico scientiam, rem intelligo vniuersalem. quoniam scientia de pluribus, scilicet Grammatica, Logica, Rhetorica, nata est prædicari. Si vero protulerim Platonis sciētiam (quoniam omne accidens quod in indiuidua venit, indi-

uiduum fit) particularem intelligo sciētiam, quæ Platonī inest & non alteri. Quoniam igitur neq; substantia neq; accidēs proferri potest, nisi vniuersalitatis vim obtineat aut particularitatis : recte in quatuor diuisio facta est, vt sit omnis res aut substantia, aut accidens, & horū aut vniuersalis, aut particularis . Ex his igitur quatuor fient & quatuor cōplexiones . Nam cū vniuersalitas substantiæ copulabitur , fiet substantia vniuersalis: vt homo, animal, quæ de pluribus substantialiter nata est prædicari . Si vero vniuersalitas venerit in accidens, fiet accidens vniuersale , vt scientia, coloratum, album. Si particularitas quæ de vno solum nata est prædicari, adiicietur substantiæ: fiet substantia particularis, vt Socrates, iste homo. Si vero particularitas adhæreat accidenti: fiet accidens particulare, vt scientia Platonis, similiter hoc album. Noscito ingenue lector illis quatuor, totā prædicamentorū naturā cōtineri . Substantia vniuersalis & particularis primū prædicamentū cōtinēt. Accidēs vero vniuersale & particulare, nouem accidētium prædicamenta complectuntur.

¶ Decem prædicamenta his
quatuor continentur.


Prædicamentum substantiæ.	<div style="display: inline-block; vertical-align: middle;"> <div style="font-size: 3em; vertical-align: middle;">{</div> <div style="display: inline-block; vertical-align: middle; text-align: left;"> Substantia vniuersalis Substantia particularis. Accidens vniuersale. Accidens particulare. </div> </div>	<div style="display: inline-block; vertical-align: middle;"> <div style="font-size: 3em; vertical-align: middle;">}</div> <div style="display: inline-block; vertical-align: middle; text-align: left;"> Nouem accidentium prædicamenta. </div> </div>
------------------------------	--	---

¶ Has quatuor cōplexiones, vniuersalem substantiam, vniuersale accidens : particularem substantiam, particulare accidens, Aristoteles disponere

cupiens, non eorum nomina sed descriptiones apposuit. Et quoniam generalissimorum generum definitiones non poterat inuenire: descriptionibus usus est. Id substantiam esse dicens, quod in subiecto non esset, quæ quidem descriptio competit & vniuersali substantiæ & particulari: Accidens vero quod in subiecto esset. Omne namque accidens in aliquo est: ut color in corpore, scientia in anima. & subiectam habet substantiam omne accidens. si quis substantiam tollat, accidens non erit. Quare substantia, locus est accidentis. Substantia autem nullo subiecto alio nititur, sed per se subsistit: quod si in aliquo subiecto esset, diceretur accidens: nam omne accidens est in aliquo subiecto: & quicquid est in aliquo subiecto, est accidens. Dicitur igitur substantia vniuersalis de subiecto, & in nullo erit subiecto. Particularis vero substantia vniuersali partim conueniens, & partim disconueniens, non dicitur de subiecto, nec erit in subiecto. Vniuersale accidens ut coloratum, scientia, dicitur de subiecto, & erit in subiecto, vniuersali substantiæ partim conueniens in eo quod est dici de subiecto, & partim disconueniens, quod vniuersalis substantia non sit in subiecto. Particulare accidens erit in subiecto, sed de nullo subiecto dicitur, partim conueniens vniuersali accidenti: & partim ab eo distans. Ex subiecta figura omnium illorum discrimen & conuenientia patefiet.

Dicuntur de, nō sunt in.

Dicuntur de, sunt in



Nec dicuntur de, nec sunt in.

Nō dicuntur de, sed sunt in.

Quatuor complexiones ex quatuor rebus.

Substantia.

Accidens

Particularitas

Vniuersalitas

Natura

discrepantes.

Quantitate

discrepantes.

¶ Cum dixerimus accidēs esse in aliquo subiecto: & multis modis id intelligi possit: quid velit Aristoteles ostendere esse in aliquo, consentaneum fuerit explicare. Adnotauit Boëtius esse in aliquo nouem dici modis, dicimus esse in aliquo vt in loco: vt est in theatro, in foro. Esse in aliquo vt in vase, vt vinum in amphora. Dicitur esse in aliquo velut pars in toto: vt manus in corpore. Esse in aliquo velut totū in partibus, vt totum in omnibus suis partibus. Esse in aliquo velut in genere species, vt in animali homo, vel genus in speciebus suis. Esse in aliquo, vt aliquid in suo fine, vt quoniam bonæ vitæ finis beatitudo est: si quis sit beatus, in fine est bonæ vitæ. Esse in aliquo vt in quolibet potente: vt in imperatore esse regimen ciuitatis. Esse in aliquo vt forma in materia, vt similitudo Achillis in ære vel in marmore. De hoc vltimo modo loquitur Aristoteles. Nam accidēs est in substantia velut forma in materia. Et quē, admodum forma substantialis informat materiam, ita forma accidentaria accidentario suum subiectum informat & denominat: vt scientia est in anima, ipsam denominans scientem, sine cuius existentia talis forma accidentaria consistere nequit. Nam accidēs ab eo in quo est, segregari nequit. Erit igitur accidens in subiecto. quod sic est in alio vt non sit pars, & sine eo in quo est consistere non potest. ¶ Obijciat quispiam, Socrates semper in aliquo est scilicet loco, & sine eo esse non potest, & tamen non est accidens: igitur accidēs non recte definitum est. ¶ Respōdebis Socratem non esse in aliquo velut formam in ma-

teria, quare nihil incōmodi adfert obiectio in descriptionem accidētis, cum de vltimo modo esse in aliquo, sit præsens negotiū. Similiter quamuis Socrates sit in loco, locum tamen potest permutare & esse præter locū in quo fuit, quod minime accidenti cōpetere potest. Tum etiā Socrates per se subsistit: accidens vero per se non constat. ¶ Præter illos nouē modos esse in aliquo, duorū meminit Damascenus, esse in tēpore, veluti cum dicimus Noe tēpore diluuij fuisse. Et in efficiēte causa, vt in deo omnia: & in artifice, rationes eorum, quæ ab ipso emanant.

¶ Ad primam antepredicamentorum regulam scholia.

Postquam edocuit Aristoteles quid est esse in subiecto: nunc ostendere enititur quæ de subiecto prædicantur. & hac prima antepredicamentorum regula proprias dicibilium prædicationes dignoscere poterimus. ¶ Quando alterum de altero prædicatur: ut de subiecto: quæcumq; de eo quod prædicatur dicuntur, omnia etiam de subiecto dicuntur. ut homo de homine quodā prædicatur, animal vero de homine: ergo & de quodā homine animal prædicabitur, quidā enim homo, homo est & animal. ¶ Cum omne quod prædicatur, aut secundum accidens aut substantiam prædicetur, & quod secundum accidēs prædicatur sit in subiecto, & nō in eo quod quid est prædicetur, omne quod secundum substantiā propriè prædicabitur, merito dicetur & prædicabitur de subiecto. Idem autem putamus prædicari de subiecto & dici de subie-

cto . Et quamuis pauloante docuerimus quid sit dici de subiecto : nunc tamen quid de illius definitione sentiat Boëtius patefaciemus. ¶ De subiecto dici seu prædicari , est quando altera res de altera in ipsa substantia prædicatur, vt animal de homine tanquam de suo subiecto prædicatur: nã de illo prædicatur in substantia , cum animal sit substantia & genus hominis, & quærenti quid est homo: apte respondebitur est animal. Quare illa sola de subiecto prædicantur, que in rei substantia & definitione ponuntur: vt species, genus, & differentia magis propria. ¶ Intelligenda est illa regula in hunc modum : Quando aliquod dicibile prædicatur de altero vt superius de suo inferiori, quicquid prædicatur de prædicato vt superius de inferiori , prædicatur de subiecto vt superius de inferiori : vt animal prædicatur de homine tanq̃ de suo subiecto: & de animali substantia, vt superius de inferiori : quare substantia de homine, vt superius de suo inferiori prædicabitur. Dicunt nonnulli regulam solum esse intelligendã de his prædicatis quæ substantiam significant. Sed nihil obstat quin terminis prædicamenti accidentis competere possit . Nam de albedine color prædicatur vt superius de inferiori, quod sufficit, vt dictum est ad prædicari de subiecto: & de colore qualitas proprie prædicatur, ideo qualitas de albedine prædicabitur vt superius de inferiori. ¶ Ex hac dignitate seu principio, Quicquid superiore superius est: & eius quoq; inferiore: dicit Faber illam regulam esse exponendam , vt animal isto superiore homo (facta ad sua inferiora

consideratione) est superius, ideo est superius inferioribus illius speciei : si igitur species dicatur de suis indiuiduis, vt de subiectis, de illis dicetur & genus . Et hæc regula de his quæ dicuntur de subiecto, sumitur . Posset , vt idem ait, alia de ijs quæ sunt in subiecto identidem sumi & quæ huiusmodi . ¶ Quando alterum in altero est : quæcunque de eo quod est in altero , vt de subiecto dicuntur : omnia in primo sunt subiecto . vt album in homine quidem est : de albo autem , vt de subiecto coloratum dicitur . coloratum igitur erit in homine . Cuius regulæ facilis esset hæc interpretatio : Quæcunque inferiora sunt in subiecto, & eorum quoque superiora in eodem erunt subiecto . ¶ Obijcies probando album non esse in subiecto , vt est in homine . album de subiecto homine prædicatur , vt dicit Boëtius , igitur album dicitur de subiecto . ¶ Respondebis negando consequentiam . quamuis enim album de subiecto homine prædicetur , non tamen in eo quod quid sit , nec in quale essentialiter, ideo nõ dicitur de homine, vt de subiecto . Nihil aliud innuit Boëtius ex illo antecedente, quàm album de homine prædicari , qui est illius accidentis subiectum . ¶ Nonnulli ab Aristotele longe discedentes , crediderunt hac regula philosophum tradidisse argumentandi legem , quam imperitè quartam figuram & sine efficaci ratione vocant . Et ita videntur argumentari syllogistice , homo est animal, & animal est substantia , ergo homo est substantia . Sed nisi quis caliget & mentis lumine priuetur, satis aperte cognoscet argumen-

c.ij.

tum non esse syllogisticum, cum non sit consequentia formalis. Et ex puris particularibus non possumus syllogisticè ratiocinari. Aliud est quo cæcutiunt: putât hac regula aperiri formam syllogisticam quartæ figuræ, vbi solum in hoc opere versetur sermo de dicibilibus & non de forma ratiocinandi. Et omnia secûdum materiam subiectam sunt determinanda & exponenda. Quare te velim lector ingenue, obnixè precari & tibi persuadere, vt ab insulsis, barbaris, & imperitis quorûdâ neoteritorum interpretamentis verius somnijs & deliramentis in hoc opere excellenti euentilatis deterrearis & abhorreas: ne fero te poeniteat vrticas amœnissimis veræ philosophiæ floribus prætulisse. ¶ In regulam digladiaberis: de Socrate tanquam de subiecto prædicatur homo, & de homine species specialissima, & tamen de primo subiecto non prædicatur species specialissima. Tû etiam de homine prædicatur animal rationale, & de animali rationali oratio, & tamen de primo subiecto non prædicatur oratio. ¶ Si rectè perceperis quæ iam exposita sunt, facilitè illas ratiunculas præpedies & elides: quâuis enim de Socrate prædicetur homo tanq̃ de subiecto, & de homine species specialissima, non tamen in eo quod quid, nec in quale essentialiter. Nam hæc prædicatio, homo est species specialissima, non est essentialis, nec species specialissima prædicatur de homine in eo quod quid est, nec essentialiter. Nam quærenti quid est homo, non respondebitur aprè, est species specialissima. Non igitur sufficit primum prædicatum dici de sub

secto: sed opus est quod de primo prædicato prædicatur, de eo prædicetur tanq̃ de subiecto: hæc solutio satisfacit alteri obiectioni. ¶ Nec potest obmurmurare dicens hanc consequentiam esse bonam: animal rationale est oratio, igitur homo est oratio, per locum à definitione ad definitum. Nam argumētum non fit per locum à definitione ad definitum: quia quādo argumentamur per locum à definitione ad definitum, vt videbitur in Topicis, oportet terminum inferentem & illatū sumi significatiuè. vt rectè sequitur: animal rationale est susceptiuum disciplinæ, igitur homo est susceptiuus disciplinæ. Sed in ista friuola argumētatione: animal rationale est oratio, igitur homo est oratio: terminus inferēs, videlicet animal rationale, non sumitur significatiuè. Pariter non sequitur: animal rationale est definitio, igitur homo est definitio.

¶ Ad secundam Antepædicamentorum regulam Scholia.



Volens Aristoteles ostēdere rationes prædicamentorū esse immiscibiles, & ex diuersis generibus generalissimis, & eorum quæ in diuersis recōduntur prædicamentis diuersas esse species & differentias, dicit: *Diuersorum generum & non subalternatim positorum diuersas esse species & differentias, ut animalis & scientiæ. Animalis enim differētiæ sunt, gressibile, bipes, uolatile, aquatile: scientiæ uero nulla illarum est: neque enim scientia à scientia differt, in eo quod bipes est.* ¶ Diuersa genera dicuntur genera non synonyma, vt ani
c. iij.

mal, lapis. ¶ Genera subalternatim posita, eiusdem sunt Prædicamenti genera: vt animal, brutum. & talia nonnunquam easdem habent species, vt prædicta: quorū species sunt, equus, leo, asinus, licet plures animali quàm bruto accommodentur. Interdum diuersas habent species, vt animal & planta. Nam species animalis sunt: homo, equus: plantę vero, pomus, pyrus. ¶ Genera non subalternatim posita, sunt diuersa prædicamenta, aut diuersorum prædicamentorum genera. vt substantia, quantitas, qualitas, & ad aliquid, pariter animal & coloratum: nam sunt diuersorum prædicamentorum genera, primum substantiæ, secundum qualitatis. ¶ Obijciat quispiam: Substantia & color sunt genera non subalternatim posita: & tamen nec sunt diuersa prædicamenta, nec diuersorum prædicamentorum genera, igitur. ¶ Respondebis sufficere vnum esse prædicamentum, & aliud esse sub prædicamento contentum. Et particulæ definitionis datæ hanc particulam continent.

¶ Pugnabis in solutionem, probando substantiam non esse prædicamentū, nihil prædicamentum dici debet quod in prædicamento ponitur, alioqui idem videretur in seipso poni: sed substantia est in prædicamento, igitur non est prædicamentum: minor probatur, Dicit Porphyrius, cap. de specie, in vnoquoque prædicamento esse genera generalissima, & idem testatur substantiam esse in prædicamento substantiæ. ¶ Dilutio. Solet nonnunquam sumi pro prædicamento genus generalissimum. Cum

autem dicit Porphyrius, in vnoquoque prædicamento esse genus generalissimum, sumit prædicamentum pro serie prædicamentali.

¶ Cum prædicamenta sint diuersa genera, & ab inuicem satis discreta, diuersæ illis merito species attribuentur: & pariter cum species differentijs sint disiunctæ, quoties genera generalissima discrepabunt, & eorum species discrepabunt, & differentię diuersarum specierum. Pariter genera diuersorum prædicamentorum diuersas habent differentias, vt animal & scientia. Animalis quippe differentię sunt: gressibile, bipes, volatile, & aquatile. quarum nulla scientię conuenit. Sed assignari possunt ipsius scientię differentię, naturalis, moralis, rationalis. Cum scientiarum quædam sit Naturalis, vt Physica: Moralis, vt Ethice: Rationalis, vt Logica. Pariter animal & color quæ diuersa sunt genera & non subalternatim posita, differentias habent disiunctas. Animalis enim differentię sunt: rationale, & irrationale. Coloris vero differentię non quidem maxime propriæ, sed propriæ, sunt, congregatiuum visus, disgregatiuum visus. Siquidem cum in accedentibus, differentijs maxime proprijs vti non possumus, proprijs, quæ propius ad maxime proprias accedunt, vtuntur. Nec differentię hoc in loco solum dicuntur maxime propriæ, sed maxime propriæ, aut vbi desunt, propriæ. Authores enim quantum fieri potest, maxime proprijs, accommodatisque differentijs vtuntur: vbi vero illæ desunt, vtuntur ijs quæ propius ad illas accedunt.

dunt. ¶ Ad diuersorum generum subalternatim positorum nihil officit ac prohibet easdem alias esse differentias, alias diuersas: vt auis est genus corui & aquilæ, & species animalis. Animal autem, est genus hominis, equi, & leonis. Et vtriusque, videlicet tam animalis quàm auis differentia eadem esse possunt. Vt si quis has animalis differentias assignet, quòd animalium alia sunt quæ pascuntur herbis, alia quæ seminibus, & alia carnibus, eadem differentia aui conueniunt. Nanque auiû alia seminibus vescuntur, alia herbis, alia carnibus, vt vultur, & miluus. Diuersæ etiam sunt animalis & auis differentia. Nam animalis differentia: sunt rationale, & irrationale: quarum nulla determinat auem ab aue. Nulla enim auis differt ab alia aue quòd sit rationalis, alia vero irrationalis. ¶ Contendet quispiam, vult Aristoteles in subalternis generibus easdem esse differentias, quas nihil prohibet alias esse diuersas: & quasunque differentias prædicati, easdem esse & subiecti: sed hæc duo inter se pugnant, igitur textus repugnantia inuoluit. ¶ Soluit argumētum Boëtius, qui dicit hæc rem plures maximis illigasse erroribus, & Aristotelis locū esse emendandū, qui tamen purus & nitidus est nihil cōtrouersia recipiens. Differentiarum, vt ille adnotauit, alia dicuntur completiua prædicati, & cuiuslibet illius speciem informātes: quæ cōmuni nomine specifica nominātur. Nam cum dicitur animatum & sensibile, si substantia cōiungantur, definitionē & speciem animalis mox efficiēt. Animal enim est substantia animata sensibilis,

atq; hæ differentia dicuntur specificæ & cōpletia-
uæ. Sunt & aliæ, quæ nihil cōplent, nec vllā speciē
reddunt, sed genus tantum diuidunt, vt rationale
& irrationale, quæ animal diuidunt, & nō consti-
tuunt: & hæ diuisiua, possunt aliquoties esse eadē,
& possunt aliquoties nō eadem esse: nā illæ huic
generi subalterno aui, non cōpetunt: licet alias
diuisibiles habere possit, quas prædixim⁹. Possunt
igit diuisibiles esse diuersæ: illæ vero quæ cōpletia-
uæ & specificæ sunt, aliquādo nō prædicari de sub-
iecto nō possunt: vt quoniā animal habet differen-
tias cōpletiuas & suæ speciei effectiuas, sensibile
scilicet & animatum, hæ differentia de homine
quod est subiectū animalis nō prædicari non pos-
sunt. Omnes enim specificæ differentia de ijs præ-
dicantur, quorum speciem cōplent: vt de animali
prædicatur sensibile & animatum, & hoc vt de
subiecto & animal prædicatur de homine, vt de
subiecto, quare ex alia regula, necesse est animatū
& sensibile de homine prædicari vt de subiecto.
Quod ergo Aristoteles ait subalternorum gene-
rū nihil phibere easdē esse differentias, diuisibiles
differentias sumebat: quæ possūt esse etiā diuersæ.
Cū vero ait: quæcūq; prædicati differentia fuerint,
eadem erunt etiā subiecti: de specificis intelligen-
dum est. quæ cū speciem cuiuslibet informant, &
de eo quod informant, vt de subiecto prædicen-
tur: de quocunque, vt de subiecto prædicatur il-
lud quod ipsæ differentia informant, de eo vt de
subiecto prædicabūtur, & de eo nō prædicari nō
possunt. Diuus Augustinus, in istis categorijs di-
cit, genera vocari subalterna, q̃ alterna sibi socie

tate cōiuncta sint, quæ græcè dicuntur *ἰπαλλάλα*. Et in istis generibus eadem differētiæ & species inueniri possunt: vt si dicas vsiā esse animal mortale, bipes, risus capax, eadem & de animali potes dicere, homo est animal mortale, bipes, risus capax. Certum est ergo in coniunctis generibus, easdem & differentias & species inueniri. In diuersis autem generibus hoc prouenire nō posse. hæc ille. De hac regula non carente scrupis amplissime agit Aristo. 6. Topicorū, cap. 3. loco quidē 42. vbi inquit: Considerandum est & si alterius generis est dicta differētia, neq; cōtenti neq; continentis. Nam nō videtur eadem differentia duorum generum esse nō continētū seuuicem, alioqui accideret & speciem eandem in duobus generibus esse non continētibus seuuicem: infert enim vnaquæq; differentia proprium genus, vt gressibile & bipes, animal coinferunt, quare si de quo differentia & generum vtrunq; manifestum utiq; quoniā species in duobus erit generibus nō continentibus seuuicem. Sed insistit de bipede differentia duorum generum non se continentū videlicet gressibilis animalis & volatilis animalis. Sed vt hunc discutiatur scrupum, dicit addendum esse, neq; sub eodem vtroq; existente, modo hæc ambo sub animali sunt. Neq; necesse est omnem differentiam, proprium genus inferre, eo quod contingit eandem duorum generum esse non continentium seuuicem, sed alterum tantum necesse est inferre, & superiora omnia, vt bipes gressibile vel volatile infert animal: hæc annotes quæso. ¶ Obijcies in illā regulā: Idem ter

minus vt corpus æquale, potest in diuersis prædicamentis recipi: igitur diuersorū generū & nō subalternatim positorum, nō oportet species esse diuersas. ¶ Dices corpus vt significat substantiā corporeā, esse in substantia: & quatenus designat longitudinē, latitudinē, & profunditatem, esse in quantitate. Ita æquale habere rationem quātitat̃is & ad aliquid, diuersa tamē cōsideratione. Sed non oportet eundem terminum esse in diuersis prædicamētis: quia diuersas habens rationes, nō est idem simpliciter. Nam idem simpliciter, est & idem nomine & re: modo æquale habens duorū prædicamentorum rationes, non est idem re & ratione. Nonnulli tamen nō diffitentur eundem terminum posse diuersa cōsideratione ad diuersa prædicamenta decumbere. Sunt tamen essentia prædicamētorum impermixta: hoc est essentiales prædicamentorum prædicationes, nō sunt promiscuæ: cū terminus vnius prædicamenti nō dicatur essentialiter de termino alterius prædicamenti. quare primæ solutioni cū doctis accedo.

¶ De decem prædicamentis generatim,
Scholia.



E prædicamentis particulatim determinaturus, in hoc capite vniuersatim prædicamenta pronuntiat. Et post illam compressam enumerationem in quatuor; id est in substantiam, accidens, vniuersalitatem, particularitatem: nunc de maxima enumeratione quæ fit in decem prædicamenta, determinat.

¶ *Eorum (inquit) quæ secundum nullam cōplexionem dicuntur: singulum aut substantiā significat, aut quantitatem, aut qualitatem, aut ad aliquid, aut ubi, aut quādo, aut situm esse, aut habere, aut agere, aut pati. Est autem substantia quidē, ut homo, equus: quantitas autem, ut bicubitum, tricubitū: qualitas, ut album, grāmaticum: ad aliquid, ut duplum, dimidium, maius: ubi uero, in foro: quando autē, ut heri, superiore anno: situm uero esse, ut iacet, sedet: habere autē, ut calciatū esse, armatum esse: agere uero, ut secare, urere: pati, ut secari, uri.* **¶** *Quauis formam diuisionis sibi vendicet hæc enumeratio, nō tamē propria est diuisio. Diuisio namq; ferè est generis in species, prædicamentum autē non habet genus quo diuidi possit: igitur prædicamentorū non est diuisio, sed enumeratio.* **¶** *Hac enumeratione, satis apertè demonstrat Aristoteles se tractaturū de vocibus & nō de rebus. Nam si eorū quæ secundum nullam cōplexionem dicuntur singulum significet, aut substantiam, aut quantitatem, & sic de alijs, & cū significatio rebus nō accōmodetur, sed vocibus, nam res significātur & nō significant: manifestū est Aristotelem de vocibus differere & nō de rebus. Nō putes vocē solum sumi pro dictione quæ auditu percipitur, sed latè pro quacunq; dictione, ut rei aduerfetur.* **¶** *Amplius dicit in eodē capite singula eorū quæ dicta sunt: ipsa quidem secundū se, in nulla affirmatione dicuntur uel negatione. Secundum se, id est seorsum, nec sunt affirmationes, nec negationes. Nam omnis affirmatio vel negatio est vera vel falsa, nullum autē incōplexum est verum aut falsum, ut idem testatur de istis: homo,*

album, currit, vincit. *Horum autem ad seinuicem cōplexione affirmatio uel negatio fit*, id est, si cum quadam cōplexione sint copulata, ut verbū alteri extremo adhæreat, sunt affirmationes vel negationes, ut Socrates ambulat, homo vincit. Sed ex rebus fieri nō possunt propositiones, sed ex vocib⁹. Nam ut dicit Boëtius, in rebus nec est veritas nec falsitas, sed in intellectibus atq; opinionibus (idē sentit Aristoteles 2. cap. 6. metaphy.) & post hæc in vocibus atq; sermonibus, igitur de reb⁹ in hoc opere nō determinatur. ¶ Cum prædicamenta siue genera generalissima quæ pro eodē hoc in loco sumuntur sint inter se discreta & vnum alio sit perfectius, videndū est si nam aliqua eorū alijs contineantur. ¶ Dicit Augustinus in prædicamentis, vsiam latinè substantiā, categoriarū esse primam: quæ nouem cæteras sustinet, quæ sunt accidentia. Ex quibus nouē, sunt alia in ipsa vsia, alia extra vsiā, alia & intra & extra. Qualitas, quantitas & iacere in ipsa sunt vsia. Mox enim ut vsiā vel hominē vel equum dixerimus, aduertamus necesse est bipedalem, quadrupedalem: aut albū, aut nigrum: aut stantem, aut iacentem. Hæc in ipsa vsia sunt, & sine hac ipsa esse non possunt. Alia sunt extra vsiā: vbi, quando, habere, & locus ad vsiā non pertinet, & tēpus & vestiri & armari, sed ab vsia separata sunt. Alia sunt cōmunia, id est extra & intra vsiā, ad aliquid & facere & pati. Ad aliquid, ut magis & minus. Vtraq; enim dici nō possunt, nisi coniuncto altero quo magis sit vel minus: propterea vnū in se habet, aliud extra se. Item facere, extra est & intra, ut cadere quisq;

non potest dici, nisi alterū cādat: hāc ille. ¶ Quoniam prae manibus habetur de praedicamentis determinatio, facturus operæpretium videbor in lucem adducere praedicamentorum diffinitionē à Trapezuntio inter doctos approbatissimo elucubratam. ¶ Praedicamentum, ut ille diffinit, est terminorum qui secundum nullam, complexiōnem dicuntur, natura rerum ordinatio: quam in hunc modum exponit Ioannes Cæsarius, Praedicamentum, est series quædam terminorum in complexorum, quatenus ex his natura, id est ratione rerū alij alijs subiiciuntur, alij de alijs praedicantur. Cæterum nomen praedicamenti dictū esse videtur, quod de omnibus praedicatur decem numero praedicamenta, veluti ipsorum vocabulorum elementa quædam, quo nomine & Quintilianus ea vocat, & approbat Laurentius Valla: quod sensus, scilicet cæterorum vocabulorū ad ista tanquam ad elementa & principia referantur: ob eamque rem genera quoque dicuntur, quod ex his cætera significata gignantur: quorumque nullum alio superius est, aut alteri genus: sed ipsa genera sunt principalia. ¶ Quemadmodum decem sunt praedicamenta, ita decem sunt praedicamentorum quæsitiva: quibus singulorum praedicamentorum dicibilia de prima substantia interrogamus, quid, quantum, quid huius, quale, quid agens, quid patiens, quādo, ubi, quomodo situm est, quomodo habitum est. Quid, est quæsitivum substantiæ: quantum, quantitatis: quid huius, ad aliquid: quale, qualitatis: quid agens, actionis: & ita de cæteris per ordinem digestis.

¶ Ut autem facilius deprehendere possis, quænam dicibilia ponuntur in substantia, aut in alio prædicamento, hoc sumito præceptum. ¶ Quæcunque dicibilia ad aliquod istorum quæsitiuorum de prima substantia aptè respondentur, sunt in prædicamento quæsitui: ut homo, animal, sunt in substantia. Nam quærenti quid est Socrates aptè respondetur est homo, etiam percontanti quid est equus aptè respondebitur est animal. Simili lege probabis has voces, bicubitus, tricubitus, esse in prædicamento quætitatis. Nam quærenti de prima substantia, videlicet de Socrate quantus est aptè respondetur, est bicubitus, tricubitus. Similiter hac regula, album, nigrum, & multa alia sunt in qualitate. Nam quærenti qualis est Plato aut Cicero bene respōdebitur, est albus, aut niger. Et de alijs similis probatio fieri posset.

¶ De prædicamento substantiæ,
Scholia.



Præter Aristoteles de prædicamentis generatim & quadam figura disseruit: nunc autem de vnoquoque speciatim loquuturus, à substantia ceteris supereminente auspicatur, nec inconsulto à substantia inchoauit. Nam quoniam omnis res aut in subiecto est, aut in subiecto non est: & quicquid in subiecto est, in propria natura non potest consistere, indiget subiecto. at rebus omnibus substantia subiecta est, nihil eorum quæ in subiecto sunt præter substantiam poterit remanere: & ipsa prior accidētibus erit, non igitur absurdè de eo

quod alijs prædicamentis naturaliter est prius, sermonē auspicatus est. Tum etiā Aristo. 7. Metaphy. censet oportere exordiri à substantia cum ipsa sit principium & causa quædā. Et in primo cap. eiusdem septimi dicit: Multis quidem modis primum dicitur: attamen substātia & ratione, & cognitione, & tempore, & natura, omniū primū est. ¶ Cum de substātia differere cōtendamus, facturi videbimur operæpretiū, si modos substātiæ ab Aristotele in septimo Metaphy. constitutos, ad hunc locū adferamus. ¶ Philosophus 3. cap. 7. Metaphy. dicit substātiā quatuor modis maximè dici. Etenim quidditas, & vniuersale, ac genus, substantia cuiusq; esse videtur, & quartū horum subiectum. Subiectum autē, id est de quo cætera dicuntur, ipso rationem prædicati nō subeunte. Et hanc substantiā quartū locum sibi vendicātem dicit Philosophus nō dici de subiecto, sed de quo cætera. Hæc ab eodē in hoc prædicamento vocatur prima substantia seu maximè substantia. ¶ Idem cap. 13. eiusdem septimi, ostendit substantiam dupliciter subijci, aut quod quid existens: vt animal passionib⁹, aut materia actui. Hæc in trās cursu adnotata, spero lectori nō officere. ¶ Cum res sint mutua affinitate rationibus connexæ, quid substantia rei, & substantia pro dicibili censetur, licebit adnotare. ¶ Substantia rei seu substantia pro re ipsa, dicitur res per se subsistens: vt homo. nam substantiæ cōpositæ (de qua hæc accipio intelligēda est) propriū est per se subsistere. De illis loquitur Philosophus 5. Metaphy. vbi dissectionem substātiæ in corpora simplicia (vt sunt

elementa) & in ea quæ ex illis constant (vt animalia) apertâ reliquit. ¶ Aliam illi attribuunt significationem. Substantia, est res quæ non est accidens, ea vtendo significatione, deus substantiarum simplicissima & nobilissima censetur substantia. ¶ Rursus vt in compositis substantia accommodetur: dicitur pars rei per se subsistētis, vt materia, & forma substantialis. Nec abnegat Philosophus septimo Metaphy. substantiarum partes esse substantias, dicens substantiam existere manifestissimè quidem in corporibus, quare animalia & plantas & eorum partes, substantias esse dicimus. ac naturalia corpora, vt ignem, aquam, & terram, ceterorum quoq; singula, & quæcunq; aut horū partes aut ex his sunt aut partibus, aut omnibus, vt cælum, & eius partes, sidera, Luna & Sol. hæc ille. ¶ Quoniam de substantijs & simplicibus & mixtis sumus locuti: licitum erit substantiarum gradus hoc in loco nominare, vt earum dicibilia dinoscantur in prædicamento substantiæ sedem habere: logicus enim res propter dicibilia considerat.

¶ Substantiarum gradus.

¶ Deus summis substantiæ gradibus, medijs & infimis longe supereminet: qui omnium perfectissimus, & à quo substantiales gradus emanant, istis substantijs & substantiæ gradibus connecti non debet.

¶ Intelligētia vt Michael & cæteri spiritus angelici.

Cæli vt cælum lunæ, cælum mercurij, & ita de cæteris.

d.j.

Elementa	vt Ignis, Aër, Aqua, Terra.
Animalia	vt homo, equus, bos.
Vegetabilia	vt rosa, lilium, pomus.
Mineralia	vt aurum, argentū, æs, ferrum.
Mixta imperfecta	vt pluuiæ, ros, pruina.
Substantiarū partes	vt anima, corpus, brachium, caput.

¶ Substantia pro dicibili, est dictio significans absolute substantiam, aut eius partem substantialem designans, vt hoc dicibile homo: significat enim absolute Socratem, Platonem, & alias substantias particulares. rationale pariter est dicibile substantiæ, & omnes differentiæ substantiales sunt in genere substantiæ. nam rationale designat suam rationem animam rationalem, hominis partem substantialem. ¶ Contendet quispiam, rationale prædicatur in quale, igitur non est in prædicamento substantiæ: probatur consequentia. Substantia differt à genere qualitatis & aliorum prædicamentorum, eo quod prædicatur in quid. Dicibilia autem qualitatis, & alterius prædicamenti accidentium prædicantur in quale. Tum etiam quæsitium prædicamenti substantiæ est Quid. modo si quæretur quid est homo, non respondetur apte, est rationalis, igitur rationale non est in prædicamento substantiæ. nec differentiæ substantiales. ¶ Qui astruunt imperite differentias substantiales poni in genere qualitatis, hoc argumento se extollunt, rectam aliorum doctrinam supplāre cupientes. Sed in prædicabilium scholijs, ostendimus eorum cristas esse demittendas. Quauis differentia substantialis prædicetur in

quale, non propterea à genere substantiæ dimo-
uebitur. Nam prædicatur in quale essentialiter,
quod finitimum est prædicari in quid. Si tamen
prædicaretur in quale accidentaliter, disiungeretur
à prædicamento substantiæ. Deinde sub quæ-
situo Quid, complectimur quod ei est vicinum,
scilicet quæsitium Quale essentialiter, seu substan-
tiale. tamen simpliciter quæsitium quid, insti-
tutum est: ut quæ absolute significarent substan-
tias, apte responderent percontationi illo signo
designatæ, ideo dicitur quæsitium substantiæ.
& id sentit Philosophus dicens in hoc capite, se-
cundas substantias primas indicare. ¶ Conficiens
Aristoteles quandam substantiarum diuisionem
in primam & secundam: describit primùm pri-
mam substantiam. ¶ Ea substantia quæ proprie
principaliter & maxime dicitur substantia, est
quæ neque de subiecto aliquo dicitur, neque in
subiecto aliquo est: ut quidam homo, & quidam
equus. ¶ Has particulas proprie, principaliter,
maxime, primæ substantiæ adiectas dilucidat in
hunc modum Boëtius: proprie substantias indi-
uiduas dicit Aristoteles, quòd hominem quidem
ipsam speciem vel animal quod est genus, non
nisi ex indiuiduorū cognitione colligimus. quæ-
re quoniam ex singulorum sensibus generalitas
intellecta est: merito proprie substantiæ, indiui-
dua & singularia nominantur. ¶ Principaliter ve-
ro indiuiduæ substantiæ dictæ sunt: quòd omne ac-
cidēs prius in indiuidua, posteri⁹ vero in secūdas
substantias deflectitur. Nā quoniā Aristarch⁹ Græ-
d.ij.

cus est, homo vero est Aristarchus: est homo græcus, quod igitur prius subiectum est, hoc sanè substantia principaliter appellatur.

¶ Maxime autem prima substantia dicitur, idcirco quòd quæ maxime subiecta est rebus alijs, ea maximè substantia dici potest: maxime autem subiecta est prima substantia. Omnia enim de primis substantijs dicuntur, aut in primis substantijs insunt. vt genera & species: genera equidem & species vt animal & homo de primis substantijs, vt de Socrate & Platone prædicantur. Accidentia autem in primis substantijs principaliter sunt. Quare quoniam vel accidentia in primis substantijs principaliter sunt: vel secundæ substantiæ de primis substantijs prædicantur, primæ substantiæ secundis substantijs accidentibusq; subiectæ sunt. Et quoniã maxime subiectæ sunt: merito maximè substantiæ nūcupātur. ¶ Dicit Faber hæc aduerbia principaliter, primo, & ferme propriissime primo & maxime, se mutuo interpretari: & quauis non putem id falsum dici, mirum tamen in modum placet sana Boëtij eruditio: qui cuique particulæ (vt integra primæ substantiæ natura notior euaderet) suam subscripsit rationem.

¶ Dissoluit non indocte Faber addubitationem: Cur indiuidua singularésque substantiæ propriissime & maxime substantiæ rem ipsam artendo appellantur. Non abs re forte vt dicit, id esse videtur. Nam re pariter & ratione, singulares illæ substantiæ subsistunt: vniuersales autem substantiæ re ipsa vniuersales non subsistunt, sed sola ratione. Quod autē & re & ratione tale est, pro

prijissime maximéque & primo tale est. Quod vero ratione sola, minus proprie, minus tale & secundo loco tale est. Homo enim substantia est re ipsa sanè singularis, ratione autem sola vniuersalis. Cum enim hominem substantiam dicis vniuersalem, notionem ipsam rationémque respicis vniuersalem, qua mediante vocabulum ad significandum inditum est. Quòd si id plane intelligerent Sophismatum deliramētis & somnijs dediti, nō vsque adeo cæcutirent, nec eos imperiti interpretes diutule suis technis & decipulis detinerent. Iungunt enim authores (vt ille perpulchre docet) rem rationi, & rationem rei : sed in logica logice, & in Physica physice. res in logica præcipue propter notiones, rationes, proprietatesque dictionum & orationum: & in Physica rationes propter res ipsas conditionesque rerum meditantur. Assimilatur logicus alicui rerum ex imaginibus speciali contemplatori : quòd res ipsas interdum propter imagines illas, & rerum nomina & iterum illorum nominum nomina speculetur. Physicus vero ex opposito rerum assimilatur contemplatori.

¶ Prima substantia neque dicitur de subiecto nec est in subiecto, hoc est indiuiduum prædicamenti substantiæ, nec prædicatur accidentaliter nec essentialiter, vt Socrates, Plato. Nam nihil natū est subijci indiuiduis substantiæ, omnibus tamen alijs natæ sunt subijci. Nec inculcandum est futile argumentum de hac albedine aut non ente ad suadendum vtrunque dici primam substantiā: quia nec sunt in subiecto nec dicuntur de subie-

cto. Nam quæ nec sunt in subiecto nec dicuntur de subiecto, & secundis substantijs & accidentibus, ex Aristotelis sententia subsistunt & subiiciuntur: modo hæc albedo, aut non ens, secundis substantijs nõ subiiciuntur. cum istæ propositiones sint falsæ: hæc albedo est animal, non ens est homo. Hæc particula, quod nec dicitur de subiecto in descriptione primæ substantiæ posita, disiungit secundam substantiam à prima. Nam quavis secunda substantia non sit in subiecto, tamen dicitur de subiecto. ¶ Contender quispiam, magis dignum fuit species & genera primas substantias nominari quàm singulares substantias, igitur singulares substantiæ non debent dici primæ substantiæ: antecedens probatur. Secundæ substantiæ singularibus priores sunt, igitur debent dici primæ substantiæ: antecedens probatur. Omne quod prius est sublatum, aufert id quod est posterius: posterioribus vero sublatis priora nõ pereunt. homo nanque si pereat, Socrates continuo est periturus, at non ediuerso. Si igitur sublatis generibus & speciebus indiuidua perimantur, sublatis autem indiuiduis, species & genera permanent: secundæ substantiæ quæ sunt genera & species erunt indiuiduis substantijs priores.

¶ Dilutio. Negandum est secundas substantias esse indiuiduis substantijs priores: & quanuis Socrate perempto non intereat homo, sublatis tamen omnibus hominibus, hominem interire necesse est. Dissoluens illam rationem Boëtius, dicit: Indiuiduorum naturam non recte accipi in argumento. Neque enim cuncta indiuiduorum

substantia in vno Socrate est, vel quolibet vno homine: sed in omnibus singulis. Genera namq; & species non ex vno singulo intellecta sunt: sed ex omnibus singulis indiuiduis mentis ratione concepta. Semper enim quæ sensibus propinquiora sunt, ea etiam proxime nuncupanda vocabulis arbitramur: qui enim primus hominem dixit: non illum qui ex singulis hominibus conficitur concepit animo, sed quendam singularem atque indiuiduum, cui hominis nomen imponeret. Ergo sublati singulis hominibus homo non remanet: & sublati singulis animalibus, animal interibit. Quocirca quoniam in hoc libro de vocabulorum significatione tractatus habetur: ea quibus vocabula prius posita sunt, merito primas substantias nuncupauit. prius autem illis vocabula sunt indita: quæ prius sub sensibus cadere potuerunt. sensibus vero obijciuntur prima indiuidua, merito igitur eas primas in diuisione posuit. hæc ille. ¶ Subagitur quæstio: Cum naturaliter primæ intelligibiles sint substantiæ, vt deus vel animus: cur non has primas substantias nuncupauerit.

¶ Ab eodem dissoluitur quæstio. Quoniam vt inquit, sic de nominibus tractatus habetur: nomina autem primo illis indita sunt, quæ principaliter sensibus fuere subiecta. Posteriora vero in nominibus ponendis putantur: quæcumque ad intelligibilem pertinent incorporaliter vt ad deum vel animam, vel ad genus vel speciem. Quare quoniam in hoc opere principaliter de nominibus tractatus est, de indiuiduis
d. iiii.

mento qualitatis, & homo in genere substantiæ. Secundo per accidens, quando de illo generalissimum prædicatur accidentaliter, & sic album est in genere substantiæ. Tertio reductione, quando de illo non prædicatur generalissimum in recto, sed solum in obliquo, ratione alicuius per se existentis in prædicamento cuius est principium: & hoc modo punctus & vnitas sunt in genere quantitatis, & deus in genere substantiæ. & de re fit sermo, cū sit principium eorum que per se ponuntur in substantia. Hæc tamen distinctio parum aut nihil habet commodi in disciplinis. ¶ Percontaberis cur Philosophus primam substantiā per negationem descripsit. ¶ Hanc dissoluit percontationem Simplicius, quibusdam ad id suadendum analogijs vtens. Sumptis (vt innuit) his tribus, homo, equus, canis: verum est dicere, quod non est canis neque equus, quod homo est: & cognitis duobus, cognoscetur tertium. Similiter si hæc tria sumantur, bonum, malum & indifferens: verum est dicere significantē indifferens, quod neque est bonum neque malum. & cognitis duobus cognoscetur indifferēs. Haud secus his tribus acceptis, quod est in subiecto, quod dicitur de subiecto, & quod neutro modo se habet, verū est demonstrato tertio dicere quod nec est in subiecto, nec dicitur de subiecto: propter hoc docuit de eo quod est in subiecto, & de subiecto dicitur, vt per negationē ipsorū propriissimā substantiam significaret. quam his indiuiduis substantijs quidā homo & quidam equus, proprie impositarum & vere denominatarum vices gerentibus aperte dete-

xit: ex quibus equidē exēplis satis? coniectare possumus Philosophū nunc non proposuisse de intellectualibus disceptare, sed de sensilibus. ¶ **A**lia addubitatio, Cur à singulari substantia inceptis? ¶ **I**dem Simplicius visus est reddidisse rationem dicēs, cū dupliciter dicatur prius & posterius: aut natura, aut ad nos, & neutro modo habēte, eam ob rē prius docuit de subiectis singularibus. Singularia quidē sunt priora ad nos, prius enim his incidimus. Natura autem, cōmuniora sunt priora, sub vniuersalibus enim ordinata sunt singularia. Quare si quis à natura incipiat, simplicia, causas, vniuersalia, immaterialia, indiuisibilia & talia præordinabit. quoniam autem à significatiua habitudine ordo nunc acceptus est, ad nos prius accipietur & primū describetur. ¶ *Secundæ substantiæ dicuntur species, in quibus eæ, quæ principaliter substantiæ dicuntur, insunt: ut homo & aīa.* ¶ **C**omplexus est Aristoteles secundas substantias generibus & speciebus: nō quidem omnibus, sed his quæ primas substantias continerent: vt homo continet particulares substantias, scilicet Socratem, Platonem, & ita de cæteris de quibus prædicatur in quid & essentialiter. pariter animal est secunda substantia. nam est genus continens speciem & primas substantias de quibus prædicatur essentialiter & in quid. Sunt igitur secundæ substantiæ genera & species in quibus sunt primæ, id est, particulares substantiæ subiiciuntur secundis, prædicatione essentiali & in eo quod quid est: id recte dictum putabitur, ne quis credat coloratum quod est genus: aut album quod est spe-

cies, esse secundam substantiam: nā minime prædicantur de primis substantijs substantialiter seu essentialiter. Tum etiam non continent primas substantias. Nam quid sint primæ substātiæ non indicant, quod oporteret: non enim quærēti quid est Socrates, apte respondebitur, est albus aut coloratus. Quid autem sint primæ substantiæ, secundæ monstrant: & eorum quæ prædicantur, ut dicit in hoc capite Philosophus, primam substantiam indicant: accidentia vero alienissime: quare merito secundæ substantiæ erunt genera & species in quibus sunt primæ substātiæ. ¶ Quoniam genera & species sunt in subiecto, aut dicuntur de subiecto: & non quæ cū sunt in subiecto dicuntur de subiecto. quidnam discriminis habent genera & species prædicamenti substantiæ ab his quæ in primis sunt substantijs, ostendit Aristoteles, dicens: *Eorum quæ de subiecto dicuntur, necesse est & nomen & rationem de subiecto prædicari: ut homo de subiecto quodam homine dicitur: prædicatur etiam & nomen. Hominem enim de quodam homine prædicabis, & ratio quoque hominis de quodam homine prædicabitur: quidam enim homo & homo est, & animal rationale mortale. quare & nomen & ratio de subiecto prædicabitur.* ¶ Nomen prædicari seu nomine prædicari, est vere & affirmatiue prædicari: ut hoc nomen homo de Socrate prædicatur, cum dicimus Socratem esse hominem. ¶ Ratione prædicari, ut fertur, est substantialiter & essentiali ratione prædicari. Dicam facilius & magis ad Aristotelis intelligentiam: Est diffinitionem de eo prædicari essentialiter, de

quo & nomen cuius est definitio prædicatur : vt homo prædicatur quidem nomine de Socrate, cū dicitur Socrates est homo, & ratione, hoc est secundū suam definitionē, vt Socrates est animal rationale mortale. *Illorum quæ sunt in subiecto in plurimis quidem neq; nomen neq; ratio prædicabitur de subiecto:* vt virtus est in anima tanquā accedens in subiecto, & de anima nec nomine nec ratione prædicatur: cum non dicimus animam esse virtutem, sed studiosam, & virtutis cupidā. *In aliis quibus autem nomen de subiecto prædicari nihil prohibet, rationem autem est impossibile: ut album prædicatur de corpore, cum sit hæc enuntiatio vera, corpus est album. Ratio autem albi de corpore substantialiter dici non potest. Verum cum omniū horum prima substantia sit subiectum, manifestū erit omnia alia à primis substantijs (ut dicit Philosophus) aut de eis dici ut de subiectis, aut in eis esse ut in subiectis: hoc est accidens vniuersale, aut substantia vniuersalis prædicatur de prima substantia aut essentialiter aut accidentaliter. Id perspicuum euadit ex Aristotelis probatione, qui ita inquit: Animal de homine prædicatur: ergo & de quodam homine animal prædicabitur. Nam si de nullo quorundam hominum, neq; omnino de homine. Rursus color est in corpore: ergo & in quodam corpore. Nam si non esset in aliquo singulorum, nec omnino in corpore. Hinc concludit Philosophus: non existentibus primis substantijs impossibile esse aliquid aliorum remanere. Nā omnia alia vt dictum est, aut prædicantur de eis, aut sunt in eis: quare sublati primis substantijs, nec vniuersalis substantia nec accedēs de eis prædicaretur.*

non enim essent secundæ substantiæ: nisi de primis substâtijs prædicarêtur. Nec quæ sunt in subiecto penitus consistere possent nisi primarum substantiarum fulcimentis & fundamentis inniterentur. ¶ Nec accedo eorû sententiæ qui imperita & barbara quæq; effutientes dicunt essentiam generis vel speciei destitutam individuis, posse subsistere: hoc perculsi argumento: Species sunt æternæ, igitur expulsis individuis adhuc subsistût. Sed velim q̃ futile sit hoc argumentum dignoscant periti, qui Aristotelis disciplinas ad vnamquem cognoscût. Species tametsi sint æternæ, illarum tamen æuiterna duratio cōsistere non potest, si particularium substâtiarum(quarum sunt imagines) nullæ subsisterent. Quis dij boni, nescit species frigescere & perituras, si nulla foret particulariû substantiarum successio? Et satis apertè errorem quo cęcutiût, detegit Aristoteles, dicēs: Non existentibus primis substantijs impossibile esse aliquid aliorum remanere. adnitûtur tamen illud interpretari, dicentes Aristotelem noluisse asserere destrui genera & species, si destruantur individua illius speciei vel generis: sed si destruantur omnes substantiæ primæ. quoniam si non esset aliqua substantia, non esset aliqua forma substantialis, pariter nec materia prima: modo deficiente prima materia, deficerent omnes quiditates(vt ita loquuntur) substantiales & accidentales. Lolio sanè victitant & Cimmerijs offunduntur tenebris, dicentes Philosophum noluisse dicere destrui genera & species si destruantur individua illius speciei vel generis. Nam ad suadendû

alia & primis substantijs interire si primæ substantiæ intereant, hoc vtitur argumento: animal prædicatur de homine, igitur de aliquo homine. nam ex opposito consequentis, si de nullo prædicaretur, neque omnino de homine. Quare dicendum est, vt dicit Boëtius Philosophi optimus interpres, secundas substantias non esse, nisi de primis substantijs prædicarētur. ¶ Insistet quispiam: destructis hominibus animal perire non est necesse: & homines singuli animalis sunt primæ substantiæ & indiuidua: igitur peremptis primis substantijs, secundas periri non est necesse.

¶ Dices homines singulos non esse propinquas animalis substantias, sed hominis. cum genus propius prædicetur de specie quàm indiuiduis. remotius autem seu mediatius de indiuiduis. Et perēptis singulis hominib⁹ hominē perire oportet, cū nihil remaneret cuius præsidio cōsisteret. Est etiam intelligendus Aristoteles, destructis omnibus indiuiduis & speciei & generis nihil aliorum posse subsistere: modo si omnes particulares animalis substantiæ interirent, & animal interire oporteret. ¶ *Secundarum substantiarum magis substantia est species quàm genus*: hāc conclusionē probat Philosophus dicens: species propinquior est primæ substantiæ: ut si quis primam assignet substantiam quid ipsa sit, conuenientius & multo euidentius assignabit speciem quàm genus: ut quærenti quid est socrates, aptius respondetur est homo, quàm si responderetur est animal: igitur secundarum substantiarum magis substantia est species quàm genus. Probatur consequentia, Quanto se-

cundarum substantiarum aliquæ sunt propinquiores primis quàm aliæ, tanto illæ primis conuenientiores magis dicuntur substantiæ.

¶ Hinc facillè erit perpèdere discrimen inter primas substantias & secundas. Primæ nanque substantiæ omnibus alijs æqualiter subiiciuntur: & natæ sunt tam secundis substantijs quàm accidentibus substerni & subijci. Secundæ autem substantiæ non æqualiter sunt substantiæ. Nam quoniam propinquior est species primæ substantiæ quàm genus quæ solum de primis substantijs dicitur: genus autem & de specie & primis substantijs, idcirco magis est species substantia quàm genus. ¶ Nec propterea putes secundas substantias suscipere intensiorem & remissionem, cum id abneget Philosophus in quinta proprietate substantiæ. Nec prædicari cum his aduerbijs magis & minus. Sed quia species conuenientius & propinquius primis adnectuntur substantijs, & de primis interrogatis aptior & lucidior per eas fit responsio quàm per genera, dicuntur magis substantiæ quàm ipsa genera. ¶ Adnotatum dignum est, omnes substantias eatenus dici æque substantias, quatenus non suscipiunt intentionem nec remissionem. Præterea non est incommodum eandem substantiam esse magis & minus substantiam, diuersa tamen ratione: ut animal est enim magis substantia quàm corpus animalium, & minus substantia quàm homo. Cognoscitur una substantia esse magis substantia quàm alia, cum talis substantia est altera minus communis. Et minus substantia, quanto ma-

gis est communis, & minima substātia si omniū substantiarum sit communissima, vt substantia. ¶ Sequi videbitur duas æque dici substātiās: quarum vna est minima, altera vero non, vt substantia & corpus. Sunt enim æque substantię, cū non prædicentur cum istis aduerbijs magis & minus intensiōem & remissiōē designantibus, & vna est minima, scilicet substātia, altera vero non. Genera enim intermedia sunt magis & minus substantiæ. Genus generalissimum minima substantia, particulares vero substātiæ, maximè sunt substātiæ. ¶ Sed cum substantia omnes cōplectatur substātiās, videbitur cuipiā maxima, nec iniuria. Quare adnotandū puto substantiam eo iure dici maximā, quatenus est continens omniū substantiarum. Corpus, maior substantia, vt est cōtinens omniū corporū. Corpus animatū, maior substantia, vt est continēs omnium animatorū. Animal maior substantia, vt est continens omnium animalium. Pariter homo, vt est cōtinens omniū hominum. Minima autē erit particularis substātia, quatenus est vnus tantū substantia, vt Plato, Cicero. ¶ Hac tamē valida ratione, demōstrat Aristote. primas substātiās esse maximè substantias. Primæ, vt inquit, substātiæ alijs omnibus subiiciuntur, & omnia alia vel de ipsis prædicantur, vel in ipsis sunt. Et quemadmodū primæ substantiæ ad alia omnia se habēt, sic & species ad genus se habet. Nam species subiicitur generi, genus autem speciei non subiicitur: quare species primis substantijs propinquiore & similiore, dicentur magis species q̄ genera. Ipsarum specierum quæcūq̄

non sunt genera: nihil magis alterum altero substantia est. Cum secundarum substantiarum aliquæ solum sint species, & hæ specialissimæ seu maximè species dicuntur. Aliæ vero sint species & genera, ad diuersa tamē cōparatæ: hæ quæ specialissimæ sunt, eā sibi vicinitatem & cōuenientiā in substantia vēdicant: quæ earum nulla, vt dicit Philosophus, sit altera magis substantia: cuius firma & expedita est probatio. Nihil enim, vt inquit, familiarius assignabis de quodā homine hominē assignādo: quā de quodā equo equū. Et ratio est: nam homo & equus solis indiuiduis præfunt: & æqualiter à suis indiuiduis distant: nō igitur homo propinquius de suis indiuiduis dicitur, quā de quolibet equo, equus. Probè dixit species quæ non sunt genera, esse æqualiter substantias. Nā duarum specierum, quarum vna est specialissima, & altera subalterna, nō est substantiæ æqualitas: vt hominē & auē animalis species, dicimus inæqualiter esse substantias: cum vna sit specialissima, scilicet homo: altera subalterna, scilicet auis, quæ in alias diuiditur species: vt in accipitrem & vulturem: quæ quanquā aues sint, specie tamen dissentiunt. Nec mireris hominem & auē non esse æqualiter substantias. Nam à primis substantijs non æqualiter distāt. homo enim solis præfertur indiuiduis: auis vero nō solum indiuiduis, sed etiam speciebus specialissimis, vt accipitri & vulturi præest. Sed homo & accipiter cum æqualiter à primis substantijs distent, sunt æqualiter substantiæ.

¶ Similiter autem & in primis substantijs nihil magis alterum altero substantia est. Satis manifestum

e. j.

est primas substantias æqualiter esse substantias. Non enim quidam homo magis substantia est quàm quidam equus. Nam primæ substantiæ, cum maximè & principaliter sint substantiæ, nequè minus, nequè magis substantiæ dicuntur. Merito post primas substantias, sola aliorum omnium species & genera secundæ substantiæ dicuntur. Cōueniēter post primas substantias, genera & species, secundas esse substantias demonstrat: nam sola hæc, quid sint primæ substantiæ indicant: nobis enim sciscitanti- bus quid sit Socrates, aptè respondebitur homo, & animal. manifestius tamen & familiarius hominem quàm animal assignabis. Aliorum autem, ut accidentium, nihil aptè primis substantijs quid ipsæ sint assignabis: sed extraneè & alienissimè proferes: ut quid Socrates sit percontanti, non aptè respondebitur est studiosus, albus, aut Philosophus. Quare accidētia aliena erunt ad quæstionem quid, de prima substantia. Merito igitur post primas substantias, earum genera & species, secundæ substantiæ dicuntur. Tum etiam primæ substantiæ propriissime idcirco substantiæ dicuntur, quod alijs omnibus substernuntur. At uero ut ipsæ alijs subiiciuntur: ita species & earum genera alijs subiiciuntur: & de ipsis reliqua prædicantur. Si enim quædam hominem grammaticum enunties, igitur hominem & animal esse grammaticum fastearis necesse est: similiter & in alijs: quare post primas substantias rectè proposuit earum species & genera secundas esse substantias. Commune est omni substantiæ in subiecto non esse. Nunc Philosophus substantiæ proprietates, seu quasdam verius

communitates cupit exquirere: quasi sint signa quibus substantiam valeamus agnoscere. ¶ Prima. Commune est omni substantiæ in subiecto non esse. De prima substantia statim perspicuum euadit, cum de nullo possit accidentario prædicationi, nec possit particularis substantia esse accidens. Secundæ autem substantiæ quâuis videantur esse in subiecto, cum dicunt hominem esse in Socrate & animal in homine: sed non aliter illud intelligendum est quàm per prædicationem essentiali, & hominem prædicari substantialiter de Socrate & animal de homine. Non tamen secundæ substantiæ sunt in subiecto: cum de nullo prædicentur secundum accidens, homo enim de subiecto quodam homine dicitur, sed in subiecto nullo est. Itidem animal de subiecto dicitur, & in nullo est subiecto. Amplius eorum quæ sunt in subiecto, rationem de subiecto prædicari est impossibile: etsi nomen prædicetur, ut iam ostensum est: at secundarum substantiarum nomen de subiecto prædicatur & ratio: ut hominis & animalis nomen & ratio, de quodam homine dicitur ut de subiecto. Non igitur secundæ substantiæ sunt in subiecto. Quare palam erit omni substantiæ conuenire, non esse in subiecto. Verum id non soli competit substantiæ, sed & earum differentijs: ut rationale de homine dicitur, ut de subiecto, pariter bipes, & in nullo est subiecto. Denique differentiarum substantialium non solum nomen dicitur de subiecto, sed & ipsa ratio: ut rationalis & bipedis ratio de homine dicitur ut de subiecto: non igitur differentiæ substantiales

sunt in subiecto. Accidentales tamen esse in subiecto nihil prohibet : vt album, nigrum, simum, aquilinum . Quare non erit proprium substantię non esse in subiecto . Ex hoc deprehendes textu differentias substantiales non esse simpliciter in genere substantię. Nec propriissimè dici substantias : quòd si dicerentur substantię , vt primę & secundę substantię , esset proprium substantię non esse in subiecto, quod tamen abnegat Philosophus . non tamen hinc sumas ansam ratiocinandi differentias substantiales accidentium numero & nomenclaturę ascribi debere , licet (vt inquit diuus Augustinus) videātur vim tenere qualitatis, quia non quid sit res, sed qualis sit demonstrant. Verum quādo à genere prima oritur differentia, & sic sequitur species, in accidentibus nō debet numerari : Atque ideo Aristoteles eam significatione quidem mixtam dixit , virtute autē inter vsias habendam decreuit . Eadem enim in hac inueniri pronuntiat, quę in cæteris substantijs reperiuntur, id est, cum subiecto posse, & nomen & rationem habere consimilem. Cum enim gressutum hominem dicimus , in subiecto idem, & vocabulum & eius rationem eandem possumus inuenire. Socrates enim & homo est & gressutus. Hęc ille . ¶ Argumentaberis: Omnis res aut accidens est, aut substantia: sed differentia substantialis est res , & non est accidens, igitur est substantia . minor probatur: differentia substantialis non est in subiecto, igitur non est accidens: consequentia est bona . Amplius , accidentia in substantiam subiecti veniunt : quęq; permutata

naturam substantiæ non perimunt. perempta autem differentia substantiali, necesse est id cuius est, interire: igitur nõ est accidens. ¶ Cõcludit Boëtius Aristoteli accedens, & cui propius accedere cupio, differentiam neque solum substantiam esse, neque solũ qualitatem: sed quod ex vtrisque cõficitur, substantialem qualitatem: quæ permanet in natura subiecti. atque ideo quoniam substantia participat, accidens nõ est: quoniã qualitate, à substantia relinquatur: sed quoddã medium inter substantiam & qualitatem: hæc ille. Ex Boëtij censura neganda erit maior argumenti propositi, licet passim concedatur. Sed omne quod est, aut est substantia, aut accidens, vel medium inter substantiam & accidens: & ita maiorem intelligẽdo proposita talis enuntiatio à veritate non abhorreret, sed consequentia facta denegaretur. ¶ Cõtendit quispiam probando substantiam esse in subiecto. Partes substantiæ, censentur substantiæ: & sunt in subiecto, cū sint in aliquo, scilicet in tota substantia, igitur substantia est in subiecto. ¶ Hanc diluit rationem Aristoteles, dicens: *Non uos conturbent substantiarum partes, quæ ita sunt in toto, quasi in subiecto sint: ne fortè cogamur eas non esse substantias consiteri. Non enim sic dicebantur esse, quæ sunt in subiecto: ut quasi partes essent in aliquo.* quamuis igitur substantiarum partes sint in toto, non tamen sunt in aliquo, vt in subiecto, cū de nullo accidentariè prædicetur. ¶ Inest autem substantiis & earũ differentijs uniuoce prædicari. Hac secunda cõmunitate docet Philosophus secundas substantias & earũ differentias de primis prædicari

vniuocé. Nam secundarum substantiarum species
 de primis vniuocé prædicantur: vt homo de So-
 crate & Platone, & de specie genus vniuocé præ-
 dicatur, igitur & de prima substantia genus vniu-
 cé prædicabitur. Nam quæcūq; de prædicato di-
 cuntur, eadē & de subiecto dicuntur. Sed genus,
 vt animal, de hoc prædicato homo dicitur, igitur
 & de subiecto illius. at prima substantia, vt Socra-
 tes, hominis est subiectū, igitur & animal de So-
 crate vniuocé dicitur. Amplius primæ substantiæ,
 rationem suscipiunt speciei & generis: vt Socra-
 tes est animal rationale mortale, & substantia ani-
 mata sensibilis. Si igitur species de prima substā-
 tia eadem ratione & definitione prædicetur, pa-
 riter & genus, merito secundæ substantiæ de pri-
 mis vniuocé dicuntur. Et non minus secundarū
 substantiarum genus dicitur vniuocé de specie &
 primis substantijs, q̃ de primis substantijs. Nam
 eadē animalis ratio, dicitur de homine & de So-
 crate: cum genus & de specie & indiuiduo prædi-
 cetur. Similiter secundarū substantiarum differen-
 tiæ vniuocé prædicantur de primis substantijs &
 earum speciebus. Nam rationem differentiarum,
 suscipiūt species & indiuidua: rationale enim nō
 alia ratione dicitur de homine & de aliquo homi-
 ne. Cū quæcūq; de prædicato dicūtur, eadem &
 de subiecto dicuntur. *¶ Omnis substantia videtur hoc*
aliquid significare. anteq̃ moliar hanc tertiā inter-
 pretari cōmunitatem: quidnam sibi velint hæc,
 significare hoc aliquid, significare quale quid, ostē-
 dā. *¶* Significare hoc aliquid, est notione absolu-
 ta & singulari substantiā significare: vt Socrates.

nam cum sit prima substantia, notione absoluta & singulari, solum Socratem significat. ¶ Significare quale quid, est notione absoluta & cōmuni substantiam significare, vt homo, animal, & quæcunq; secundæ substantiæ. ¶ Hic aduertendum est quod summa diligentia adnotauit Faber: cum res ipsas suis nominibus designamus, duplex qualitas reperitur. Quædam propria: & est singularis notio, qua res ipsa designatur. Et quædam cōmunis qualitas quæ & appellatiua: & est communis notio, vt speciei, generis. Notio singularis propria idcirco qualitas dicitur: quod id quod designatur, pariter & re & ratione singulare est. Altera communis & appellatiua: quod rebus ipsis quæ designantur re ipsa non conuenit (non enim re ipsa communes vniuersalesq; existunt) sed solum ipsis cōuenit ratione, cum eas vocamus appellamusq;. ¶ Sed forsitan dices, prima substantia, vt Plato, quale quid significat: nam absolutè substantiam notione singulari, quæ est qualitas significat, igitur quale quid significat. ¶ Non oportet illam notionem singularem significare quale quid: & consequentia proposita venit abneganda. quauis enim illa notio singularis sit qualitas, non tamen quale quid significat. Nam quale designat notionem communem. ¶ His vtcunq; prægustatis, suadere conabor omnem substantiam videri hoc aliquid significare. Prima substantia vt exploratū euadit, significat hoc aliquid. Nam cum Socratem aut aliquam indiuiduam substantiam nominamus, hoc aliquid significamus: cum talis substantia notione singulari & absoluta designa-

c. iij.

tur. Et si omnis substantia videatur hoc aliquid significare, non tamen omnis substantia significat hoc aliquid: cum ipsa secunda substantia non significet hoc aliquid: ipsa etenim de primis dicitur, & non est unum numero subiectum, ut prima substantia, cum dico homo, non hoc aliquid significavi: neque enim singulare est hominis nomen, sed illa species intra se plurima individua continet, & animal genus multas intra se species includit: quare secunda substantia non significat hoc aliquid, sed quale quid. Videtur autem secunda substantia hoc aliquid significare propter appellationis nuncupationisque figuram, quod quis quendam hominem, aut hominem, aut animal dicit. Dicit Boetius quoadmodum quantitas quantum significat, & qualitas quale: sic etiam substantia videtur hoc aliquid significare. ¶ Sed iniicitur dubitationis scrupulus, an secunda substantia in hunc modum quale significet quoadmodum album. ¶ Dubium dissolvit Philosophus, dicens: *Non autem simpliciter quale quid significat, quoadmodum album: nihil enim aliud significat album quam qualitatem: at species et genus circa substantiam qualitatem determinant, qualem enim quandam substantiam significant: hæc Philosophus.* Qualitas secundarum substantiarum in individuis est, quam vocant notionem communem absolutam: de ipsis enim predicatur. Et fit determinatio circa substantiam qualitatis, ut dicit Boetius, vel quod substantialis qualitas in genere & specie est: vel quod secundum quandam communionem subiectorum dicitur. Sed per se qualitas, ut album, neque ullius substantiam significat, neque ullam commu-

nionem sicut genus specierum suarum, & indi-
uiduorum species ostendit. ¶ *Inest autem substan-*
tijs nihil illis esse contrarium. hac quarta communi-
tate ostēdit substantijs nihil esse contrariū. Quid
enim primæ substantiæ, vt Socrati aut cuidā ho-
mini contrarium assignabis? nihil sanè. Secundis
pariter substantijs nihil est cōtrarium, vt homini
& animali. Propria enim contrarietas, est inter
formas accidentarias maximè in eodem genere
distantes, vt caliditas propriè contrariatur frigi-
ditati: ¶ Contendit quispiam, elementa, vt ignis
& aqua sunt substantiæ, & tamen contrariātur:
cum ab aqua suffocetur ignis. ¶ Inficiari oportet
elementa simpliciter esse cōtraria. Si tamen ab-
surdè dicātur contraria, id sanè intelligendū est
ipsa esse contraria per accidens, quatenus vnum
elementū, vt ignis habet qualitates aqueis quali-
tatibus contrarias. De hoc tamen negotio ple-
nius in Physicis disceptabitur. ¶ Non putat Philo-
sophus hanc cōmunitatē esse propriā substantijs:
quia nō solum cōpetit substantijs. quātitati enim
conuenit, vt bicubito, tricubito, denario, & huius-
modi quantitibus nihil est contrariū. ¶ Fortè
quis dicet, magnum paruo cōtrariari, igitur quā-
titati aliquid est contrariū. ¶ Verum ita ne sit an-
secus, nihil habet ratio momenti in cōmunitatē.
Si quis enim magnum, & parū quantitates con-
firmet, non tamen definitæ quantitates erunt.
Nam vt dicit Boëtius, Quantum sit magnum vel
quantū paruum, non definit qui loquitur. eodem
modo etiam in multis atq; paucis. Quare si quis
hæc quantitates esse dicat, indeterminatas inde

finitâsq; esse confitebitur. Dicit autē Aristoteles
 determinatæ quātitati nihil esse cōtrariū, vt duo-
 bus vel tribus, vel lineæ vel superficie. ¶ *Uidetur*
autem substantia nō suscipere magis & minus. Hac
 patefacit cōmunitate substantiā nō suscipere ma-
 gis nec minus, vt hæc substātia homo, nō em̃ ho-
 mo secundū idipsū quod est, est magis homo aut
 min⁹ homo q̃ fuit aut erit. Nā secūdū id quod est,
 aīa rationali ppēditur, quæ nihil intēfionis nihīlq;
 remissionis admittit in eo qđ est hominis substā-
 tia. Susciperet autē substātia secundū id ipsū quod
 est, magis & minus, si secundū suiipsius intēfionē
 remissionemq;, magis & minus diceretur: perin-
 de album secundū idipsum quod est, suscipit ma-
 gis & minus: potest enim aliquod corpus fieri al-
 tero albius, & minus albū: vt liliū lana est albius:
 lana autem lilio minus alba. cōtingit pariter idē
 corpus fieri magis album seipso q̃ prius fuerit, &
 interdum minus album dici potest. Quādo igitur
 quicq; suscipit magis & minus, seipso potest fieri
 prius & posterius, & altero magis & minus dici:
 vt innuit Philosophus. nihil enim officit vt albū
 magis album nunc sit quā prius seipso. Substā-
 tia autem vt homo non est magis aut minus ho-
 mo, aut seipso prius & posterius, aut altero homi-
 ne, & ita de reliquis quibuscunq; substātijs. Non
 igitur substātia suscipit magis & minus: sed non
 est proprium substātiæ: cū alijs à substātia com-
 petere possit. Circulus enim alio circulo nō erit
 magis circulus, aut minus, nec duplū magis du-
 plum nec minus. ¶ *Digladiaberis.* prius dictū est
 vnam substātiā magis, & alterā minus substā-

riam esse, vt prima substātia dicitur maxime substantia: & secundarum substantiarum species est magis substantia quā genus, igitur substantia suscipit magis & minus. ¶ Hanc diluit rationem Philosophus cum ita ait: *Dico autem, non quoniam substantia non est à substantia magis & minus substantia, (hoc enim dictum est quoniam est) sed quoniam unaquæq; substantia, hoc ipsum quod est, non dicitur magis & minus: hæc ille.* Non latet quēq; peritum, quendam hominem cum sit substantia magis esse substantiam ab homine, vt à specie, q̄ ab animali, & primam substantiam secunda magis esse: non tamen secundum idipsum quod est, sed q̄ re ipsa talis sit, qualis ratione designatur. Nā insinuat singularis, & re ipsa singularis est. Secūda autē substātia quāuis re ipsa nō sit vniuersalis, ratione tamen est vniuersalis. magis autem tale est quod re & ratione tale est, quā quod ratione solum. ¶ Maxime proprium substantiæ esse videtur: quod cum unum & idem numero sit, contrariorum susceptiuum esse. Hac sexta communitate ostendit substantiam esse contrariorum susceptible, quæ cum sit vna & eadem numero, id est re ipsa vna, contrarijs formis transmutari potest, vt homo sanus potest esse æger, & ex albo in nigrum decumbere. Nihil autem eorum quæ non sunt substantiæ re ipsa contrarijs transmutari potest: velut color qui est vnus & idem numero non dicitur albus & niger. Nec actio vna & eadem numero, aliquādo studiosa, & aliquādo mala. & ita in reliquis quæ substātiæ rationem nō sortiuntur. Quare proprium primo substantiæ

dici poterit, cum soli cōpetat substantiæ, posse ad contraria decūbere, & nō omni. nam cælo cōtrarietas copulari nō potest, aliter corruptioni subijceretur. ¶ Insurges: Oratio contrariorū est susceptible: vt ista, Socrates sedet, quæ potest esse vera & falsa, & non est substantia: igitur non sola substantia contrariorū est susceptible. ¶ Hanc facile est ex Philosopho diluere rationem. *si quis existimet orationem suscipere contraria: differenter tamen admodū, & longe aliter q̄ substantia. Nam cum ipsa substantia ex uno contrariorū in aliud deuergit, mutatur. vt aqua cū ex frigido in calidum transmutatur: hæc enim mutatio fieri non potest nisi alteretur aqua à frigido in calidū. Pariter homo ex sanitate prolapsus in ægritudinem, mutatur. Oratio autē ex vero in falsum deficiens persistit immobilis. vt hæc oratio, Socrates sedet, Socrate sedente aut surgente nō mutatur: fit enim eodē significatu immota, quā res ipsa scilicet Socrates mutetur, cum ex sedente fit surgens. Quauis igitur oratio susciperet contraria, non tamen eo modo quo & ipsa substantia. Nam substantia secundum sui mutationem est susceptiua contrariorū, non autē oratio. ¶ Secundo. si quis putet orationē suscipere contraria, hallucinatur plurimū, & à uero exorbitat. Non enim oratio susceptible est cōtrariorum, quia cū nunc uera, nunc falsa sit, aliquid suscipiat: sed uera falsaq; dicitur, quòd circa aliud, scilicet rem ipsam cuius est propositio, facta sit quædā passio & mutatio. Ex eo enim oratio vera vel falsa censetur, quia res ipsa est vel nō est. nō autē quia cōtraria recipit. Nam satis notum euadit hanc esse*

veram, Socrates sedet, eo sedente, quia ita est ut talis propositio denuntiat: non autē per quandā acquisitiuā veritatem. & hanc dici falsam, Socrates est Plato: quia nō ita est ut significat, nō autē per quandā aduentitiā falsitatē, quā somniant animi lippitudine laborātes. ¶ Surrepit ambiguitas: Quānā sunt substātiæ contrariorū susceptiuae: & quē à contrariorū susceptione reijciuntur? Nam aliquæ non possunt suscipere contraria, ut ignis calidus, nunq̃ à frigore transmutabitur, & aqua humida nunq̃ efficietur sicca. ¶ Dicendum est substātiās ea posse cōtraria suscipere, quæ nō sunt ab exortu naturæ eis insita, ut cū nō fuerit hominis naturę insita albedo, poterit homo suscipere albedinē & nigredinē: illæ autē substātiæ insitā habētes à natura quandā qualitātē, oppositā suscipere nō possunt: ut ignis cū à natura sit calidus, frigiditatem suscipere nequit, nec aqua (cuius naturæ substātiæq̃ humiditas immutabiliter adheret) à siccitate trāsmutari potest. Nihil enim suscipit quicquid illi substācialiter adest. Suscipere enim dicimus aliquid, ut ait Boëtius, de rebus extrinsecus positis & præter substantiā constitutis. Quoniā igitur in substantia ignis calidū est, ignis calorem non suscipit. Quocirca neq̃ est ignis caloris susceptibilis, neq̃ frigoris. Porro, calor ignis & humiditas aquæ nō solum qualitates dicuntur, sed etiam substantiales ignis & aquæ qualitates. Quare dicendū est Philosophum non de ijs contrarijs loqui quæ substācialiter insunt: sed de ijs quæ potest suscipere vnaquæq̃ substantia, id est quod potest extrinsecus exhiberi: hæc ille. Adno-

tare licebit ex Boëtio qualitātū aliquas esse substā-
 tiales, quæ à natura alicui substantiæ sunt insitæ.
 Et aliquas accidentarias, quæ ab exortu naturæ
 cū insitæ non fuerint substantiæ, possunt adesse
 & abesse. ¶ Dubitatiūcula. Qualiter homo & ani-
 mal possunt recipere contrarias? Non enim in eo
 q̄ de pluribus prædicatur, contrariorū suscepti-
 ua sunt: vt animal in eo q̄ de speciebus dicitur:
 neq; sapiens est, neq; insipiēs: & homo in eo q̄ de
 indiuiduis dicitur, neq; sanus neq; æger est: quos
 nam igitur pacto recipere possunt contraria?
 ¶ Duobus modis homo & animal spectatur, vno
 q̄ de pluribus prædicantur: & eo non censentur
 cōtrariorum susceptiua. Altero q̄ substātiæ sunt,
 & q̄ indiuiduis substātijs præsumt, & hoc modo
 possunt recipere contraria.

¶ De prædicamento quātitatis, Scholia.



Ilucidato omniū prædicamētorum
 nobilissimo, quod ei propius acce-
 dere videbitur, huic loco subscribe-
 mus: prius q̄ tamē quid de quāti-
 te sentiat Aristoteles explicemus,
 ex dubij agitatione vt verum ipsum promptius
 pateat, intueri satagemus. An erat rationi con-
 sentaneum post substātię discussionem, de quāti-
 tate potius quàm qualitate differere? ¶ Boëtius
 hanc tribus rationibus ambiguitatem diluit.
 ¶ Prima. Omnia quæcunq; sunt, simul atq; sunt,
 in numerum cadunt: omnis enim res, aut est vna
 aut plures: vnum vero vel plures, quātitatis scien-
 tia colliguntur. Sed non omnis res simul atque
 est, aliquam accipit qualitatem. Ipsa enim mate-

ria sub quantitatis quidem principium cadit, quæ una est: sub qualitate vero minime. ipsa enim est interim à cunctis qualitatibus absoluta: superaddita vero forma, quadam afficitur qualitate. Per se autem numero quidem una est, qualitate vero nulla. Quocirca si res omnis simul atque est, cadit in numerum, non autem omnis res mox ut est, statim suscipiet qualitatem, recte prius de quantitate proposuit. ¶ Vitaturus prolixitatem hoc utere ratiocinio: Omnis res simul atque est, cadit in numerum, non autem omnis res, mox ut est, statim suscipiet qualitatem, de rebus loquendo sensibus: igitur de quantitate prius determinauit quam qualitate. ¶ Secunda. Omne corpus ut sit, tribus dimensionibus constat: longitudine, latitudine, altitudine. ut vero sit corpus cum qualitate: tunc erit aut album, aut nigrum, aut quodlibet aliud. Et quoniam prius est esse corpus, potest vero esse corpus album: prius erit corpori tribus constare dimensionibus quam esse album: sed tres dimensiones & numero, & continuatione spatij quantitates sunt. longitudo enim & latitudo & altitudo in quantitatibus numerantur: album vero qualitatis est. Quocirca si prius est, ex tribus constare dimensionibus quam esse album: prior erit qualitate quantitas. Ne lato quidem vngue ab hac deflectit sententia Diuus August. dicens, accidentium omnium primum esse quantum, nec sine causa: nam cum aliquid viderimus, id necesse est quantum sit estimare. ¶ Tertia. Quantitas plura habet substantiæ cõsimilia. Nam quemadmodum substantiæ nihil est contrarium, & substantia non reci-

pit magis & minus. Qualitas vero & contraria
 fuscipit, vt album & nigrum: & magis & minus,
 vt candidius & nigrius. Quodd si substantiæ simi-
 lior quantitas est: recte post substantiam de quā-
 titate proposuit. ¶ *Quantitatis autem aliud est con-*
tinuum, aliud discretum. & aliud quidem ex habentibus
positionem ad seinuicem in ipsis partibus con-
stat: aliud autem ex non habentibus positionem.

Diuidit Philosophus quātitatem in continuū &
 discretum. demum in quātum constans partibus
 positionem habentibus, & in quātum nō confe-
 ctum partibus positionem habentibus. ¶ Videtur
 ostendere quātitatem esse ipsum continuum aut
 discretum. quod si ita eueniat, substantiā conti-
 nuam ab ipsa quātitate non discrepare profiteri
 licebit, quod est absurdum. Quare ne lector opti-
 mus hoc hallucinetur ratiocinio, adnotare licebit
 nomine quanti, quātitatem intelligi. Nam concre-
 tis denominatiuisq; huius prædicamēti loco ab-
 stractorum seu denominantiū vtimur: vt lineam
 & quantā & magnā dicimus: hanc tamen enun-
 tiationem loco istius, linea est quātitas, seu linea
 est magnitudo sumimus: & potius dicendū est,
 linea est quantitas q̄ linea est quāta. Cum autem
 dicimus lineā esse quantam, intelligi volunt il-
 lud quantū esse formale. quod conuersim se ha-
 bet cum eo quod est per se habere partem extra
 partem, cuius natura soli cōpetit quātitati. Quan-
 tum autē formale à quātitate nō dissidet. ¶ Cum
 autem dicitur homo est magnus, homo est quā-
 tus: non idem volumus magno & paruo, vt ma-
 gnitudo & quātitas. cum à magnitudine dicatur

homo magnus:& quātus à quātitate,vt ab albedine albus. hoc quātum vocant nōnulli quātum materiale. Et conuertitur cū eo quod est habere quātitatē tanq̃ accidens eius, & solū de eo denominatiue dici potest quod à quātitate denominatur,vt de Socrate magno aut paruo diciť. ¶ Aduerte diligēter magnū,quātum,& cōplura huius prædicamenti vocabula bifariam sumi posse:scilicet vt denominatiua voce tātū, & vt re vocēq; denominatiua. Cum denominatiua sunt voce tātum,de solis dicuntur quātitatibus:cū vero re & voce denominatiua sunt,de substantia dicuntur:hinc bicubitum,interdū quātitatē duorū cubitorū intelligimus:interdū dicitur substantia huiusmodi quātitatē habens. Similiter homo nōnunq̃ conceditur corpus,vt corpus sit in hoc genere,& talis ppositio huic respōdet:homo habet longitudinē latitudinē & altitudinē. Hāc assuetā locutionē æmulātur Astronomi qui cēlos,corpora,magnitudinēsq; appellant cælestes:q̃ lōgitudinem,latitudinem,crassitiēmq; in se contineant. Quare perspicuum erit magnitudinem & corpus re pariter & voce nunc principale dici, nunc vero sola voce principale.nec dissimile videbitur de binario, ternario & reliquis huiusmodi:quæ nunc numerantia,nunc numerata etiā ab Aristoteli dici solent. Numerantia,numerīq; numerātes dicūtur, cum omnino principalia sunt:numerata vero,cū sola voce sunt principalia. At ea quæ re & voce talia sunt,proprie sunt talia:quæ vero altero tantum talia,quodāmodo iam improprie & communiter alia dicuntur.Ex his manifestū euadet,quónam
f.j.

pacto quantum de ipsa quantitate dici potest.

¶ Adnotatu non indignum putabitur ostendere quid quātum, & quotupliciter dicitur: quonā etiā modo quātitas est diuisibilis. quāuis lōge vberior & plenior de his habenda sit in Metaphysicis disceptatio. Lectorē tamen olfecisse & forsan miracum quadā voluptate nō pœnitebit. ¶ Quantum id dicitur (vt scribit Philosoph⁹ decimotertio cap. 5. Metaphysicæ) quod diuisibile est in ea quæ insunt: quorum utrūq; vel vnūquodq;, vnū quid & hoc aliquid aptū est esse. multitudo igitur quātū est quoddam, si numerabilis sit: magnitudo etiam quantum est quoddā, si mensurabilis sit. ¶ Ex eodem Philosophi fonte diducimus quantum in id quod in nō continua (vt multitudo) diuidi potest: & in id quod in continua dissecari valet, vt magnitudo. ¶ Plenius adnotare licebit, bifariam aliquid dici quātum, per se scilicet & per accidens. Per se quidē, cum ex se habet quātitatem, vel (vt alijs placet) quod habet partē extra partem, quocunq; extraneo dimoto. vt linea, superficies. Illud est quātum per accidens, quod alterius præsidio fit quantum. Vel quod partem habet extra partem per quidpiam sibi extrinsecū: vt musicū, eodem quinto Metaph. cap. & album, eo quod illud cui insunt, quantum quid est. ¶ Quantitas id dicitur quod per se in partes diducibile est: vt magnitudo, linea. Quantitatis enim per se est diuisio 6. Physicorū. Partes intelligunt doctissimi extensionis, successionis & discretionis. Per se, substantiā & qualitatem à quantitate disiungit. Nam etsi homo in partes magnitudinis partiri possit: id tamē

non per se est, sed per alterum, quia videlicet talis magnitudo in se lōgitudinem, latitudinem & profunditatem seu altitudinē continet. Qualitas pariter vt albedo; nigredo, quāuis per se habeat partes intensiuas, non tamen est quantitas. Nam solū ratione quātitatis, vt superficiē aut alterius, album dicimus esse quantū, aut albedinē quātam. ¶ Extensiones sunt, longitudo, latitudo, altitudo quæ & crassities & profundū dicitur. Philoso. in eodem cap. dicit eā magnitudinem quæ quidem ad vnū continua est, esse longitudinem: quæ vero ad duo, latitudo censetur: quæ ad tria, profunditas. Horum longitudo, linea: Latitudo, superficies: Profunditas, corpus est. Addubitarēt quispiā si nam longitudo possit esse sine latitudine, & id videtur sentire Arist. cū dicit quandā magnitudinem ad vnū continuā esse longitudinē. At in aduersam partē protrahes argumentū, Nam omnis longitudo in aliqua est superficie, quare non erit longitudo sine latitudine. ¶ Diuus Aug. huic respondet dubitationi, dicens omīssa latitudine quēpiam posse emetiri longitudinē mēsuræ subiectā quæ græce γραμμὴ dicitur. Non quòd sit longitudo aliqua, quæ careat latitudine, sed quòd solum quis metiens longitudinem γραμμὴν metiri dicitur. E mensa vero cum longitudine latitudo, dicitur ἐπιφάνεια siue superficies. Si autem & altitudo fuerit mensuræ sociata, corpus cuncta perficiunt. Successiones, lationes, & tempora: discretiones, numeri, vt binarius, ternarius & huiusmodi. & ad has solas partes applicanda est quantitatis diffinitio. Nam si de partibus es
f.ij.

sentialibus, aut partibus secundum intensiorem
fiet sermo, laberemur in errorem, & plurimum
ab Aristo. exorbitaremus. Homo enim est per se
sectilis in partes coessentialia, in animam scilicet &
corpus: & tamen non est quantitas. nam consubstantia
les partes non quantitatem, sed substantiam consti-
tuunt. Albedo pariter per se in partes intensiorem
diducibilis est, non tamen censetur quantitas. Par-
tes enim illae non cōpingunt quantitatem, sed quali-
tatem. Erit igitur in sola quantitate extensio, suc-
cessio, & discretio. Et extensio soli quantitati con-
tinuē aptatur, ut lineae, superficiei & corpori: Suc-
cessio, temporis: Discretio, numeris. ¶ Quantitas
continua ea est, cuius partes ad terminum com-
munem copulantur. Partes intelligimus extensionis
aut successiois: ut linea. Nam lineae partes aliquo
termino cōmuni cōnectūtur & iungūtur, scilicet
puncto, ut sit A B linea, & c punctum cogitatu &
mente signatum. Lineae datae partes A C & C B
eodē c puncto copulantur, quod est terminus par-
tis A C & terminus partis C B. Est enim A C finis,
& exordiū partis C B. Similiter superficies, ut dicit
Philo. est q̄titas cuius ptes termino cōmuni, scili-
cet linea cōiungunt, ut data una sup̄ficie A B D F,
pars una sit A D, C E. & altera C E, B F, tunc verum
est dicere, illas duas partes termino cōmuni, scili-
cet linea C E coniungi. Superficies plana (quae est
breuissima unius lineae ad aliam extensio, teste Eu-
clide in elementis primi libri) habet & recipit il-
las lineas ad suas extremitates, & hoc si fuerit
Polygonia, id est multangula & recta. neq; huius-
modi superficiem duae unquam lineae concludēt, ut

A C B

A C B

D E F

scribit Euclides in vltima petitione elemētorum primi libri. Sed superficies plana circularis bene concluditur vnica linea quæ dicitur circunferentia, vt patet de circulo. ¶ Partes temporis (quæ præteritum & futurū sunt) præfenti atomo, hoc est quodam instanti præfenti indiuisibili, quod nunc aliquando vocant, copulantur. Nam quemadmodum partes lineæ punctis aut puncto iunguntur, ita & partes temporis instanti seu nunc connectuntur, vt dicit Philosophus 4. physices, cap. 13. Et hæc temporis partes dicuntur partes successionis: lineæ vero partes permanentes.

¶ Quantitas discreta, est quantitas cuius partes nullo termino communi copulantur: vt septenarius. illius enim partes quæ sunt quaternarius & ternarius, nullo communi término iunguntur, sed semper discretæ manent: & hæc quantitas seu numerus, est in anima rationali. Nec mirari oportet si vis numerandi soli detur homini. Nam solum in anima rationali est numerus, à quo dicitur homo numerans, & illa quibus suos numeros applicat, dicuntur numerata, vt sex homines quib⁹ admouetur senarius, res numeratæ seu numerus numeratus appellantur. perinde atq; pannus cui apte applicatur vlna, mēsurata panni vlna dicitur: dimensio vero quæ applicatur, est vlna dimetiens. Et quemadmodum à visione alicuius coloris, ille color denominatur visus, vt à forma accidentaria, qua perempta non amplius color percipitur visus: ita à senario hominum animam inhabitante, sex homines denominantur numerati: quo dimoto sex minime dicerentur: & mult.

titudinem rerum à numero formali denomina-
 tam vocant numerum materiale, seu numera-
 tum, de quo loquitur Philosoph⁹ secūdo de Ani-
 ma, dicens numerum esse sensibile commune. Et
 hi numeri formales dicuntur discretiones per se
 cum ab illis res denominentur discretæ. Et sunt
 intrinsecæ animæ formæ: non quidem essentielles
 seu substantiales, sed accidentariæ: à quibus ani-
 ma dicitur numerans. Hinc Plato diffiniebat ani-
 mam, dicens ipsam esse numerum mouentem
 se, & quarto Physic. Philosophus & Commenta.
 vocant animam numerum numeratē. ¶ Vnde
 sunt numeratīa, sunt numerata, sunt & numeri.
 Numerantia sunt animæ numeros suos rebus ap-
 plicantes. Numerata quibus anima suos nume-
 ros accommodè applicat. Numeri sunt rationes
 discretæ seu instrumenta numerandi: sicut visio
 est instrumentum ad quidpiam visu percipiendū.
 Anima enim suis notionibus vtitur vt quibusdā
 instrumentis. ¶ Non eunt inficias Metaphysici
 numerum formalem esse quantitatem indiuisibi-
 lem formaliter denominantem aliqua dici arith-
 meticè plura, quem exactè diiudicant proficisci
 ab vnitatibus, quæ discretionem habent à nume-
 ris insectilib⁹. De his meminit Philosophus Physi-
 quarto cap. 12. dicens eundem esse numerum
 centum hominum & centum equorum, licet nu-
 merata sint diuersa: sicut enim eadem vlna po-
 test applicari primo vni panno, & deinde alteri,
 & erit vterque eadem mensura mensuratus. Ita
 idem numerus potest applicari diuersis rebus nu-
 meratis, vt denarius decem hominib⁹, & decem

equis, & erit idem numerus decem hominum & decem equorum. Et si nō fuerit vlna panno applicata, nō dicitur pānus mensuratus: quāuis eādem contineat, atq; cum ei applicabitur, quātitatem. Ita si nō fuerit ab anima numerus applicatus reb⁹ numeratis, nō dicētur duę, neq; tres, neq; alio quoq; numero numeratę, q̄uis eandē ac quę numerātur habeāt multitudinē: hęc dicibilia, binarius, ternarius, significāt abstractē numerū formalem: quorū denominatiua, duo, tria, pro rebus numeratis accipiūtur, animę numerū designādo. ¶ Contendet quispiā, probādo talem numerū formale ab anima nō distingui. Fertur ille numerus esse numerans: quo modo igitur cū numerus numerās dicatur, & anima numerās, anima nō dicitur numerus numerās. ¶ Bifariam aliquid numerans dicit. Principale, quod rebus rationē numerādi applicat: Instrumentū quod applicatur. ideo numerus formalis seu quātitas discreta, numerans dicitur vt instrumentum. Anima autem dicitur numerans vt principale: perinde ac homo palmo metiens, mensurānsq; dicitur, & palmus, palmarisq; quantitas mensurans: sed hęc vt instrumentum, illę vero vt principale, non tamen homo etsi mensurans sit etiam præcipuum, vnq̄ dicitur quātitas mensurās, sed mensurans duntaxat. Ita quoq; anima præcipuū numerans, neq; vnq̄ dici debet numerus numerās, vt dicit Faber qui in ea est opinione, sed vt hic solus palm⁹ quātitas mēsurās dicitur: ita & illic solus numerus animę & ratio ipsa, intimūque numerandi instrumentum numerus numerans appellatur.

¶ Cum in tota numerorū serie vnitatē seu monadē conspiciam⁹ esse principium, fontem & radicē sine qua numerus stabiliri & perfici nequit: dicere necesse est veros numeros ex vnitatib⁹ coaceruari & cōponi, non tamen asserendū est vnicā in animo sufficere vnitatem ad numerandum. Si enim videar diutule & plus æquo obstrepere, dicendo vnum, vnum, vnum: ita verbosē vnitatē applicādo, nihil aliud mihi refero, q̄ vnūquodq; eorum cui applicui, esse vnū, & ita incōposite applico. Cum vero hanc numerādi seriem obseruaturus, ita applico vnū, duo, tria, quatuor, quinque, & ita de singulis, cōposite applico: & quot ea sint, facilius agnosco. Qui enim dicit duo, vnitatē vnitati adiunctā cōposite applicat: qui tria, tres vnitates composite applicat. Nihil enim aliud est binarius quā duarum vnitatum cōpositio, & ternarius trium. Et secunda vnitas primæ adiecta binarium primam numeri speciem conficit: & duabus primis tertia adueniens, ternarium creat: & in hunc modum prioribus aliā vnitatem adiiciendo multas numerorum species cōponeres. Noua enim vnitas alijs adiuncta nouā speciem effingeret, nouūmq; numerū cōstitueret. Est enī vnitas omnium numerorū effectrix & creatrix, quā dicunt nonnulli emanare propinquius à quātitate cōtinua. Nam ex diuisione continui causat⁹ numerus, tertio Physi. igitur ex diductione numeri progignetur vnitas eiusdē numeri formatrix.

¶ Obrepat ambiguitas. Cum ex vnitatum varietate diuersi cōsistentur numeri, nōne prima, secunda, & tertia vnitas diuersæ sunt naturæ? & nu

meri, vt binarius, ternarius, quaternarius: ¶ Non licet inficiari vnā cum altera vnitatem eiūsdē esse naturā, nec fateri iuuabit omnem vnitatem omni vnitati, & omnem binariū binario esse affinem & assimilem. ¶ Sed hāc diluere oportet ambiguitatem, an eodē modo se habeat vnitas priorib⁹ adueniēs, vti albedo albedini aduenit. Quod si nullum posueris discrimen, cur vnitas prioribus adueniēs nouam creat speciem: albedo vero albedini adiecta, non efficit nouam coloris speciem? ¶ Annotationes Iacobi Fabri Philosophorū optimi, scitu nō indignas, & his scrupis diluendis plurimum conferentes huc ascitas voluimus. ¶ Specierum (vt inquit) quædam sunt quas sola rationū diuersitas parit: vt data magnitudine *A H* indefinitę quantitatis: cuius portio *A B* sit quantitas digitalis, *A C* palmi, *A D* pedanea, *A E* cubitalis, *A F* bicubitalis, & *A G*, tricubitalis. Scrutandū erit an quantitates *A B*, *A C*, *A D*, *A E*, *A F*, & *A G*, sint eiūsdem naturę. Quod si quis neget, ratio oppositum suadebit. Sunt eiūsdem totius partes, haud secus ac partes albedinis eiūsdem totius. Deinde percontaberis, si nam digitus, palmus, pedaneum, cubitus, bicubitus, tricubitus sint vna species q̃titatis, an diuersę? ¶ Dices esse diuersas, non quia res significant diuersarum naturarum: significant enim q̃titates *A B*, *A C*, *A D*, *A E*, *A F*, & *A G*, quę eiūsdem mōstratę sunt esse naturę: sed sola ratione, diuersę sunt: hunc in modum binarius, ternarius, & quaternarius, species diuersę erunt, etsi vnitates ex quibus constantur eiūsdē sint naturę: diuersę tamen sunt numerandi ra-

A
B
C
D
E
F
G
H

tiones, & diuersa numerandi instrumēta animæ,
 binarius & ternarius . ¶ Aliæ sunt species, quarū
 non sola ratio sed & pariter rerum diuersitas, di-
 uersitatem parit : vt albedo & nigredo: & huius-
 modi species maximè diuersæ sunt. Sunt enim re-
 & ratione diuersæ, primæ autem minus diuersæ:
 nā sola rationis diuersitate discriminātur. ¶ Sci-
 scitaberis an binarius, ternarius, quaternari⁹ vnū
 sint. ¶ Respōsio. Quilibet numerus in anima, vnū
 est: non continuum nec intēsum sed discretum:
 quēadmodum vna linea, vna magnitudo, vnum
 est continuum, & albedo vnum intensum . Vni-
 tas autem vnitati adiuncta non extendit, nec in-
 tendit, sed discernit, discretūmq; reddit numerū.
 Est enim vnitas extra vnitatem secundū discre-
 tionem, sicut magnitudo extra magnitudinem
 secundum dimētionem, & qualitatis gradus ex-
 tra gradum secundum intensiōem. ¶ Sed dicet
 quispiam, Si numerus sit vnum, nōne numerus
 erit vnitas: quod tamen est absōnum. ¶ Dices, nō
 oportere numerū esse vnitatem, quīs sit vnum
 discretū. Est enim vnitas infectilis & indiuidua,
 & simplex numerādi principiū . Omnis autē nu-
 merus diuiduus est: sed ab vnitatem numerus de-
 nominatur vnus, & vna numerandi ratio. ¶ Nam
 perspectū habes qui veri & formales sint nume-
 ri, vbi sint, quod non sufficiat vnitas, quo pacto
 numerorū species cōstituūtur: & quo modo sint
 diuersæ, & quo modo numerus vnū dicatur. Nūc
 facile est intueri nullā q̄ritatē continuam esse di-
 scretā, nullā pariter substantiā esse q̄ritatē: non
 enim aliter rerū dimēsiōes sunt in materia atq;

colores, aliaq; rerum formę. Deniq; nulla q̃titas continua aut discreta est qualitas, quę sit habitus, aut dispositio: naturalis potētia, aut impotentia: passio, aut passibilis qualitas. Si enim à substantia ipsa q̃titas non esset discreta, nec à qualitate: multa inaudita & absurda, & quę Aristoteli refragarentur in apertum prosilirent. Futura tamen est de his vberior in Metaphysica disceptatio. ¶ Scrutaberis, an re ipsa quātitates cum cōtinuæ tum discretæ ijs qualitativibus, quę figurę & formę appellantur, coincident. ¶ Respondetur illas quantitates non esse re discretas ab illis qualitativibus: vt trigonus, tetragonus, pentagonus in Arithmeticis, nihil aliud sunt re ipsa, nisi numeri illi qui huiusmodi formas admittunt: & triangulus, quadratum, circulus, & huiusmodi in Geometricis, nihil aliud re ipsa sunt q̃ plana & superficies illę, quę ex sua terminatione huiusmodi figuras exprimunt. ¶ His commodius dilucidatis ad primā quantitatis partitionem enodandam accingemur. *Quantitatum alia continua, & alia discreta. Est autem discreta quantitas, ut numerus & oratio: partium enim numeri nullus est communis terminus quo partes iunguntur: ut denarii partes, quinque scilicet & quinque, nullo termino communi copulantur, sed discretę manent. Partes etiam orationis nullo termino communi uinciuntur: non enim est communis terminus ad quem syllabę copulentur, sed unaquęq; diuisa est. Continua, ut linea, superficies, corpus, tempus, locus. Lineę siquidem partes punctis copulantur, quę sunt termini communes. Terminus enim com-*

munis, vt hoc in loco sumitur, est qui cum finit aut inchoat, duabus partibus conuenit: vni vt finis, & alteri vt initium : vt punctum quod adeo paruū est, vt in partes secari non possit. ¶ Si quis diuidat lineam quæ est longitudo sine latitudine, duas in vtraq; diuisione lineas facit: & vtriusq; ex diuisione lineæ, singula in extremitatibus puncta redduntur, lineæ enim termini puncta sunt. Quocirca, cum illa linea diuisa non esset, vtraq; puncta quæ in vtriusq; linearum capitibus post diuisionem apparent, simul antea fuisse intelliguntur, quæ sunt in diuisione separata: hæc Boëtius. ¶ Tempus quantitatis continuæ speciebus adiicitur: quod in spatio, id est in longitudine & in breuitate consideratur: & partes temporis, præteritū scilicet & futurum, præsentī tēpore, copulantur: quod præteriti est finis, & futuri initium: loci pariter partes, termino communi connectuntur: locum enim quædam, partes corporis obtinent, quæ communi termino iunguntur: ergo & loci partes quæ singulas corporis partes obtinēt, ad eundem communem terminum copulantur, ad quem & corporis partes. Si enim cunctæ partes corporis locum aliquem tenēt, & qui circa corpus est locus, per omne corporis spatiū partēsque diffunditur: omnes corporis partes à loci partibus occupabuntur: quod si ita est, qui communis terminus coniungebat corporis partes, idem & loci partes coniunget. Erit igitur locus quantitas continua perinde ac corpus. ¶ Secūda quantitatis dissectio. Quātitatum quædam constāt partibus positionem in continuo habentibus: quædam uero partibus coalescunt minimè positionem in cons

tinuo habentibus. Tria sunt obseruāda vt constet quantitas partibus positionem in continuo habentibus. Primum, vt partes eius alicubi sitæ sint, hoc est vbinam vnaquæq; illarum sita sit dicere possimus, sursum aut deorsum, ante & post, dextrorsum, sinistrorsum, quæ differentia positionis & situs dicuntur: hoc autem intelligēdum est de partibus, in quas cōtinuum diuiditur, vt duabus medietatib⁹, tribus tertijs, quatuor quartis, & ita deinceps. Quare qualitatis intēsa partes, non dicuntur habere positionem in cōtinuo: nihil enim de earum vnaquaq; assignabile est vbi ipsa sit: cū non sint extra se secundum situm. ¶ Secundū, vt partes huiusmodi sint continuæ: quare numerus non constituitur partibus positionem habētibus: non enim numeri partes compingunt vnum cōtinuum, sed discretionem efficiunt. ¶ Tertium, vt partes sint permanentes, quare tempus non cōstat partibus adinuicem positionem habentibus. Sēper enim volubilitate & veloci agitatione torquetur & aquæ decurrētis more fluit & labitur. Cum autem exploratū habemus, hæc tria cuipiā quantitati competere, eam coniicimus constare partibus positionem in continuo habentibus: vt linea, superficies, corpus: partes quippe lineæ alicubi sunt sitæ, vt perfacile data una linea intueri possumus: denique illius partes sunt continuæ & resides, nec difficile est monstrare ad quam partem caput alterius partis extremitasq; coniungitur, & facile est suadere illius partes esse resides & permanentes, non enim pereunt: sed in loco in quo sunt, permanent. Oratio autem voce efficta

(de qua hoc in loco fit mentio)& numerus, non constant partibus positionem in cōtinuo habentibus. Nemo enim monstrare potest partes orationis aut numeri, alicubi esse sitas, aut cum aliquo esse copulatas. ¶ Digladiabitur quispiam: Partiū tēporis vna prior est, & altera posterior: pariter partium numeri & orationis, igitur tempus, numerus, & oratio, videntur habere partes positionem in continuo habentes. ¶ Hāc rationemculam diluit Philosophus, dicēs temporis partes habere ordinem, cum aliquid in tempore alio sit prius & aliquid posterius: nō tamen positionē recipiunt. Nam antērius & posterius hic, sitū & positionem non admittūt, sed ordinem: vt in tēpore prima medietas secunda est prior. Et in numero prius est vnū duobus, & duo tribus, ordine quodā numerandi. In tēpore vero est ordo successio- nis, vt præsens succedit prius, & futurum poste- rius. Et in oratione cōiicimus ordinē prolationis: quia syllabæ eius modo longū habent tēpus, cum productæ fuerint: modo breue, cum fuerint cor- reptæ. ¶ Contendes, probando numerū dici quan- titatem continuam. Partes siquidem numeri co- pulantur ad terminum communem, igitur nu- merus est quantitas continua: antecedens pro- batur, Lineæ bipedaneæ partes copulantur ad terminum communem, cum talis binarium cō- tinui importat, cuius partes vinciuntur puncto, & linea bipedanea est numerus, cum sit ab ani- ma secundum suas partes numerata, igitur nu- merus est quantitas continua. ¶ Ostendit ratio nihil prohibere numerū continuorum, esse quan-

titatem continuam: qui numerans non censetur, sed numeratus: cuius ratio non spectat ad quantitatem discretam, sed continuam: vt bipedanea linea, binarium continui importat, cuius partes copulantur ad punctum: ita dicendum est de tripedanea superficie. Et quâuis numeri numerati vt partes continui copulentur ad terminum cōmunem, id solum fit per accidens: cum id minime fiat ea ratione qua est numerus, sed qua est continuum, aut continui numerus: vt hæc dicibilia pedale, bipedale, tripedale: aut si mauis pedaneum, bipedaneum, tripedaneum, numerum explicantia, non sunt quantitatis discretæ, sed continuæ species, ad lineã, superficiem, & corpus indifferentes, vt scitè adnotauit Clichtroueus. Est enim pedale seu pedaneum cōtinuum, vnius pedis extensionem habens: Bipedaneum, duorum: Tripedaneum, trium. idem est dicendum de bicubito, tricubito. ¶ Similis te potest admiratio pulsare de ipsius temporis ratione & natura. Cū tempus quarto Physicorum, sit numerus motus secundum prius & posterius, quare potius quantitatis continuæ species censetur q̃ discretæ. Attribuit tamen Philosophus. 4. physico. cap. 12. ipsi tempori continui & discreti rationem. Quatenus inquit est continuum, est lōgum & breue, quatenus numerus, multū & paucum. Et in eodē cap. & 5. metaphy. cap. 13. probat & tempus & motum esse quanta per accidēs: quia inquit magnitudinem consequitur motus, & tempus motum, ex eo sunt quanta & continua & diuisibilia, sunt enim passionēs eorum quæ per se sunt

diuisibilia, motus est passio, non eius quod mouetur, sed quo aliquid mouetur, videlicet magnitudine, cuius est affectus. at magnitudo est quanta, motus igitur est quātus, verum cum tempus sequatur motum, si motus sit quantus, & tempus erit quantum. ¶ Dilutio. Tempus, est numerus cōtinui qui à numero non dissidet: & ipse eiúsque ratio ad quantitatem cōtinuam pertinet. Numerus enim continuorum dicitur: cuius partes copulantur ad terminum cōmunem, vt tempus biduum, triduum, bimus, trimus, quadriennis, quinquēnis numerum continui importat: cuius partes, dies videlicet & anni, atamo, insectilique temporis copulātur. Et eorum quæ numero censentur, quædam manifestè numerū, vt biduum duos dies, triduū tres, bimus annos duos, trimus tres, quadriennis quatuor: & quædam occultè important, vt dies horas quatuor & viginti, annus menses duodecim, olympias annos quatuor, lustrum quinque, sæculum centum. Et licet tempus dicatur numerus motus, non tamē per se & sine adiectione censetur numerus: modo numerus per se pro numero discretorum accipi solet: quare tempus non dicitur species quātitatis discretæ. Nul lum etenim hoc in loco recipimus numerum, nisi si numerū per se, quem vocamus numerū discretorū: cuius partes non copulantur aliquo termino communi, & ipse eiúsque ratio quantitati discretæ accommodatur. ¶ Suboritur ambiguitas quo modo oratio voce effusa seu tenor orationis, quantitas per se dici posset, cum huiusmodi tenor vox sit: vox autem qualitas, hinc conijcere

quis videbitur orationem poni in genere qualitatis . ¶ Operępretium fuerit adnotare rem plerumq; pluribus accommodari prædicamentis: sed ratio ei adiecta ex communi facit propriam & vnius prædicamentorum esse generis. Res enim quæ substantia est, substantiæ & ad aliquid communis est: cum per se subsistat & ad aliud referri potest. Ratio tamen substantiæ adueniens eam substantiæ appropriat: vt cum dicitur homo, aut equus, aut animal, aut aliquid huiusmodi, nihil præter substantiam deprehendimus: ratio autem ad aliquid occurrens, vt cum dicitur eadem aut diuersa appropriat ad aliquid. Nam dicitur idem & diuersum proprie ad aliquid, haud secus de voce: nam res ipsa quæ vox est & quãtitati & qualitati communis est: ratio tamen quantitatis ei adueniens eam in quantitatem asciscit: vt cum ipsa vox tenor orationis appellatur. Est enim tenor, quædam syllabæ orationis longitudo aut breuitas: & cum ratio qualitatis aduenit, qualitati determinat: vt quatenus vox dicitur. Ideo vox propriè qualitas est, & tenor vocis propriè quãtitas. Nec ratio vocis dicitur de ratione tenoris vocis, cum hæc sit impropria prædicatio, tenor vox est. nec te debet admiratio discruciare. Nam Philosophus tertio Physicorum eundem actum ostendit actionem, passionemque esse: sed ratio adueniens, illum determinat: vt cum ratio actionis quæ est ab aliquo aduenerit: actus ille actio dicitur, & non passio: cum vero ratio passionis quæ est esse in aliquo aduenerit, passio solum dicetur: id caliditatis exemplo suadebis facile. Et

quamuis eadem res sit actio & passio, hæc tamen prædicatio actio est passio, non dicetur propria: cum longe diuersa sit vnus extremi ab altero, ratio: at ratio rationi extranea, vt docti testantur, nunquam prædicationem propriam recipit. Authores enim ea quæ propria sunt & accommoda, maximè curant: quæ si desunt, quæ proprius ad ea accedunt, considerant. ¶ Surrepit & alia dubitatiuncula, an ea res quæ vox est, potius qualitas, an quantitas dicenda sit. ¶ Dilutio. Ea res quæ vox est, magis qualitas quàm quantitas nominari debet: quia qualitati familiarior est quàm quantitati, & plurimas in ea rationes habet. Et res vni prædicamentorum magis addictæ & vsitatiores, potius illius prædicamenti nomen sortiuntur quàm alterius cui minus sunt addictæ, & minus affines. Hinc coniectamus superficiem magis quantitatem quàm qualitatem dici, tametsi re ipsa vtrunque sit. Et cum non magis vni prædicamentorum quàm alteri est addicta, eque vsitata admittet vtriusque rationes: vt res ipsa quæ est calefactio, cum non magis actioni quàm passioni copuletur, non magis actio quàm passio appellari solet. ¶ *Proprie autem quanta dicuntur quæ dicta sunt: alia vero omnia secundum accidens.* Ne quis opinetur accidens seu per accidens quanta huic ascribi prædicamento: docet Philosophus quæ paulo ante enumerata sunt huius prædicamenti dicibilia, esse per se quanta. Alia vero quæ potius ad aliud prædicamentum deflectuntur, esse per accidens quanta: vt album dicitur multum, non idcirco quòd albedo sit quantitas: sed quoniam multa

fit superficies in qua illud albū sit . Si enim multum fuerit spatium in quo album sit : multū erit album: quo circa nullā per se quantitatem habet albedo, sed quoniā in aliqua quantitate, id est superficie constituta est , dicitur quātitas per accidens. Nec mireris vnum per se tale esse, & alteri cōparatum solum esse per accidēs : vt albedo per se est color, id est ex sua natura, à qua non per se dicitur substantia colorata (cum substantia quatenus substantia non dicatur talis , sed vt colorem à quo denominatur, recipit) & eadē albedo quantitati iuncta, est per accidens quanta. Actio pariter non sui ratione sed quātitatis longa dicitur, quodd diutino tēpore sit acta. Et eadem lege ægritudinem dicimus multam , cum longo tempore hominem discruciauit: & motum multum, quodd multo tempore factus sit . ¶ *Quantitati nihil est contrarium.* Hac prima quantitatis communitate docet Philosophus: quātitati nihil esse contrarium. *Definitis primum nihil aduersatur: ut bicubito nihil est cōtrarium: indefinitis pariter ut lineæ superficies cōtraria nō est.* Interpretantur hanc proprietatē plurimi de ipsis dicibilibus: cuius sensus est, Dicibili huius prædicamēti nihil est contrarium: vt huic dicibili bicubitum non est aliud dicibile contrarium. Est autem propria secundo quantitati, nam omni conuenit quantitati & non soli: cū alteri à quantitate conueniat, scilicet substantiæ. ¶ *Quātitatem vocamus determinatam, quæ certa numeri quantitate censetur : vt bicubitum qudd binario determinatur , & tricubitum ternario.* Quantitates determinatæ sunt hæ : bicubitum, g.ij.

tricubitum, quadricubitum : dico, tria, quatuor, quinque, hora, dies, mensis, annus . ¶ Quantitas indeterminata , est quæ non censetur certa numeri quantitate, seu termino certi numeri: vt linea, superficies, corpus, numerus . ¶ Obijcies in proprietatem: magno aduersatur paruum, magnum autem & paruum sunt quantitates , igitur quantitati aliquid est contrarium . ¶ Dilutio, vtraque pars antecedentis ex Philosophi censura deneganda est . Non enim magnum & paruum sunt contraria. Nam si contrariarentur , contingeret idem simul suscipere contraria : quod est absurdum : licet substantia susceptibilis sit contrariorum, non tamen simul contraria recipit . Si magnum paruo contrarietur, & cōtingit simul idem vt montem dici magnum & paruum , magnum quidem ad vnum, & paruum ad alterum : igitur idem simul contraria susciperet . Quod si id accidat, ea ipsa eueniet sibi met esse cōtraria . Nam cum idem sit magnum & paruum, magnum autem paruo contrariatur, igitur idem sibi est contrarium. Nec dicendum est magnum & paruum esse quantitates, nihil simpliciter est quantum, nisi per se sit quātum: magnum autem non est per se magnum, sed ad alterum refertur, vt mons ad alterum montem dicitur magnus . Amplius, Quæ per se quanta sunt, quantitatem significant: vt bicubitum & tricubitum : magnum autem & paruum non significant quantitatem , sed ad aliquid: igitur quātitatū numero non sunt ascribenda . Deinde si quis affirmet magnum & paruum esse quantitates, nihil illis videbitur esse cō-

trarium:quod demonstratur,Quod non potest sumi per seipsum, sed ad solam alterius relationem refertur, contrarium nequit suscipere:at magnū & paruum sine alterius consideratione sumi non possunt, igitur nihil illis erit contrarium. ¶ Hoc pugnabis in primam proprietatem argumento, recta linea, lineæ curvæ contraria est, pariter superficies alba, nigræ superficiei, & tēpus temporis, scilicet dies nocti, igitur manifestum est quantitati aliquid esse contrarium. ¶ Dilues seiunctim argumenti particulas. Primum negabis rectam lineam esse contrariam curvæ. Nam recta linea in eo quòd linea est, minime censetur curvæ contrariari, sed quatenus recta est:quare linea non est per se lineæ contraria, sed ipsa rectitudo curvitati aduersatur. Argumentum solum ostendit lineam quatenus qualis est per accidens, lineæ quali contrariari, sed non quatenus est quātitas. Nec absimilis erit alijs partibus solutio. Superficies alba quatenus est superficies, nulli superficiei contrariatur: sed in eo quòd albedo in vna est & alteri accidit nigredo, pugnant solum per accidens duæ superficies: intelligimus sanè quantitati nihil per se cōtrariari. Nec tempori tempus est contrarium: nox enim, quamvis videretur esse diei cōtraria, non tamen in eo, quòd tempus est: sed in eo, quòd non est aer obscurus. Dies vero aer lucidus: aer autem, neque quantitas est, neque tempus: lumen autem & obscuritas qualitates sunt: & non quantitates. Et quemadmodum aliquid per se quale, per accidens quantum dicitur: ita quidpiam per se quantum, per accidens

g iij.

quale dicitur. Considerāt autē maxime authores quæ per se sunt. ¶ Argumētaberis alio argumēto probaturus quantitati aliquid esse contrarium: Locus deorsum qui est à medio mundi , contrariatur loco sursum qui est ad mundi extrema: at locus est quantitas , igitur quantitati aliquid est contrarium : antecedens probatur : locus deorsum maxima separatur distantia à loco sursum , igitur locus deorsum & locus sursum contrariantur . Amplius , contrariorum definitio quæ est, Contraria esse quæ sub eodem genere posita maxime à se inuicem distant , illis conuenit , igitur contrariantur. ¶ Hæc ratio facit videri maxime quantitati circa locum aliquid esse contrarium: quam non aliter dissoluit Philosophus . Sed quid varie sentiant nonnulli de loci contrarietate , satis cōmode recensere videbimur. Opinatur Boëtius quantitati (dempto loco) nihil esse contrarium . Nec censet loci rationem ad aliquid decumbere: sed quantitatem: cuius partes partibus corporis locati , termino communi conterminantur. Hanc qui sectantur sententiam, non inficiantur locum , rationem ad aliquid posse suscipere : sed huic instituto minus accommodatam. Scias in physicis pleraque reputari contraria quæ logicis si adaptarentur vocibus minime contraria dicerentur . ¶ In hanc insurges opinionem, Contraria definiuntur quæ sub eodē genere posita maxime abinuicem distant : & eidem subiecto vicissim assunt , à quo & se mutuo expellunt: modo alterum eorum illi subiecto natura non assit, sed locus sursum & locus deorsum non possunt

sunt eidē subiecto vicissim inesse, igitur non contrariantur. Amplius, si locus loco sit contrarius: & omnis locus est superficies, igitur superficies superficiēi est contraria, quod est absurdum.

¶ Dissoluunt argumētum definitioni contrariorum non refragantes, quanuis locus sursum & locus deorsum non mutuo sese deiciant, nec vicissim eidem assint, non tamen à contrarijs se iungentur. Nam contrariorum definitio intelligenda est, modo alterum eorum illi subiecto non insit natura, modo locus sursum sic in summis natura inest, vt nunq̃ abesse possit, neq̃ alteri cuiuspiam adesse. In ijs autem contrarijs quæ natura insunt, non oportet ea eidem subiecto vicissim adesse, vicissimq̃ se mutuo expellere: vt calidum & frigidum contrariantur, & tamen ab igne calor dissolui non potest: quia calor ipsi igni natura competit. Deinde non oportet superficiem superficiēi cōtrariari, si locus qui est superficies loco contrarietur. Nam superficiēi nomen minus est cōtrarietati aptū: nomē vero loci maxime cōtrarietati accōmodum. Et in alios retrūdūt clauum: color colori est cōtrarius, vt albedo nigredini: & omnis color re ipsa est similitudo: & tamen non oportet similitudinē similitudini cōtrariari. ¶ Alij molitūtur aliā sententiam, & longe aliter diiudicant locū non esse quantitātē, q̃ sua ratio sit ad aliquid. Locus enim id dicitur cuius est locatum, & locatū cuius est locus. insuper negant locum locologicè contrariari, etsi sit Physice. Et cū dicitur contraria ea esse quæ sub eodem genere posita maxime abinuicem distant, hic de g. iij.

distantia pugnatiōis formæ, non autem de locali distantia esse intelligendū autumāt: in super integra cōtrariorū definitio non cōuenit locis, cū nō possint eidē subiecto vicissim inesse, nec mutuo se expellere: quare videbitur locū non posse loco pugnare & cōtrariari. ¶ In eos pugnabis Aristotelis authoritate enumerantis locū inter species quantitatis continuæ, igitur locus est quantitas.

¶ Dicit Trapezuntius in sua dialectica, Aristotelem in quinto primæ philosophiæ has quātitatis cōtinuæ species posuisse, scilicet lineā, superficiē, corpus, motū & tēpus: in categorijs motū neglexisse, & locum posuisse. Locus autem vt à Physico auditu colligitur, superficiē species est. Quare patet (vt inquit) aut alios secutum, locum à superficie separasse: aut ipsam trinam dimensionem nō vt in corpore, sed potius in vacuo intellexisse.

¶ *Non uidetur autem quantitas suscipere magis & minus.* Hæc secunda proprietas insinuat dicibilia quātitatis non prædicari cum his aduerbijs magis & minus intentionē & remissionem designantibus. Nemo enim diceret vnam lineam esse magis alia lineam, neque bicubitum est alio magis bicubitum. Pariter ternarius non est magis aut minus numerus quàm binarius. Hæc proprietas est propriā secūdo. Nam competit omni quantitati, & non soli: cum substantiæ (vt dictum est) cōueniat. ¶ Obijcies, Vna linea magis est magna quàm alia, igitur videbitur quantitas suscipere magis. ¶ Dices consequentiam esse abnegandā: cum dicimus vnam lineā esse magis alia magnam, magis non importat intensionem, sed ex-

ensionem, vt fateamur vnā lineam alia extensio-
rem dici. Et magis illic absurde satis sumitur, cū
secundum suam propriā rationem, intensionem
designat. *¶* *Proprium est maximè quantitatis, quòd*
æquale & inæquale dicitur. Hac tertia proprietate
demonstrat Philosophus, quantitatem siue con-
tinuam siue discretā esse per se æqualem aut in-
æqualem, vt linea pedanea alteri lineæ pedaneæ
est æqualis, & bipedaneæ inæqualis. Pariter bina-
rius alteri binario est æqualis, & ternario inæqua-
lis. Nec minor in alijs (quæ per se quanta sunt)
videbitur ratio . In cæteris vero quæ per se non
sunt quanta nec quantitates , vt in substantijs &
qualitatibus, nihil per se erit æquale aut inæquale:
vt duo homines si duobus alijs æquales dicantur,
nō tamen per se, & quatenus sunt substantiæ, sed
per accidens: quia eis adest quantitas, scilicet ter-
narius per animæ applicationem à qua æquales
censentur. Pariter album nō censetur proprie al-
teri æquale: sed simile. Nam quemadmodū à quā-
titate res cēsetur æqualis aut inæqualis, ita à qua-
litate res denominat̃ similis aut dissimilis. Hinc
colliges bifariam aliquid dici æquale aut inæqua-
le, per se scilicet, & per accidens. Per se, cū sua na-
tura , & nō alterius quātitate dicitur æquale aut
inæquale : vt linea, superficies, & ita de singulis
quantitatibus. Per accidens, cum à quātitate di-
citur æquale aut inæquale, vt substantia pedanea
alteri substantiæ pedaneæ est æqualis . Nonnulli
in hunc modum recipiūt proprietatem, maximè
proprium est quantitati secundum eā aliquid di-
ci æquale aut inæquale. Verum cum ipsa æqualis

tas aut inæqualitas per se & apte quidem quantitati accommodanda sit, accedo Boëtio ita ex græco in latinum transferenti, Proprium est quantitatis, quod æquale & inæquale dicitur. Id autem conijcimus esse proprium quarto.

¶ De prædicamento ad aliquid
quid scholia.



Categoriarum instituto nõ desistēs, subscribit quātitati ad aliquid. ¶ Sed effertur dubitatio, cur Philosophus prætulit ad aliquid qualitati, & posterius de ea differit. ¶ Dicit Boëtius hanc causam esse: quod posita quantitate magis minúsque esse necesse est: quare cum quantitate continuo ad aliquid consequatur: recte post quantitatem relatiuorum seriem ordinauit. Et id quoque in causa est: quod superius cum de quantitate tractaret, relatiuorum mentio facta est, cum de magno paruoque diceretur: vt ergo continens & non esset operis interrupta distinctio, ideo quātitate finita de relatione proposuit. Nec ab hac deflectit ratione Diuus Aurelius Augustinus. Quoniam (inquit) in fine quanti quædam eiusdem generis ad aliquid videbātur posse transferri: hanc categoriam quæ quarta fuerat, necessario tertiam voluit ordinare.

¶ Ad aliquid uero talia dicuntur, quæcunque hoc ipsum quod sunt, aliorum dicuntur, uel quomolibet aliter ad aliud. Hanc censent nonnulli definitionem ex fōte Platonis, & nõ Aristotelis effluxisse:

quam Aristoteles vt impensius communem, & huic prædicamento inuiam, parum approbat: aliam (vt videbitur) positurus: eam tamen quia textui inseritur dilucidare moliemur.

¶ Ad aliquid communiter siue relatiua communia, talia dicuntur, hoc est, sunt talia dicibilia, quæcunque hoc ipsum quod sunt, aliorum dicuntur: hoc est verificantur de seipsis cum genitiuo, vel quomodolibet aliter ad aliud, id est vel quouis alio obliquo. Facilem illi descriptioni interpretationem subiungunt, Ad aliquid talia sunt dicibilia quæ de seipsis cū genitiuo aut alio quouis obliquo sunt verificabilia. Et primam illius definitionis particulam exponunt de ijs quorum ea ad quæ referuntur, genitiuo explicantur, vt duplum dicitur dimidij duplum, & dimidium dupli dimidium: similiter pater filij pater est, & filius patris filius est. Secundam vero particulam explicant de ijs quorum ea ad quæ referuntur, alio quouis obliquo explicantur: vt simile simili est simile. Pariter æquale dicitur æquali æquale. maius minore maius. Magnus ad paruum magnus.

¶ Relatiuorum autem alia iisdem casibus referuntur, alia diuersis: pater & filius, dominus & seruus iisdem casib⁹ referuntur. Nam cum dicimus pater filij pater est, & filius patris filius est, nominatiuos iisdē obliquis adiunximus. Et hæc vt genitiuis assignantur, vt dicit Boëtius, id quod sunt similiter aliorum dicuntur. Nam quod aliorum dicuntur secundum genitiuum redditur casum. Alia diuersis explicantur casibus, vt sensus sensibilis sensus, & sensibile sensu sensibile.

Disciplina disciplinati disciplina, & disciplinatum disciplina disciplinatum. Similiter scientia scibilis scientia est, & scibile scientia scibile. ¶ Alia relatiuorum partitio. Relatiuorum alia æquali quadā cōparatione consistunt, vt simile, æquale, amicus. Nam simile dicitur simili simile, & amicus amici amicus. Alia maiore: vt pater, dominus: alia minore, vt filius, seruus: alia voluntate, vt amicus, inimicus: alia fortuna, vt dominus, seruus. Hæc Trapezuntius. ¶ Vnum adnotatu nō indignum existimo, ad aliquid videlicet cōmuniter sumptū per omnia crebrescere prædicamenta. Sunt enim omnium prædicamentorū dicibilia de se ipsis cū aliquo obliquo verificabilia in substātia, vt homo anima rationali est homo: in quātitate, vt magnitudo rei magnæ magnitudo cēsetur: & magnum magnitudine magnum: in qualitate, vt albedo est albi albedo, & album albedine album, & ita de singulis. In hanc sententiam propemodum descendit Iudocus Clichtoueus. ¶ Obijcies, Si talis assertio veritati gratularetur, essetq; vero consentanea, dicere oporteret, idem dicibile (vt album) in duobus collocari prædicamētis, in qualitate scilicet & ad aliquid: quod est absouum. ¶ Non cogit ratio dicere idē dicibile, vt album, in duobus subsistere prædicamentis: quāuis enim album sit ad aliquid cōmuniter, nō propterea subsistet in prædicamento ad aliquid, & hanc declinabis consequentiā: Album est ad aliquid cōmuniter, igitur est ī prædicamēto ad aliquid. Nā ad aliquid cōmuniter nō cōstituit distinctū prædicamentū, sed suo ambitu omnia prædicamēta cōplectitur. Quis me

hercle nisi mētis expers diceret illud speciale dici prædicamentū, quod per omnia spatietur prædicamenta: atqui ad aliquid cōmuniter sumptum per omnia spatietur prædicamēta: nō igitur dicitur speciale prædicamentū. sed ad aliquid proprie sumptum, ut discutiatur, distinctū est ab alijs prædicamentum. ¶ Sciscitaberis, Cur non dictum est ad aliquid vero tale dicitur: sed plurali numero talia dicuntur? ¶ Dicit Boëtius: Quicquid in natura relationis agnoscitur, id cum alio necesse est cōsideretur. cum enim dico dominus: per seipsum nihil est, si seruus desit. Quocirca cum vnus relatiui nuncupatio mox secū etiam aliud trahat: ad aliquid vnum esse per se nō potest. atq; ideo non dixit Aristoteles: ad aliquid verò tale dicitur, sed plurali numero, talia dicuntur inquit, demonstrās relatiuorum intelligētiam nō in simplicitate sed in pluralitate consistere. hæc ille. Ab hac sententia nō discedit Augustinus dicens, ad aliquid Categoriā vocamus eā, quæ id quod est dicitur ex altero: sine cuius societate esse nō possit: & cuius vis omnis ex alterius coniunctiōe descendit.

¶ At uero sunt etiam & hæc ad aliquid, ut habitus, dispositio, scientia, sensus & positio. Demonstrat Philosophus habitum esse ad aliquid & dispositionē. Est enim habitus alicuius habitus, & dispositio alicuius dispositio. Sciētia pariter & sensus alteri adhærent, sine cuius societate vix bene intelligi possunt. Et positio (quæ est alicui rei collocatio) est alicuius positio. ¶ Pugnabit quispiam, Scientia & sensus sunt qualitates: quo nā igit pacto sunt ad aliquid? ¶ Dilutio omniū in ore versata, Quan-

uis scientia ad prædicamentū qualitatis descēdat, non propterea à relatiuorum communium ingressu repellitur. Iam enim dictum est relatiuum seu ad aliquid communiter non constituere vnū prædicamentum. ¶ Solutionem tamen diui Augustini, haud pœnitendam commodè huic loco ascribemus: Scientia, vt rei scibilis est scientia, & sensus rei sensibilis sensus, in genere ad aliquid continetur. Scientia vero, vt hominis est scientia, & sensus hominis est sensus, sunt qualitates. Ex eruditi viri censura deprehendes longè aliter scientiam considerari, vt hominis est scientia, à quo sciens homo denominatur, & quatenus est rei scibilis scientia.

¶ *Sunt autem & accubitus & statio & sessio positiones quædam. Positiones uero ad aliquid sunt. Quoniam diximus positiones esse ad aliquid: sessio vero & statio sunt positiones, & eius species sessio & statio relatiua dicuntur. Sedere autem & stare positiones non dicuntur, nec relatiua: sed denominatiuè dicuntur ab illis denominantibus.*

¶ Omnis autem denominatio, non est id quod est ea res de qua nominatur, vt grammaticus non est ipsa grammatica à qua denominatur.

¶ Obijcies, Si sedere, recubare & stare non essent positiones, non reciperentur in prædicamentō positionis siue situs, quod tamen est falsum. ¶ Diutius: Cum dicit Aristoteles recubare, stare, sedere, positiones non esse, sed denominatiuè dici à positionibus, nequaquā vult inficiari, recubare, sedere, & stare esse prædicamenti positionis siue situs: sed negat ea dici primaria & principalia il-

lius prædicamenti, sed solum esse à positionibus denominatiua. Sed sessio Socratis, & Platonis statio, primogenea sunt illius prædicamenti, perinde albedo, nigredo, caliditas, & frigiditas qualitates verè dicuntur, album autem, nigrum, calidum, & frigidum, qualia sunt denominatiua à qualitatibus.

Inest autem contrarietas in ijs quæ sunt ad aliquid.

Hac prima proprietate demonstrat Philosophus contrarietatem inueniri in ijs quæ sunt ad aliquid communiter, & hanc proprietatem de dicibilibus interpretabimur. Inest contrarietas in ijs quæ sunt ad aliquid: hoc est dicibilia ad aliquid communiter sunt contraria: vt virtus & vitium contrariantur, & sunt ad aliquid communiter: nam referuntur, non tamen ad seipsa mutuo: sed ad ea quibus eorum natura conuenit: vt virtus ad studiosum, & vitium ad vitiosum: est enim virtus studiosi virtus, & studiosus virtute studiosus. Pariter vitiosus vitio vitiosus, & vitium vitiosi vitium. Hæc proprietas non competit ad aliquid seu relatiuis proprijs. Relatiua enim propria siue dicibilia huius prædicamenti non sunt contraria, sed relatiue opposita, vt pater & filius. Est tamen hæc proprietas propria primo, relatiuis communibus: nam solis conuenit & non omnibus. Cum non conueniat homini, animali & quantitati, quæ sunt relatiua communia, cum ad aliqua referuntur. Nec posses cauillari, dicendo proprietatem non conuenire solis relatiuis communibus, cum ipsis competat qualitatibus, vt albedini & nigredini. Quauis qualitatibus congruat, illæ tamen sunt relatiua communia: vt albedo est albi relatiuum, & nigredo nigri. Ratio si vinceret, deberet suadere

illam proprietatē conuenire ijs quæ non sunt re-
latiua cōmunia, quod non est verum. ¶ Contem-
des, Virtus & vitium sunt qualitates sub prima
qualitatis specie, igitur nō sunt ad aliquid. ¶ Nō
nulli dicunt non esse incōmodum, virtutem & vi-
tium esse qualitates, & detorqueri ad aliquid cō-
muniter: nā ad aliquid cōmuniter per omnia (vt
dictum est) crebrescit prædicamēta. Aliam Boē-
tius relinquit solutionem, dicens vnam rem alia
significatione diuersis generibus supponi. Nihil
enim prohibet Socratem in eo q̃ Socrates est, di-
ci substantiā: in eo vero quod pater vel filius est,
ad aliquid: ita ad aliud atq; ad aliud ducta prædi-
catione, eandem rem sub diuerso genere poni ni-
hil prohibet. Habitus enim & virtus & vitiū eo-
dem modo, quatenus enim habitus virtus & vi-
tium hominū sunt, à quibus quales homines nun-
cupātur, sub qualitate ponuntur. Sed habitus ad
aliā prædicationem dictus, fit relatiuus, q̃ rei ha-
bilis sit habitus: pariter virtus quatenus est alicu-
ius virtus, & vitiū alicuius vitiū, sunt ad aliquid.
¶ Scrutaberis, Quid causæ est, & quare aliqua re-
latiua contrarietate carent, & alia contrarieta-
tem admittunt? ¶ Dicit idem Boëtius, secundum
quæ prædicamenta, relatiua dicūtur: si illa susci-
piunt contraria, & relatio suscipit: sin vero illa
prius repudiant cōtrarietatē, nec illud ad aliquid
quod secundum ea dicitur, vlla vnq̃ contrarieta-
te diuiditur. Hoc documento admodū conduci-
bili facillè dignoscēs patrem & filium non susci-
pere contraria. Pater enim & filius secundū sub-
stantiā prædicātur: non est enim pater atq; filius,

nisi in substātia sit: quocirca quoniam secundum substantiā dicuntur, contrarietate carent. Virtus autem & vitium secundum qualitatem prædicantur, & qualitatum numero asciscuntur. At qualitas recipit contrarietatem, quare virtus & vitium contrarietate non carent.

¶ Videntur autem magis & minus ea quæ ad aliquid sunt, suscipere. Non minus secunda proprietas ad aliquid cōmuniter de dicibilibus exponenda est, quàm prima. Interpretatio huius proprietatis: Dicibilia ad aliquid, communiter prædicantur cum istis aduerbijs magis & minus, vt studiosus est magis vel minus aliō studiosus, & relatiuis cōmuniter est propria primo. Nam soli conuenit & non omni: homo siquidē & animal relatiua sunt cōmunia, & nō suscipiūt magis & minus. Conuenit etiā nonnullis relatiuis proprijs: simile siquidē & dissimile magis & minus dicit, pariter æquale & inæquale: non tamē omnia huius prædicamēti dicibilia suscipiunt magis & minus: duplū enim & dimidium huius sunt prædicamenti, quæ nec magis, nec minus recipiunt. *¶* Dicit Faber Aristotelem cum asseruit simile & dissimile, æquale & inæquale suscipere magis & minus: latius cæpisse magis & minus q̄ prius sumpsit, pro ijs quæ aptè prædicationem cum magis & minus suscipiunt, seu illa intensionē & remissionem, seu maiorem, minoremve conspersionem & consensum præferunt: ut sint duo quorū vterq; sit sciens & bonus: sint pariter duo alij, quorum vterq; sit sciens, vnus tamen bonus, alter vero malus: duo primi sunt magis similes ob maiorem qualitatis
h.j.

affinitatem: cum virtute & scientia conspirent & coalescant, alij vero sola consentiunt scientia. Pariter duæ aquæ, quarum vtræq; efferuescit quatuor gradib⁹: sunt magis similes ijs, quarum vna tribus incalescit caloris gradib⁹, & altera quinque gradibus feruet. Sint etiã duo corpora, quorum vtrunq; sit proceritate quinque pedũ, & crassitie pedanea. Item duo æquali proceritate, vnum tamen crassitie pedanea, alterũ vero minori, prima sunt magis æqualia. Neq; hic æquale sumitur vt quantitatu præcisionẽ indicet, vt neq; simile solã qualitatem, alioqui nõ reciperẽtur in hoc prædicamẽto. ¶ Neq; æquale & inæquale suscipiunt magis & minus ex Boëtij censura, q; proprium sit quantitatis suscipere magis & minus, sed vt quædam passio seu aduẽtitia quãtitatis affectio: vti risibile aduẽtitiu homini risum ascribit, & simile ad extrinsecam qualitati relationẽ. ¶ *Omnia autem quæ sunt ad aliquid, ad conuertentia dicuntur.* Tanta est relatiuorum habitudo, tantãq; affinitas: vt vnum non possit aptè intelligi alio non intellecto. Et ea est reciproca conuersio, vt vnum ponat alterum, & cõuersim ab altero ponatur. Quapropter Philosophus hac tertia proprietate apertis patefacit exemplis relatiua ad cõuertentia dici, *ut seruus domini seruus, & dominus serui dominus.* Pariter *duplum dimidiũ duplum est, & dimidium dupli dimidiũ.* ¶ Relatiua conuertuntur, quæ de seinuicem verificantur cum obliquo sui correlatiui: vt pater & filius. Correlatiuum id censetur, ad quod relatiuũ refertur: vt cum pater ad filium refertur: filius est correlatiuum, & pater relatiuum: & cũ filius

ad patrem refertur, pater est correlatiuum, & filius relatiuum. Nec vitiosè fateberis idem diuersa ratione dici relatiuum & correlatiuum.

¶ Dicit Boëtius relatiua conuerti, cum prima res dicitur ad secundam: secunda rursus dicitur ad primam. vt ponatur prima res pater, & secunda filius: quemadmodum pater filij pater est, ita filius patris filius est. Et quanuis relatiua conuertantur, non tamen semper eodem casu redduntur: sed aliqua simili casu referuntur, vt pater & filius, dominus & seruus: & aliqua dissimili, vt disciplina & disciplinatum. Est enim disciplina disciplinati disciplina, & disciplinatum disciplina disciplinatum. Similiter scientia scibilis est scientia, & scibile scientia scibile. ¶ Perscrutaberis, an omnia relatiua ad conuertentia reciprocaque dicantur. ¶ Respondet Aristoteles relatiua minimè ad cōuertentia dici, nisi apta conueniēsq; suorum correlatiuorum facta fuerit assignatio.

Nam quis à recto deffectit & peccat correlatiuū assignando quod non conuertitur cum relatiuo: vt si ala, auis correlatiuum assignetur, minimè conuertetur. Non enim ala eo dicitur, vt sit auis ala. Siquidem aliquid habet alam, auis tamen nullo modo nominatur, vt apes: eodem quoque modo de capite. Si quis caput animali referat, haud quaquā conuersionem reciprocā faciet: multa enim sunt animalia capite carentia, vt ostraea, cōchilia. Sed alā referre oportebit ad alatū, & conueniens erit assignatio. Est enim alatū ala alatum, & ala alati ala. Et caput ad capitatum, si vsus latinorum id recipiat: aut fingere licebit,
h.ij.

vt testatur Philosophus:& conuenientem reddes assignationē. Est enim caput capitatæ rei caput, & capitata res capite capitata. Similiter remus ad rem remitam referetur: non autem ad nauem. Et dicendum erit remum remitę rei esse remum: & remitam rem, remo esse remitam. ¶ Ambigitur, an tertia relatiuorū proprietates sit aliquo proprio modo propria tam relatiuis communibus q̃ proprijs. ¶ Responsio, Tertia relatiuorū proprietates, est propria quarto relatiuis communibus:& propria secundo relatiuis proprijs. ¶ Obluctaberis. Non in solis relatiuis communibus est conuersio, igitur talis proprietates nō est dicenda propria quarto relatiuis cōmunib⁹: antecedens probatur: conuenit homini & risibili quę sunt à relatiuis discreta, pariter congruit soli super terram & dici. Nam cum sol super terram est, dies est:& cum dies est, sol super terram est. hæc autem sunt à relatiuis aliena, igitur non in solis relatiuis cōmunibus est conuersio. ¶ Non fit ibi mentio de conuersione secundum consequentiam, quam sibi vendicant homo & risibile, & multo plura: sed solum de conuersione secundum quandam habitudinem & comparisonem. Est proprium relatiuorum dici ad conuertentia, non secundum suā nuncupationem, sed secundum quandā habitudinem. Qui enim dicit: si homo est, risibile est:& si risibile est, homo est: nullam habitudinem monstrat, sed tantummodo consequentiam. Consequitur enim risibile esse cum homo est: cum vero aliquis dicit filius patris filius est:& pater filij pater est: habitudinem vtriusq̃ & comparisonem

declarat. ¶ *Evidentur autem ad aliquid simul esse natura.* Cum nulla sint dicibilia relatiuis iunctiora & magis connexa, & quæ mutuo ab ipsa natura subsidio sese foueāt, non abs re cēfuit Philosoph⁹ in hac quarta proprietate relatiua simul esse natura. ¶ Illa sunt simul natura, quæ simul nascuntur, & simul pereunt. Ita quod vno posito aliud necessario subsequitur: & vno perempto aliud interimitur, vt pater & filius. Nam si pater sit, filiū esse necesse est: & perempto patre, filiū tolli manifestum est. Similiter cum duplum sit, dimidium est, & cum dimidium, duplum. quod si vnū depereat, alterum perire necesse est. ¶ Aliqui dicunt relatiua dici simul natura, cum inter ea cōuertitur subsistendi consequentia. ¶ Subsistendi consequentia, est ab esse ad esse cōsequentia: hoc est à propositione de secundo adiacente ad alteram de secundo adiacente: vt pater est, igitur filius est. & in copulis extrinsecis talis subsistentia fieri potest. ¶ Conuertitur consequentia, cum nō modo ad antecedens sequitur cōsequens, sed etiā ad consequens sequitur antecedens: vt dominus est, igitur seruus est: & seruus est, igitur dominus est. ¶ Licet relatiua sint simul natura, non tamen omnia. Quædam enim relatiua sunt, quorum vnū altero natura prius est: vt scientia & scibile, quæ feruntur relatiua potentiæ: & vnum scilicet scibile, altero natura prius est. Si scientia sit, scibile permanet: at scibile si fuerit, scientiam esse non oportet. Est enim circuli quadratura scibilis, cui⁹ tamen scientia nondum in lucem emerfit, nec inuenta est. Amplius, Id altero antiquius est &

h. iij.

prius natura, quod posteriori sublato non deperit, eo tamen perempto posterius emori necesse est: at scientia sublata scibile non deperit. Si tamen scibile sublatum fuerit, non poterit posterius scilicet scientia subsistere. Rectè siquidem ex isto antecedente nullum est scibile. Inferes, nulla igitur est scientia. Pariter sensus & sensibile relatiua dicuntur, non tamen sunt simul: sed uti scibile natura prius est scientia, ita sensu ipsum sensibile, & longe eo antiquius.

¶ Passim iactatur relatiua actus esse simul natura, non autem relatiua potentiae: quòd si id à peritioribus approbetur, animaduertere non indignum videbitur, quænam sint relatiua actus & potentiae. ¶ Relatiua actu, sunt ad quorum vnus substantiam protinus alterum subsistit, & ediuerso: ut pater & filius: nam si pater est, filius est, & ediuerso. ¶ Relatiua potentia, sunt quorum vnum potest actu esse, altero non existente, ut genus & species: non enim oportet si genus sit, protinus specie esse. Sed quid hoc sibi velit, in nostris ad prædicabilia scholijs discussum est: pariter prius & posterius, causa & effectus, sunt relatiua potentiae. Et hæc quemadmodum relatiua potentiae sunt, etiam secundum potentiam conuertuntur: ut si genus est, species potest esse: & si prius est, posterius potest esse: & si causa est, effectus potest esse. ¶ Ambigitur, Vtrum nulla substantia ad aliquid dicatur, quemadmodum videtur, an id contingat secundum quasdam substantias. In primis manifestum est primas substantias non esse ad aliquid: nam Socrates non dici

tur alicuius Socrates, nec quilibet alius homo dicitur alicuius quidam homo, neque quidam bos: alicuius quidam bos. Similiter & substantiarum partes, quædam enim manus dicitur non alicuius quædam manus, sed alicuius manus. Si quis enim operto capite & alijs membris obtectis manum foras exerat, non quempiam latebit illam manum alicuius esse manum, cuius autem sit manus definitè non dicet. Et quoddam caput non dicitur alicuius quoddam caput, sed alicuius caput. Si enim contectis oculis facièque velata, alicuius caput inspicias, illud quidem caput alicuius esse non dubitas: cuius autem sit particulatim, non proferes. Similiter secundæ substantiæ non videntur ad aliquid dici. Non enim homo dicitur alicuius homo, nec bos alicuius bos, nec lignum alicuius lignum, sed alicuius possessio. **C**Amplius, cum sint accidentia relatiua, si quis substantias, relatiuas esse concedat, eas in accidentium numero ponendas esse, ut censeat necesse est: quod est absolum. Si enim substantia in subiecto non est, accidens autè in subiecto est, qui fieri potest, ut idem & in subiecto sit, & in subiecto non sit. Si tamen substantiæ relatiuorum numero ascriberentur, id eueniret. **O**bsistes, Prius dictum est: caput esse ad aliquid: nam ad ipsum capitatum refertur: sed caput est substantia: igitur substantia est ad aliquid. **H**anc diluit rationem Philosophus, dicens: si igitur sufficienter eorum quæ sunt ad aliquid diffinitio assignata est: aut nimis difficile, aut impossibile est ostendere, quod nulla substantia eorum quæ sunt, ad aliquid dicitur.

Ita quòd innuere vult substantiam à diffinitione ad aliquid communiter sumpti nō reijci. Sed aliā ad aliquid propriè sumpti diffinitionem ponit, à qua substantiæ separātur & excluduntur. ¶ *¶ Sunt ad aliquid quibus hoc ipsum est esse, ad aliquid quodam modo se habere: hoc est, ad aliquid sunt dicibilia, quibus hoc ipsum esse: hoc est, quorum primaria significatio & præcipua est, quodam modo se habere ad aliud, id est significare rem in cōparatione ad aliam: vt non possit intelligi significatum relatiui sine suo correlatiuo: quemadmodum patris ratio præcipua & formalis est, quodam modo se habere ad aliud, videlicet ad filiū, & è diuerso. Nec fieri potest, vt substantiam patris quatenus pater est, sine sui correlatiui notione intelligere possim. Nam vnus intelligētia alteri reciproca est. Ex hac interpretatione dilucidè percipies nulla esse dicibilia huius prædicamenti, nisi connotent seu mauis designent mutuā inter se referēdi habitudinem. Et quòd si quis definitè eorū quæ referuntur aliquid cognouerit, & aliud definitè seu determinatè intelliget. Hinc faciliè substantiam & qualitatem ab hoc prædicamento excludes: quod solum ad aliquid propriè sumptū recipit. Pugnabis in hanc diffinitionem, Diffinitio vt magis sit lucida & aperta, sumitur, vt res de qua quæritur, assignetur. Sed Philosophus rem ipsam quam diffinit in diffinitione protulit, igit talis diffinitio non est apta. ¶ Non putes Aristotelem hanc particulā, hoc ipsum est esse, diffinitioni ad aliquid adijcientem, diminuisse aut magis obscurasse suam descriptionem: non enim eā, vt*

imperiti, sumpsit: sed in hanc intelligentiam, vim integrę diffinitionis sumere oportet. *sunt ad aliquid quibus hoc ipsum est esse, id est, hæc eorum natura atq; substantia est: ut id quod sunt, ad aliquid referantur, id est non solum referri dicatur, sed etiam referantur.* Et nihil aliud intelligere vult, nisi ad aliquid talia esse, vt eorum substantia, ad aliquid aliud referatur, & quæ ita sunt, vt ipsa id quod sunt ad aliud referantur. De re ipsa agitata dicit Boëtius: Non enim in eo quod est dici ad aliquid consideramus, sed in eo quod est esse. Ea namq; sunt relatiua, quæ in quadam comparatione, & relationis habitudine consideramus: vt quaternarius numerus, & hoc ipsum quod est esse dicitur, id est quatuor: & aliud quoddam; id est duplum, vt si ad binarium referatur. Sed non putes Boëtium dicere quaternarium in eo quod quaternarius est, esse ad aliquid, nam est quantitas, sed quatenus est duplus duorum, & ad binarium comparatur. Binarius quoq; in eo q̃ sunt duo, ad aliquid non refertur, sed in eo q̃ est medietas, scilicet ad quaternarium comparatus. ¶ Talem relatiuis inesse habitudinem cupit Aristo. q̃ si quis aliquid eorum quæ sunt ad aliquid definitè sciet: & illud ad quod dicitur definitè sciturus est. vt si quis determinate nouerit, quia duplum est, mox cuius est duplū definitè agnoscit: q̃ si quis percontaretur an duplum sit, & respondeas duplū esse, sed inscius sis cuius sit duplum: non perfectam dupli notionem habuisse diceris. Et si quis nouit Anchisen patrem definitè esse Aeneæ, & Aeneā filium esse definitè agnoscet. Hoc autem

neq; substātijs neq; qualitatibus contingit. Caput enim & manus, & eorum singula quæ substātiæ sunt scire possumus: sed quorum sint, non est necessarium scire. pariter albedinem alicuius esse albedinem non me latebit: cuius autem sit albedo, nō satis certus euadam. Palam igitur est substantias non esse proprie ad aliquid, non tamen vsqueadeo à relatiuis expelluntur, quin per accidens ad aliquid dici possint. Nam vt vult Philosophus cap. quindecimo' quinti Metaphysic. homo aliquid dicitur: propterea quòd accidit ipsi esse duplum. Et album simili modo: si eidem accidat duplum esse. ¶ Percontabitur quispiam, an relatiuum siue id quod refertur, dicatur secundū substantiā vel accidēs, vt pater dicitur ad filiū, & e contra: an talis habitudo patris ad filium sit secundum substantiā vel accidens. & sanè videtur quòd non sit secundum substantiam, nam si diceretur secundum substantiam, diceretur ad se. Adde qd non esset mutatio, quod est falsum: nam Socrates qui pater est alicuius, potest à tali excidere nūcupatione & appellatione, si filius eius exhalet animā & expiret: nec videtur dici secundū accidens. Nam pater in diuinis dicitur ad filium ab æterno genitū, & filius ad patrē, non tamen secundū accidens: quia omne accidēs est mutabile, modo nulla in deo est mutatio. Hanc dubitationem dissoluit Diuus Augustinus libro 5. de Trinitate, cap. 5. dicens: In rebus mutabilibus omne quod dicitur, aut dici secundū substantiam vel secundum accidens, non autē in rebus immutabilibus. Licet pater in diuinis ad filium relatus, nō dicatur

secundū substantiā, quia dicitur ad alterū, tamē dicitur secundū accidens, quia illud relatiuū non est mutabile, cū ab eterno sit pater, sed dicitur secundū relatiuum. ¶ Quoniam Philosophus de relatiuis differit: Quærunť nōnulli locutores im-
portuni, & curiosissimarū opinionū amantissimi: an relatio siue intrinsecus siue extrinsecus ad-
ueniens distinguatur à suo fundamento. ¶ Quā
ridicula & absurda sit hæc in serijs philosophiæ
concertationibus quæstio, non satis dixerim: vi-
detur sanē (vt conijcio) peruestigare si nā natura
mōstrifera relationum portenta auditorū inge-
nijs pestem, & perniciosissimam labem allatura
progignere possit: & qui has quæstiones verius
Perficas nugas & inaudita somnia elato supercī-
lio, & varias opiniones absq; delectu in aerē (nō
vt irradiant, sed atra caligine obtenebrent) euen-
tilare cōtendunt: mihi sanē præstigiatoribus per-
similes videntur: qui suis præstigijs, dolo, & cali-
da astutia prædam pecuniariā & aurā popularē
venaturi optima quæq; & maxime admirāda ef-
ficere moliuntur. Verius tamen Charontem, qui
se moriturum negat, moliuntur suis captiūculis,
& hoc fallaci argumento, interiturum efficere.
Charo inquit es, omnis autē caro morti est ob-
noxia, morieris igitur. sed Charon in eos vulpina
fraude astutiores argumētū retorquēs vinceret.
Porro vt ingeniosissimi appareāt, auiculas assen-
tatoria voce mulcētes (tanq̃ Orpheus) & alliciē-
tes, artes versutas p̃ vrbes venales circūferūt: &
cauponātes eas stupido popello vendūt: laudant
sua oēs, vt scribit diuin⁹ ille Plato in Protagorā,

vel sophistam. At forte nonnulli eorum ignorāt
 sæpe quid vtile animo sit, quidve inutile ex his
 quæ vendunt: similiter quoq; qui ab illis emunt.
 Sed caueant ingenuæ indolis adolescētes: ne eo-
 rum technis & lenocinijs capiantur. Caueant &
 ad verā Philosophiā bene nati, ne in summū ia-
 cturæ discriminē quæ eis charissima sunt, deducāt:
 & disciplinæ noxiæ venena combibant. Verum
 suæ cōsulentes vtilitati à maleficis veneficisque
 sophistis abhorreant: quo caute fallaces deuitēt
 Sirenum cantus, & noxia pocula Circes.

¶ De qualitate scholia.



Is ceptaturus Aristoteles de ijs quæ
 parant aditum ad Philosophiam, &
 ad altiores sciētias, primum descri-
 bit qualitatem quartum sibi inter
 prædicamenta locum vendicantē.
*Qualitatem uero dico: secundum quam quales quidā
 esse dicuntur.* Suspiciarētur nōnulli hac ratiuncu-
 la qualitatem frigidè describi. Nemo nescit albedi-
 nem cygni qualitatem dici: secundum quam tamē
 quales non dicimur: cū ab eadem indiuidua qua-
 litate, plures substantiæ denominari non possint.
 Hæc ratiuncula parum obsistit Aristoteli. Non
 enim Philosophus insigni & perquā diuino inge-
 nio, dicere contendit ab vna particulari qualita-
 te nos appellari & denominari quales. Sed illa
 definitione innuit eam esse qualitatis naturam:
 vt ab ea quicquam denominetur quale: & si qua-
 litatem plurali numero enūties, ab ipsis qualita-

tibus res dicētur quales. Si vero singulari numero, ab ipsa qualitatē res dicitur qualis, & non ab alio accidente. Quemadmodum q̄tatis propriū est, ab ea rem dici quantam: etiam qualitatis proprium est, ab ea quicquam dici quale: vt ab albedine quę est qualitas, res dicitur qualis, scilicet alba: & à calore ignis dicitur calidus. Nihil sanē dignum videbatur: vt talis definitio quēpiam, nisi crassiori ingenio obtusum, traheret in admirationem. Nam vocabula in definitionibus absoluntur à numero. Non eunt tamē inficias docti, qualitatis definitionem in singularem translatā numerum esse intellectu faciliorem: & in hunc modum: Qualitas est secundum quam aliquid dicitur esse quale: vt grammatica est qualitas, quia ab ipsa aliquis dicitur qualis, vt Priscianus aut Donatus dicitur grāmaticus. ¶ Pugnabis in diffinitionem qualitatis. Nullum prædicamenti quæsitivū ponitur in illius definitionē: sed quale est quęsitivū prædicamenti qualitatis: igitur non ponetur in illius definitione. ¶ Quale reclusum in definitione qualitatis non est quæsitivū qualitatis: nec ea fulcitur virtute, sed est denominativum qualitatis. Nā à qualitate res denominatur qualis. Suscipienda est & spectanda illius vocis significationis secundum materiam subiectam. ¶ Est autē qualitas, eorum quę multipliciter dicuntur. Proponit Aristoteles qualitatem varie dici: quę res plerisque fecit opinari Aristotelem sensisse qualitatem æquiuocā nominari. Et in hac opinione videtur persistere Simplicius, dicēs qualitatem non diuidi in futuras species: vt genus in speciem, sed vt

æquiucū in sua significata. Aliā tamen sectabor
sententiā : non enim ex verbis ipsius Philosophi
debemus asserere qualitatem esse ad sua signifi-
cata æquiucam: quāuis qualitas multipliciter di-
catur . Si multæ sint species animali subiectæ, ip-
sum multipliciter quodā modo nominatur, vt ait
Boëtius. Ista tamen multiplicatio non est dicen-
da æquiucatio. Pariter ipsa qualitas suis species-
bus copulata, varios habet significatus & multi-
pliciter dicitur: hanc tamen multiplicationē non
ad æquiucationem retulit Aristoteles. Nam ipsi
qualitati quatuor accommodat species: quæ par-
ticularim discutientur, & speciem dicit esse qua-
litatis habitum & dispositionem: quis igitur non
affirmabit qualitatem vim generis obtinere? Qua-
re dicendum est qualitatis nomen suis speciebus
non esse æquiucum . In hac stat sententia Boë-
tius : *¶ Et una quidem species qualitatis, habitus &
dispositio dicantur* : Primam aperit qualitatis spe-
ciem quæ simplici nomine cum nuncupari non
possit, nec sit simplex nomen aptum & proprie
impositum ad significandum habitum & dispo-
sitionem, eam duabus vocibus circumloqui con-
uenit . *¶ Habit*us est qualitas ascititia seu acqui-
sita ad operandum, difficulter à suo subiecto di-
mobilis, vt scientia, pariter virtus . Acquiritur
etenim studio & diligentia, scientiarum integri-
tas & perfectio : quæ assuetudine cum progeni-
ta fuerit : vsque adeo menti affigetur : vt vix aut
nunquā ab ea dissolui poterit. Facilem tibi strue-
re viam ad habitus cognitionem videbor, si hanc
non indiligenter adnotationem perpendas.

¶ Promptitudo omnis, industria aut studio parata ad bene aut male agendum, habitus censetur: ut cum quis longo usu eximiam ratiocinandi artem seu doctrinam sibi peperit: quāvis eam nonnunquam intermittrat, prompte tamen dum volet suam artem exercebit: talis promptitudo nuncupatur habitus: nam est quædam qualitas acquisita ad bene operandum, quæ nunquam aut sola difficultate ab animo decideret. Pariter cum quis addictus suis voluptatibus aut crapulæ aut vino impensius indulget (vnde ad sordidam & pecuniæ intemperantiæ labem præceps prolabitur) ex turpissimis gulæ functionibus indecoram sibi promptitudinem conciliat: & hæc promptitudo mali effectrix, habitus dicitur: gignitur autem talis habitus ex similibus operationibus, ut dicit Philosophus primo cap. secundi Ethicorum: ut ex diutino diuini amoris officio & longa ad illud bonum capessendum consuetudine, enascitur in voluntate quædam firma affectio: qua illius summi boni cupidus, fit propensior ad diligendum summum bonum.

¶ Vocat diuus Augustinus habitum, affectionem animi longo tempore perseverantem, ut est virtus & disciplina: quæ perseveratione sui & perpetuitate temporis æstimantur: nisi forte eas languor corporis aliquis, & casu iniecta debilitas, amputauerit. Nec desciscit ab Aristotele, qui dicit scientiam videri permanentium, & eorum quæ difficile mouentur: si quis vel mediocriter sumat scientiam: nisi grandis permutatio facta sit, vel ab ægritudine, vel ab aliquo huiusmodi. Memo-

riæ proditum est Messalam Coruinum oratorem præclarissimum ea febre tyrannica laborasse, ut omnem literaturâ amiserit. ¶ Dispositio seu affectio, est qualitas acquisita per facile dimobilis: ut caliditas solis qua quispiam afficitur: nam est quædã qualitas non insita homini ab exortu naturæ, quæ facile admodum permutari potest. Dispositio est veluti quædam guttula aquæ, quæ per facile ab altera disiungi potest & perire: multæ autem guttæ adinuicem coadunatæ, quæ simul se continent, præstant habitus argumentum: nam ut illæ non facile dissociantur, nec habitus ab eo cuius est. Nihil nobis adferre videtur dispositio, quæ quoddam præparamentum seu viam ad habitum conciliandum. Nam ex dispositione seu affectione continuata fit habitus. Quamobrem Boëtius fatetur habitum esse dispositionis vel affectionis firmam & non facile permutabilem recessionem. ¶ Vocat Augustinus affectionem seu dispositionem mutabilem mentis impulsione, vel cupiditatem leuē, quæ breui tempore deletur. ¶ Differt habitus à dispositione, permanētia & diuturnitate: Est enim habitus permanentior & diuturnior: dispositio vero mobilis. Vnde fit ut genere & specie habitus à dispositione non discrepet. ¶ Quia Philosophus asserit habitus dispositiones esse: dispositiones vero habitus esse non est necesse: adnotat aliqui etiam commode dispositionem bifariam diffiniri. ¶ Dispositio propria, est qualitas non insita per facile à suo subiecto dimobilis: ut caliditas superficiei meæ manus adhærens: & est habitus instabilis, imperfectus & vā-

nidus: sicut tenue nubis vestigium: non tamen dicitur dispositio propria habitus consummatus & absolutus: sed ex dispositione progignitur habitus imperfectus: multæ autem dispositiones connexæ conficiunt habitum perfectum: hanc non præstendit dispositionem Philosophus, cum dixit habitus esse dispositiones, non tamen ediuerso. Nam cuius notum euadit nullam dispositionem propriam, esse habitum: nec habitum dici dispositionem propriam, cum sit habitus difficulter dimobilis à suo subiecto. ¶ Dispositio communiter sumpta, est qualitas acquisita ad bene vel male operandum, seu ea facile seu difficulter à subiecto dimobilis sit. hæc autem descriptio habitum recipit: & habitu dispositio communiter sumpta communior est: omnis enim habitus est dispositio: non tamen omnem dispositionem esse habitum necesse est. hanc considerabat dispositionem Philosophus: Habit(us) (cum inquit) dispositiones sunt: dispositio contractius sumpta, est minus communis dispositio: ne effusè & ample sumpta. Aliorum est sententia asserentium nullum habitum esse dispositionem aut contractè aut amplè sumptam. Nec id cecinit Philosophus. Nam ex erudita, eleganti & polita Boëtij translatione habetur solum habitus esse dispositiones: *dispositiones uero non necesse est habitus esse*. Nec corruptissimam quorundam barbarorum ad Aristotelis textum æditionem, imperitorum ingenijs proculcatam approbamus: sed ex toto animo damnamus: & indignam reijcimus. Vult Boëtius Philosophorum politissimus Aristotelem velle habitum dispositiones esse,

quòd ex dispositionibus habitus coadunatus sit, & nihil aliud videtur esse habitus q̃ multarū dispositiones quæ se simul continent & conseruant.

¶ **Scrutaberis, An omnis habitus dispositiōe crementū suscipiat.** ¶ **Responsio,** Non: est enim quidam habitus, vt non per dispositionem creuerit, neq; per aliquam nōdum durabilem qualitatem ad perfectum venerit statū: vt est nasi curuitas, vel cæcitas oculorum, si subita facta sit: hæc enim ab ipso habitu nulla præcedente dispositione cœperunt: fortè enim nūquam ad ea dispositus fuit aliquis. Alij vero habitus intensiōe fiunt, atque inueteratione dispositionis: vt ea quæ in artibus doctrinisque versantur: prius enim quis ad ea dispositus est, post vero habitum capit. Alia vero non intensiōe, sed quadam permutatione ad habitum veniūt: vt lac quod ex liquido defigitur & constipatur in caseum: & vinum quod ex dulci atque suauis in acidū gustum saporēq; cōuertitur: neque enim plus tunc vinum est quàm fuit ante cum esset suaue: sed cum quadam, permutatione in aliā qualitatem habitudinēque trāsgressum est, hæc Boëtius. ¶ *Aliud uero genus qualitatis est, secundum quod pugilatores, uel cursores, uel salubres, uel insalubres dicimus: & simpliciter quæcunque secundum potentiam naturalem, uel impotentiam dicuntur.* ¶ **Vocat Aristoteles** secundam speciem qualitatis, naturalem potentiam, vel impotentiam: speciem sanè subalternam seu genus subalternum quod idem est. ¶ **Naturalis** potentia est qualitas à natura seu à principio naturiuitatis insita ad bene operandum, vt visus, id est

videndi potentia, ab exortu naturæ inest animal
ad bene videndū. A uditus, id est potentia audien
di ad audiendum, & ita de alijs sensuum exterio
rum vocibus, quæ designant aliquā virtutem, na
turalem ad bene operandum. Pariter ingeniosi
tas est naturalis potētia: nam est quædā natura
lis qualitas in anima, qua quispiam propensior est
ad disciplinas recte capeſſendas. ¶ Paulo eminē
tius spectare licet, diuerſas eſſe naturales poten
tias, ab eodem tamen naturæ gurgite profluētes:
quas non nostris studijs neq; meritis, sed solo di
uino afflatu immenſisq; dei beneficijs congeni
tas habemus. Nec ægre ferendum est si aliquibus
insint naturales potētiæ: alijs vero naturales im
potentiæ. Nam spiritus quibus vult ſpirat, & diu
ſiones gratiarum impartitur, vt ſcite admodū do
cet Paulus primæ epiſtolæ ad Corinthios cap.
duodecimo. Itaque naturales ſunt potētiæ ad
virtutes tum morales tum intellectuales: vt na
turalis potentia ad fortitudinem, ad liberalitatē.
Naturalis igniculus ad ſcientiam, ad artem, vt
pugilator naturalem habet potentiam ad con
certandum pugno, pugnāſq; exercendas. Nec
conſentiunt ſignificatione pugil & pugilator. Pu
gil (vt ſcribit Boëcius) is eſt, qui pugilatoria ar
te vtitur: pugilator vero qui naturalem habet in
dolem & facilitatem ad huiusmodi certamina.
Alij naturalem habent potētiā ad deuitandas
morborum iniurias: vt ſalubres, qui valenti ſunt
corpore, neq; facile morbis feriuntur, neq; ægri
tudinis grauamina incurrunt: ſed vt dicit Philo
ſophus habent potentiam naturalem, vt nihil fa

cile à quibuscumque accidentibus patiantur. ¶ Sunt autem naturales potestates, bona innata & ab optimo rerum omnium parente nobis insita, ut naturalia quædam adminicula & adiumenta, quo facilius & commodius animum perficiamus. Quare debent illi naturam omnium scientiarum & artium altricem opulentissimam, summo cum honore reuereri: & ei gratiam pro tantis beneficiis remitteri: quibus hæc præclara virtutum semina iacta sunt, & insita. ¶ Naturalis impotentia, est qualitas ad male debilitateve operandum insita: ut hebetudo siue obtusitas à natura alicui congenita ad debilius, minutius, & minus apte literas adipiscendas. Nam hebetiore & obtusiori ingenio nati, difficile admodum ad capeffendum literarum cultum subuehuntur: sed assueto labore longoque in arte perdiscenda usu imbecilliores naturam vincentes, euadunt literati. quod ex Cleanthe comprobare possumus, quem refert Diogenes Laertius ingenio fuisse tardo: eam tamen tarditatem ingenij labore, studio ac diligentia vincebat. ¶ Et quæadmodum quibusdam insunt naturales potestates ad liberalitatem, ad temperantiam mundiciam: ita nonnullis insite sunt naturales impotentie ad auaritiam, ad intemperantiam. & illi quanto cognoscunt se esse propensiores ad lapsum, tanto magis insito morbo confertisque ad malum vijs, obistere debent: & illis oppositos virtutum habitus acquirere: quoad arduum certamen aggressi, se ipsos vicerint: & maiori conatu virtutem sibi pepererint. qui magis laudandi sunt, quam qui naturæ præsidio adiuti, virtutem sibi conciliarunt.

¶ Nec solum ratione præditis insunt naturales impotentia: sed etiam animantibus rationis expertibus, ut ceruo & lepori (quibus nihil est meticulosius) inest naturalis impotentia, scilicet timiditas: quæ innata est qualitas ad debiliter operandum, scilicet ad salutem sibi fuga comparandam. ¶ Et ne quemquam lateat subiectum naturalis potentia: aut impotentia, animaduertere non indignum videbitur, naturales potentias & impotentias esse vera animi accidentia: perinde atque bona vel mala dispositio in oculo, siue bona vel mala corporis habitudo. Et dispositiones sunt contrariae, sicut albedo & nigredo: ut ingeniositas & obtusitas adinuicem contrariantur. Et si cuiuspiam insit naturalis inclinatio ad quidpiam agendum, nunquam eidem adesse potest inclinatio illi contraria: ut si Socrati adsit naturalis ad temperantiam propensio, quæ accidentaria est animi affectio: nunquam eidem adesse potest naturalis inclinatio ad intemperantia: vitium. Hinc licebit quorundam imperitorum blatteramenta & inscitiam castigare: qui suis nugis proculcaverunt naturales potentias & impotentias solum inesse materia: ex quorum opinione satis abscondendum esset naturalem ad scientiam indispensandam igniculum, seu virtutem inesse materia:, quod est absurdum. Hos videat lector ingenuus maximè delirare, & à recto deflectere, qui hac Philosophi enuntiatione: Anima nostra in principio suæ creationis est tanquam tabula rasa, in qua nihil est depictum; sunt ausi affirmare naturales potentias, & impotentias non inesse

animæ . An Philosophus eos impulerit ad id temere dicendum ? Non sanè, sed imperitia & eorum cæcitas qui minus quàm decet, Aristotelem intelligunt. Fateor, nec diffitentur optimi interpretes , animã rationalem in principio suæ creationis non esse insigni virtutũ moralium & scientiarum specimine depictam : non eo tamen inficias, quin natura condonauerit animæ quasdam virtutes naturales , & quædam præparamenta, quibus dum ratio adoleuerit & consummatio facta sit, absolutam virtutũ moralium perfectionem sibi acquirere possit . Vnde Philosophus dicit cap. septimo secundi Magnorũ Moralium: Pueris citra rationem quasdam prius exoriri affectuũ appetitiones ad honestum : rationem vero posterius aduenientem ac ratiocinantem , discernentẽque efficere vt honesta peragantur. Et vera appetitio naturalis & ipsa ratio eo amore & subsidio se mutuo fouent , vt ex Aristotele cap. trigesimo quarto, primi libri Magnorũ Moralium. Non est prorsus sine ratione, naturalis ad virtutem instinctus ac appetitio. Nec rursus citra naturalem appetitionẽ, ratio atq; electio ad modũ perficitur vt sit virtus. ¶ Dices, Si naturales potentia non insint corpori, quonã igitur pacto cognoscemus corporeã leonis fortitudinẽ, & leporis agilitatem? ¶ Dilutio. Natura rerum sagacissima cum naturales potentias rebus indidit animo latentes , neq; sensibus peruias , quædam signa, seu vestigia sensilia in corpore reliquit, quibus huiusmodi natiuas passioẽs cognosceremus: vt leoni dedit magnas summitates ad percipien-

dum eius fortitudinem corporeā, dedit & latam frontem ad cognoscendum eius frugalitatem & communicabilitatem. Sic habere pilos molles, & dormire oculis apertis, est signum timiditatis in lepore: & exilibus esse tibijs, est nota agilitatis dignoscendæ: habere itidem mollem & delicatam carnem, est signum ingeniositatis. Nam molles carne, aptos mente dicimus: & caro prædura & callosa nobis obrusitatis argumentum obijcit.

Harum autem passionum optimi coniectores, Physiognomones dicuntur: qui certis indicijs res comminiscuntur, & quorum affectuum illis potissimum insita sit pronitas. Si plura de physiognomia requiras, lege dominū Fabrum ad Aristotelem in ultimo cap. secundi Posteriorum.

¶ Ut plenior sit intelligentia pro dicibilibus sub hac qualitatis specie contētis, hoc glossema proculcatum huic loco infigemus. ¶ Terminus significans qualitatem suo subiecto innatam ad bene vel male operandum vel resistendum, ponitur sub ista qualitatis specie, ut risibile, fortis, robustus, durum, molle. *Durum, ut describit Philosophus, est quod habet potentiam non facile secari: Molle uero, quod eiusdem ipsius habeat impotentiam.* ¶ Tertia uero species qualitatis, est passibiles qualitates & passionēs. ¶ Passio, est quædam qualitas facile à subiecto dimobilis: quæ sensui passionem infert, aut quæ à passione infertur. Qualitas sensui passionem infert, quæ suam speciem in sensum diffundit. Qualitas uero à passione infertur, quæ ab affectione vel perturbatione animæ proficiscitur: quare facile admodum col-

liges passionem homonymum esse. Nam aliquādo sumitur pro specie causata in sensu: vt in prima definitionis parte: & interdum pro affectu, seu perturbatione animi: vt in secūda definitionis parte. Albedo vnius hominis est passio: nam est qualitas facile dimobilis à subiecto, quæ sensui passionem ingerit, id est speciem in visum diffundit. Perpendunt exactè perspectiui colorem non posse visu percipi, nisi quandam imaginem seu speciem visibilem in visum diffundat: cuius virtute, color à visu percipitur. Similiter rubedo ex verecundia in faciem prosiliens, est passio. Nam sensui passionem infert, cum suam in oculo similitudinem inducit: & ex passione emanat, puta pudore, animi perturbatione aut affectione. Redditur ratio quare ex pudore seu verecundia emergit faciei rubedo. Nam cum fit verecundia, in os omnis sanguis egreditur: & velut delictum tecturus effunditur. Ita quoque fit rubor ex sanguinis progressionem, atq; in apertum effusione: quocirca si hoc ex innaturali passione cōtigerit, naturali facies rubore perfunditur. Pariter pallor ex timore in faciē demersus, est passio: nam est qualitas facile dimobilis, ex passione, scilicet timore progenita. Fit autem pallor quoties à facie sanguis ad præcordiorū interiora descendit: quare facies destituta sanguine pallescit. ¶ Quoniam aliqua passio infert passionem, & à passione infertur: & aliquid passionem infert, quod tamen non infertur à passione, adnotant docti, Quæcunque ex passione inferuntur, sensui passionē inferre, non tamen ediuerso. Vox

enim & lumen, infert passionem sensui: nam vox diffundit in auditum aliquam speciem qua percipitur: pariter lumen quandam sensui imaginem obijcit, qua dignoscitur. Et neq; vox, neq; lumen infertur à passione, id est ab affectione animi.

¶ Passibilis qualitas, est qualitas permanens, quæ sensui passionem infert, aut quæ infertur à passionibus: vt albedo cygni, nigredo corui: nam albedo cygni est qualitas permanens, cum nūquā, aut difficulter possit à cygno separari: & hæc sensui passionem iniicit, scilicet speciem seu imaginem, qua videtur. Ita est dicendum de nigredine corui. Aliæ sunt qualitates passibiles, quæ à passione inferuntur: vt color croceus ex cholera, aut plumbeus à melācholia. Pallor & rubedo ex naturali complexione qualitates dicuntur passibiles: sunt enim qualitates permanentes, id est durant quousque subiectum exhalet, & à passione inferuntur. ¶ Neque passibiles nūcupari putes, quod earum subiecta aliquid patiantur: neque enim mel, vt dicit Philosophus, quoniā aliquid passum sit, dicitur dulce: sed quoniam gustu aliquam passionem, scilicet dulcedinem componit. Nam patimur dulcedinem, cum aliquid dulce gustamus: simulque secundum caloris & frigoris qualitatem talium sensuum passionem subimus. Passibiles igitur qualitates ab affectibus, perturbationibusq; nomē sortiuntur: quod scilicet aliquam passionem adferāt, suscitentque affectum, vel quod ab aliqua passione, perturbationeq; innascantur: vt tactiles qualitates, quæ sunt caliditas, frigiditas, humiditas, & siccitas: pariter gustatiles, vt dulcedo, amari-

tudo, & ita de alijs qualitibus sensibilibus.

¶ Inquires, an rubedo ex verecundia emergens, & ex timore palledo, dicantur veræ qualitates.

¶ Dicit Philosophus: *Qualitates facile solubiles, & cito transeuntes, passionibus dici: qualitates uero minimè. Nam si quis propter uerecundiam rubore suffusus sit (quoniam rubor ille non permanet) rubeus non dicitur. Quod si rubeus diceretur (ut vult Boëtius) esset quoque ipse rubor passibilis qualitas, quoniam in subiecto corpore diutissimè permaneret. Nunc autem quoniam nullo modo rubeus dicitur, cui à verecundia rubor venit (qualitates autem sunt secundum quas quales vocamur) verecundiæ rubedo non qualitas, sed quædam passio est. Nam si esset qualitas, ab eo rubore rubei dicerentur, id est quales, sed hoc non ita est: non igitur huiusmodi affectiones, quæ non multo durant tempore, qualitates vocantur, sed potius passionibus: passus enim aliquis dicitur, qui propter verecundiam rubeus sit. eadem ratio est in animæ passionibus. Nam si ad momentum quis iratus est, non idcirco iratus dicitur. Licet ira percitus diceretur, aut iratus, si huiusmodi vitium firmiter animo haberet.*

¶ *Quartum uero genus qualitatis est figura, & circa unumquodque constans forma. Quarta species qualitatis secundum unamquamque formam, figuramque consideratur. Et forma numerum, figura uero magnitudinem respicit. ¶ Siquidem forma, est qualitas ex numero, aut numeri proportionem, descriptionemque proueniens. Et de ijs numeris dici reperitur, qui suis unitatibus dispositi, figuras ferme magnitudinum repræsentant: ut si quis scrutetur*

qualis est ternarius? respondebitur trigonus: qualis quaternarius? est quadratus: qualis octonarius? est cubus: hæc enim nomina quāvis re ipsa quātitatem significant, eorum tamen ratio est qualitatis. Sunt enim formæ numerorum trigonus, tetragonus. Et forma de naturæ magnitudinibus dicitur: ut forma hominis, forma equi, secundū quam vnumquodque formosum aut deforme dicitur: imò lineam & superficiem, & trigonum & circulum & huiusmodi pulchra dici volunt: quæ decentius (ut dicit Faber) deformata, delineataque conspiciuntur. Differens de hac specie Boëtius, asserit formam ipsius figuræ quandam qualitatem esse: ut figura quidem est triangulus vel quadratum, forma autem ipsius triāguli vel quadrati quædam qualitas est, sicut ipsa superficies quantitas est, ipsius vero superficiem compositio, qualitas. ¶ Figura est magnitudo termino vel terminis cōclusa: termino, ut circulus & sphaera: terminis, ut triangulus, quadratum: quare spatium quidem ipsum lineis contentum, superficies dicitur, quæ est quantitas. Sed constitutio superficiem qualitas est: & reipsa figura est quantitatis, ratio vero qualitatis. Triangulus siquidem accipitur pro ipsa superficie, designando eam esse tribus lineis rectis constitutam. Et ab hac ratione denominatur ipsa figura esse qualitas, ut si quis interroget qualis est hæc magnitudo: respondetur recte, est circularis, trigonia, tetragonia. ¶ Ambigitur, an rarus, densus, asperus, & lævis, hanc speciem ingrediantur? Nam videntur aliquam qualitatem significare, & in nulla alia quali-

tatis specie recipi possunt. ¶ Dilutio, Ingenio pol-
 lentibus hæc in quarta qualitatis specie non po-
 ni, quin potius non dici qualitates, manifestum
 est: nā positionem, & non qualitatem significant.
 ¶ Spissum id dicitur, cuius partes vicinæ sunt, &
 adeo contractæ, vt inter eas nullum corpus pos-
 sit incidere: vt ferrum, adamas. ¶ Rarum, cuius
 partes à seinuicem separatæ distant: vt inter eas
 alieni generis corpus possit admitti: vt spongiæ
 pumicisq;. ¶ Læue, cuius partes cōplanatæ sunt,
 in rectum iacentes: quare læuitas cognoscetur,
 quoniam partes ita sunt positæ, vt neutra supe-
 ret, neutra sit minor: sed æquis extremitatibus
 iunctæ sunt. ¶ Asperum vero est, cuius partes
 aliquæ supereminent, & aliæ demissæ, inferior-
 resque sunt. Ita quòd in asperitate non est æ-
 qualis partium positio. ¶ Qualia uero sunt, quæ se-
 cundum has denominatiuè dicuntur, uel quomodoli-
 bet aliter ab his. Diffinitionem qualium, qualita-
 tis descriptioni subiungit. Nam in plerisque qua-
 lia denominatiuè dicuntur à qualitatibus, vt ab
 albedine album, à candore candidum, à gram-
 matica grammaticum'. Denominantia, qualita-
 tes dicuntur: vt albedo, nigredo, fortitudo, iusti-
 tia, à connotatione dimota. Sed denominatiuum
 denominatiua, qualia dicuntur: & hæc ultra id
 pro quo supponunt aliquid designant: vt album,
 nigrum, calidum, frigidum. Sed hoc discrimen
 non debet cuiuspiam suadere qualitatem & quale
 duo constituere prædicamenta. Nam Aristote-
 les, vt inquit diuus Augustinus, indifferenter pro
 qualitate quale posuit, & qualitatem pro quali.

Sæpe vnum alterius loco sumimus: vt album est qualitas, & quale dicitur. ¶ Et licet in plurimis & ferè omnibus, qualia denominatiuè dicantur à qualitatibus: euenit tamen nonnunquam aliquo alio modo, hoc est nō denominatiuè ipsa qualia à qualitatibus dici: quare non iniuria adiecit Philosophus qualium diffinitioni particulam hanc, vel quomodolibet aliter ab his. Et bifariam contingit qualia non denominatiue à qualitatibus dici. Primo, Quia qualitatibus indita nō sunt nomina: quædam denominatiuè à qualitatibus dici non possunt, dicuntur tamen qualia: quia aliqua qualitate participant, sed nō secundum eam qualitatem, ex qua (si his esset qualitatibus nomen positum) poterant appellari: vt in ea qualitate, quæ secundum naturalem potentiam dicitur. Illi enim quanq̃ quales dicantur ab ipsa naturali potentia seu quadam habilitate natiua, ipsi tamen nullo nomine proprio nuncupantur. Vt cursor & pugilator: vt quædam natiuam potentiam designant, qualia nō denominatiuè dicuntur à qualitatibus, quodd illis naturalib⁹ potentijs indita nomina non sint. Interroganti cur aliquis dicitur cursor si non currat, respondemus secundum potentiam naturalem: quia habet natiuam currendi habilitatem. Pariter si quis quærat cur pugilator dicitur, qui nōdum arte pugilatoria affectus est, respondebitur: quia habet naturalem artis pugilatorię potentiam: quare & cursor & pugilator solum dicuntur quales à naturalibus potentijs. Secundo qualitatibus indita sunt nomina, ab his tamen qualia denominatiuè non dicuntur: eo q̃

ex illis nominibus non deducuntur : vt studiosus à virtute qualis dicitur : quòd eum significet qui sibi virtutem nactus est , non tamen denominatiuè : nam studiosi nomen , à virtutis nomine nō deducitur. Et in denominatione quærendū est, vt semper idem permaneat nomen. In eo autem qui virtute participat, nulla virtutis denominatio est . vt qui bonitate participat , bonus dicitur : qui iustitia, iustus . qui vero virtute participat, aut probus, aut studiosus nominatur, sed neque probus, neque studiosus à virtute. Notum igitur est qualia denominatiuè à qualitatibus appellari, aut quomodolibet aliter ab ipsis , vt non denominatiuè, sed aliquoties quidem secundum potentiam, aliquoties verò secundum eandem qualitatem virtutis . *Cineſt autem contrarietas secundum qualitatem.* Prima proprietas , verius tamen communitas , qualitatis : Qualitati aliquid est contrarium, hoc est, dicibili qualitatis aliquid contrariatur: vt albedini cōtrariatur nigredo, & calido frigidum . & nomine qualitatis complectimur & quale . Non enim solum qualitatis denominantibus aliquid pugnat , sed etiam denominatiuis. Nam quemadmodum caliditas & frigiditas contrariantur, ita calidum & frigidum. Hæc cōmunitas non omnibus qualitatibus conuenit. Nam circulus , neque quadratum , neque vlla figura cuiquam contrariatur: & tamen figura est qualitas . Pariter rubro & pallido & alijs medijs coloribus nihil contrariatur. Nec mirandum est si albedo & nigredo contrariantur, non autem nigredo & rubedo. Nā albedo & nigredo

colores sunt extremi, & maximè inter se distant, quare contraria dicentur : medij autem colores cum non maximè distent, contraria non habent: quare rubro nihil erit contrarium. Quòd si rubro cōtrariaretur nigredo, & ipsi albedini nigredo contrariaretur, vnius rei duo contraria inuenirentur, quod est falsum. Nec soli congruit qualitati recipere contraria : nam actioni aliquid est contrariū, vt calefactioni aduersatur frigefactio. Ex his manifestum erit cōmunitatem seu conuenientiam qualitatis potius dici q̃ proprietatem.

¶ Huic communitati subiungit Philosophus vnā regulam ad cognoscendum contraria sub eodem genere, poni. *Regula. si contrariorum alterum fuerit qualitas, & reliquum erit qualitas : ut si iustitiæ cōtraria sit iniustitia: qualitas autem est iustitia, manifestum erit iustitiam esse qualitatem, cum nihil aliorum prædicamentorum sit.* Et hæc regula non solum qualitatibus cōpetit, verum & his quæ nuncupantur qualia.

¶ Obijcies, Contraria proprijs nominibus, non contrarij priuatione nominantur : sed iustitia & iniustitia proprijs nominibus non appellantur : & iniustitia priuationis vocabulo profertur, igitur iustitia iniustitiæ non contrariatur.

¶ Dilutio, Si Maior argumenti concederetur, foret dicendum liberalitatem & illiberalitatem non contrariari : & ita virtuti moralī nihil contrariaretur, quod fieri nequit. Multæ enim sunt habitudines priuationis vocabulo prolatae: vt temperantiæ intemperantia, & prudentiæ imprudentia, quæ tamen à contrarijs nō reijciuntur, nec oportet omnē priuationē negationi proferri.

Surditas enim cum sit auditus priuatio, sine negatione profertur. eodem quoque modo cæcitas. Excerpta est hæc solutio ex Boëtio. *Ususciunt autem qualia magis & minus.* Secundam protulit qualitatis communitatem, qua magis & minus qualitati seu quali accommodari voluit. Hanc autem communitatem de dicibilibus qualitatis interpretari licebit, & sensus erit: Dicibilia qualitatis prædicantur cum istis aduerbijs magis & minus intensionem & remissionem designantibus: vt album altero magis aut minus album dicitur, & iustum altero magis vel minus est iustum: hæc enim intensionis crementum & decrementum sibi vendicant. Verè communitas dicitur, cum sit commune qualitati aut quali, magis aut minus amplecti: non tamen proprium, cum nec soli, nec omni congruat qualitati posse intendi aut remitti. Actioni enim & passioni (vt his verbis calefacere & calefieri) competit suscipere magis & minus. Et istis qualitatibus triangulus, quadratum, non congruit intendi & remitti: non enim vnus circulus est magis aut minus circulus. *Emergit dubitatio, an iustitia dicatur magis aut minus iustitia: pariter an sanitas dicatur magis aut minus sanitas, & de alijs affectionibus quis poterit ambigere, si intendi aut remitti possint.* In hac dubitatione diluenda, tres dicit fuisse sententias Boëtius. Quædam dicebat in omnibus secundum materiæ habitudinem reperiri posse magis & minus. proprium nanque esse materiæ corporumque, intensione crescere, & minui relaxatione. Hanc sententiam nonnulli Platoniorum aperuerunt.

Alia verò quæ secundū certissimas verissimasq; artes atque virtutes, nō diceret esse magis & minus: secundum autem medias dici posse, vt hæc ipsa grammatica atque iustitia non dicitur magis grammatica, neq; magis iustitia: esse autem quasdam alias mediocres artes, in quib⁹ idipsum posset euenire. Tertia est Aristo. in hac communitate, sententia, quæ iustitiam, iniustitiam, sanitatem, & ita de similibus nulla intensione crescere, nec diminutione decrescere, putat: sed earum denominatiua incremento subuehi & decremento imminui. Non enim quisquam dicit magis esse sanitatem, alia sanitate: aut aliquam iustitiam altera esse magis, tamen ea quæ secundum has qualitates dicuntur, suscipiunt magis & minus: vt quempiam dicimus altero iustiores, alium saniores, aut magis sanum. Suscipiunt igitur qualitates magis aut minus secundum se, aut sua denominatiua. *¶ Similia uero & dissimilia, secundum solas dicuntur qualitates.* Innuit tertia proprietas proprium esse qualitatis, secundum eam quidpiā dici simile aut dissimile. Nihil enim ab alterius prædicamenti virtute, dicitur simile aut dissimile: quare erit maximè propriū & peculiare qualitati, vt secundum eam aliquid dicatur simile aut dissimile. Et quemadmodum à sola quātitate res denominatur æqualis aut inæqualis; ita à sola qualitate res dicitur similis aut dissimilis: vt Socrates albus, est similis alteri homini albo, & dissimilis homini nigro, ita cygnus est similis niui secundum albedinem, & dissimilis coruo secundū albedinem. intueris manifestè eandem substantiā

secundum eādem qualitatem esse vni similem & alteri dissimilem. ¶ Adnotabis diligenter similitudinem aut dissimilitudinem per se in qualitatibus considerari: & per accidens in substantijs, quemadmodum æqualitas & inæqualitas per se quantitati competunt, & alijs per accidens: vt albedo per se albedini est similis: & nigredini dissimilis. Res autem alba, per accidens: hoc est ratione qualitatis, alteri est similis aut dissimilis. ¶ Similitudo est rerum differentium similis qualitas. Dissimilitudo vero, diuersa. vt albedo cygni, comparata albedini niuis est similitudo: nā est rerum differentium cygni & niuis similis qualitas, & eadem albedo nigredini corui comparata, est dissimilitudo: cum sit duarum rerum differentiū cygni & corui diuersa qualitas. Et hæc similitudo duabus substantijs accommodatur facta suarum qualitatum comparatione. ¶ Dices, Simile est ad aliquid, quoniam igitur pacto ad qualitatem decumbit? ¶ Dilutio, Quauis simile ad aliquid sit: tamen hoc ipsum quod dicimus simile, nō dicimus nisi quod quale est. ¶ Suboritur ambiguitas, Cur Philosophus qualitatum numero ascripsit plerumque eorum quæ sunt ad aliquid? ¶ Dilutio, Id non absurde positum est: nec quid vt admireris, adfert. Primo, *Quia pene in omnibus talibus genera ad aliquid dicuntur: nihil autem eorum quæ sunt singularia.* Intellige homonymè, & nō in eadem significatione species non esse ad aliquid: & genera esse ad aliquid, ac si diceres has species homo, equus, non esse quantitates: attamen aliud quod earum genus quantitas est, vt corpus: non

tamen in ea significatione, qua genus illarum species est. Est etiam disciplina genus ad aliquid. Nam disciplina alicuius est disciplina. sed eius species, vt grāmatica, musica, non dicuntur ad aliquid. Nam grammatica non dicitur alicuius grāmatica: nec musica alicuius musica, nisi forte secundum suum genus. vt grāmatica alicuius est scientia, & musica alicuius est disciplina: id tamen non fit per se ratione speciei. quòd illæ species re ad aliquid dicantur: quòd si per se non referantur, ad aliquid non erunt, sed qualitates: nā secundum eas quales dicimur.

¶ Scientes enim nuncupamur, quòd singulas aliquas scientias adepti sumus. Secundo, Si contingat vnum & idem & quale & ad aliquid esse, nihil erit incommodum aut inconueniens ipsum homonymè, & diuersa ratione in vtrisque generibus collocare.

¶ De actione & passione, Scholia.



Via Philosophus Physicorum tertio de actione & passione plenius differit: pauca admodum ad hunc locum de actionis & passionis prædicamentis adferens, solum naturæ eorum duas adiecit communitates: quas, declaratis illarum vocum significationibus, explicabimus.

¶ Actio quamuis diuersas habeat significationes, vt in Physicis videbitur, quas cōsulto nunc omittere volui: hoc tamen in loco dicemus, Actionē significare rem esse ab aliquo: Passionē vero rem

esse in aliquo . Et nihil actionem dici putamus, nisi significet rem designando eā ab agente proficisci: vt calefactio dicitur actio, quatenus significat calorem ab igne aut alio quouis agente produci. Similiter nihil censetur passio, nisi significet rem importando eam in aliquo esse aut recipi: vt calefactio dicitur passio, quatenus designat calorem in aqua aut alio subiecto recipi. ¶ Dicibilia actionis & passionis licet pro eadem re accipiantur, diuersas tamen habent rationes: & suum discrimen à ratione suscipiunt. Nā dicibilia actionis, denotant aliquid esse ab aliquo: vt calefactio à verbo actiuo descendens: importat calorem esse ab igne aut calefaciente. Pariter generatio à verbo actiuo, denotat formā quæ generatur esse ab aliquo puta generante. Si enim talis forma à generante nō exoriretur, ab actione repelleretur. Passionis vero dicibilia significant rem, designando eam esse in aliquo: vt calefactio à verbo passiuo vel passiuæ significationis, significat calorem recipi in aliquo, puta homine vel aqua aut alio subiecto. Similiter generatio à verbo passiuo, significat formam recipi in aliquo subiecto: vt forma substantialis bruti, quatenus à generante proficiscitur, censenda est actio: & est passio in eo quod recipitur in materia bruti. ¶ Obluctaberis, probando calefacere non significare rem esse ab agente, potissimum ab igne, sed probatur oppositum. Dicit Philosophus cap. vndecimo primi libr. magnorum Moralium, Neque enim quodpiam inanime dicimus agere: neq; item animalium (vno homine excepto) vllum. ¶ Dilutio,

ignis agit actione naturali seu physica. Aristoteles autem eo in loco innuere vult, nullum inanimatum agere actione studiosa seu morali, quæ ex intellectu & consilio fit. ¶ Perspicue licet intueri eadem voce actionis & passionis esse dicibilia, significatione tamen distincta: hæc enim passiuæ, illa vero actiuæ significant: ut generatio & calefactio actionis & passionis dicibilia sunt. Et interroganti in quo prædicamento huiusmodi dicibilia suam sedem habent, facile erit respondere. Nec rebus, sed rationibus disiunxit Philosophus vnum ab altero prædicamentum.

¶ Consideres, nonnulla denominatiua voce actiuæ nuncupari, significatione tamen passiuæ: ut videre, audire, intelligere. Est enim videre, visionem in se recipere: nam quicquid videt, patitur: quod si videre esset visionem producere, dicere liceret, colorem videre, quod est absonum. Similiter audire, non est auditionem producere: aliter sonus audiret, sed est auditionem in se recipere. Videns tamen & audiens cum denotant naturalem potentiam videndi & audiendi, recipiuntur in secunda specie qualitatis. Pariter intelligere est intellectum in se recipere: saltē loquendo de intellectu potentiae. & licet hæc verba & similia voce sint actiuæ, non tamen constituentur in actione: quia accommodatius ad significationem inspiciendum est quam vocem. Cum igitur significatione passiuæ sint, recipientur in prædicamento passionis. Nec te deludat stolidum hoc argumentum: Sunt verba actiuæ, igitur in genere actionis. non enim actionem ex voce perpendimus, sed signifi-

atione. Sunt etiam quædam verba voce passiuæ, & significatione actiuæ: vt operari, medicari. & hæc licet voce passiuæ sint, non propterea descendunt ad prædicamentum passionis, sed actionis, quia significant rem esse ab aliquo. aliqua tamen inueniuntur indifferentis significationis, qualia sunt communia quæ promiscuè & indifferenter recipientur in actione & passione: nõ tamen neglecta & ommissa actionis & passionis diuersitate. ¶ *Prima communitas actionis & passionis: Agere & pati recipiunt contraria.* id est, actionis dicibilia inter se contraria sunt: vt calefacere & frigefacere. Similiter dicibilia passionis inter se pugnant: vt calefieri & frigefieri.

¶ Certabis, Calefacere & frigefacere eidem insunt, igitur non sunt inter se contraria. antecedens probatur: Aqua tepida calidiuscule frigefacit: & frigidiuscula calefacit, igitur eidem insunt.

¶ Hac ratione minutissima, quidam ex imperitorum officina obstupefacti & concitati, ausi sunt temere Philosopho obstitentes, dicere hæc verba calefacere & frigefacere non esse contraria, sed nihil video vnde musca debebant deterreri. Et præptæ illi obiectioni dilutio adhiberi solet. Quauis aqua tepida calefaciat frigidiuscula, & calidiuscule frigefaciat: nõ tamen calefacit nec frigefacit. nec illud argumentum est logicum: aqua tepida frigefacit remisse seu frigefacit calida: igitur frigefacit. Sicut non oportet aliquod lignum esse album, si sit album remisse, aliter hypothesi quadam esset album & nigrum discretim.

¶ Quæres si aqua tepida non calefaciat nec fri-

gefaciat, quid igitur facit illa aqua?

¶ Dices eam tepefacere. at sicut tepiditas est remissa caliditas, & remissa frigiditas in eodem subiecto quæ non sunt qualitates contrariæ: ita tepefacere est remisse calefacere, & remisse frigefacere: quæ non sunt simpliciter contraria. Pugnant autē intense calefacere, & intense frigefacere: sicut intensa caliditas & intēsa frigiditas.

¶ Poterat dici aquam tepidam nō calefacere frigidiuscula, nec infrigidare calidiuscula, sed ambo tepefacit. ¶ Dices, Tepefacit frigidum, igitur remisse calefacit: & tepefacit calidum, igitur remisse infrigidat: & si remisse calefaciat & remisse frigefaciat, nunquid calefaciet & frigefaciet?

¶ Dilutio, Quauis calefaciat remisse & frigefaciat remisse, nō tamen calefacit nec frigefacit. Et licet cōcedatur aquā tepidā calefacere remisse & frigefacere remisse, nō tamen fateri oportet contraria eidem inesse: quia calefacere remisse & frigefacere remisse, non aduersantur: sicut remisse album & remisse nigrum. ¶ Hæc communitas non est dicenda proprietas: nō enim omni actioni & passioni competit. Nam secare & percutere non habent contrariū: neq; secari & percuti. Pariter rubefactioni & rubefacere nihil est contrarium: vt neq; rubeo, & medijs coloribus. Neq; soli cōuenit actioni & passioni. Nā qualitati cōgruit.

¶ *Secunda communitas, Agere & pati suscipiunt magis & minus*, id est, dicibilia actionis & passionis prædicatur cum istis aduerbijs magis & minus: vt ignis magis calefacit quàm aër. Aqua magis calefacit quàm aër. Nec aliquo modo est

propria actioni & passioni: Nō enim soli competit, cum dixerim⁹ qualitatem suscipere magis & minus: nec omni conuenit actioni & passioni, ut generare & corrumpere nō suscipiunt magis aut minus, neque generari & corrumpi. Et quāuis vni sint decem filij, alteri vero solum quinq;, vnus non magis generat quā alter. Nam generatio est de non esse ad esse mutatio, quæ nec magis nec minus admittit.

¶ Dicit diuus Augustinus agere & pati ex qualitatis fonte profluere. Id enim quod calidum facit, calidum sit necesse est, calidū verò quale esse cognoscimus. Similiter quod calidum sit, passio-
ne sui accipit qualitatem: quare perspicuum euadet, agere & pati genere esse similia, contraria vero qualitate: nec modo ordine, verum etiam ratione qualitati iunguntur. Nam recipiunt eadem quæ diximus recipere qualitatem. Contrarietate enim non respuunt, quam qualitas recipit: & magis & minus admittunt, quorum qualitatem diximus receptricem, hæc ille. ¶ Docte admodum & cōsiderate Aristoteles de primis sex prædicamentis disseruit: quoniam eorum vocabula per vniuersam Philosophiā disperguntur, & ad disciplinas plurimū conferunt. Vltima vero quatuor prædicamenta: puta quādo, vbi, situm, & habitū, contractiora fecit: & ea paucis perstrinxit. consulto sanè, quod eorum vocabula humanis actionibus, vsui vulgari & opificijs accommodatiora sunt, quā disciplinis & contemplationi. De illis tamen abunde & scite differit Cæsarius, quem habent dialectici præ manibus.

De postprædicamentis Scholia, & primum
de oppositione.



Sicut ex antepredicamentis viam
struxit ad predicamenta paratis-
simam: ita post exactam catego-
riarum discussionem, subiunxit
quædam postpredicamenta, do-
cumenta sanè & adminicula ad
clariorem illorum intelligentiam conducentia.
Quorum oppositio (non quidem propositionum
sed dicibilium) primum sibi vendicat locum. Et
de oppositis, ut ait philosophus, quoties solent opponi
dicendum est. dicitur enim alterum alteri opponi qua-
drupliciter. aut ut ad aliquid, aut ut contraria, aut ut
priuatio & habitus, aut ut affirmatio & negatio. Et
cap. decimo quinti Metaphy. Opposita dicuntur
contradictio, contraria, ad aliquid, priuatio & ha-
bitus. Et quæcunq; susceptiuo amborum (ut in-
quit) non contingit simul adesse. Placuit non
nullis peripateticis dicere annumerationem mo-
dorum oppositionis, diuisionem esse homonymi
in sua æquiuoca: quorum sententię accedit Iaco-
bus Faber. Quoniam Aristo. ita dixit, de opposi-
tis quoties solent opponi dicendum est. hoc idem
quoties ad multiplicatē pertinet æquiuocatio-
nis. Qui oppositam & aduersam huic foueret
sententiam, non abnegaret diuersum esse con-
tradictionis, contrarietatis, & ita de reliquis op-
positionem: nihilo tamen concludendum esset
oppositorum diffinitionem esse æquiuocam.
Opposita enim dicuntur quæ simul de eodem

& eodem modo verificari nō possunt: aut si maior diffinitionem Philosophi, Quæcunq; susceptivo amborum non cōtingit simul adesse. hæc autem diffinitio seu verius descriptio, cōuenit equatione cōtrarijs, cōtradictioni, & reliquis oppositorum membris, in hanc descendit sententiam Boëtius, qui ita ait: Si ea quæ sub oppositione ponuntur, oppositionis nomen diffinitionemq; suscipiunt: quid est dubiū oppositionem non æquiuoce prædicari? Hoc tamen certamen relinquimus lectoris arbitrio, qui discussa sagaciori mentis scrutinio utraq; opinione, cui volet æquius accedet. ¶ Sed ad enodandam oppositorū diffinitionem redeamus. ¶ Opposita dicuntur, quæ simul de eodē & eodem modo verificari nō possunt: id est, Sūt quædā dicibilia quæ de eodē singulari respectu eiusdem verificari non possunt, vt sanū & egrū. Nam de eodē singulari verificari non possunt. Non enim Socrates est sanus & æger, nec quicq; aliud pariter videns & cæcum, calidum & non calidū. ¶ Hæc particula eodem modo, haud perperā adiecta est: nam quædam opposita, vt relatiua, de eodem singulari verificentur, non tamen eodem modo respectu eiusdem. vt quāuis Socrates aut quiuis alius hominū sit, pater & filius: non tamen respectu eiusdem: ita dicendum est de dimidio & duplo, quæ quatuor accommodantur. Nam quatuor, dimidium est ad octo, & duplum ad duo: non tamen cuius est dimidiū, est duplum. Quare inficiari nemo poterit, oppositorum diffinitionem non competere relatiue oppositis. ¶ Quæcunq; igitur ut ad aliquid opponuntur, ea ipsa

quæ sunt oppositorum dicuntur aut quomodolibet aliter ad ipsa. ¶ Diffiniuntur relatiuè opposita per analogiam primæ diffinitionis ad aliquid: scilicet sunt dicibilia quæ oppositorū dicuntur, id est verificantur de seipsis cum genitiuo sui oppositi, vel quomodolibet aliter ad aliud. hoc est, cum aliquo obliquo, vt pater & filius. Pariter album & albedo relatiue opponuntur. ¶ Relatiua autem æquiparantiæ quæ de seipsis cum suo ipsorū obliquo verificantur, vt æquale, simile, nō sunt relatiue opposita: quia non referuntur ad alia. Nā simile nō dicitur dissimilis simile, aut æquale inæqualis æquale. Sed non nihil habet cōueniētiæ cū relatiue oppositis: quia non dicuntur de eodem simile & dissimile, respectu eiusdem: nec æquale & inæquale. quare reuehētur ad ea quæ proprie sunt relatiue opposita. ¶ Alia sunt relatiue opposita proprie, & possunt diffiniri per analogiam secundæ diffinitionis ad aliquid, quodd sunt opposita quibus hoc ipsum esse, est ad aliud quodammodo se habere: vt duplum & dimidium, pars & totum. hanc diffinitionem soli termini de genere ad aliquid recipiunt. ¶ Discreta facit Aristoteles quæ ad aliquid opponuntur, ab his quæ opponuntur vt contraria: nam quæ ad aliquid opponuntur, quodā modo ad seinuicem dicuntur: vt duplū dimidij duplū est: & dimidium dupli dimidium. *Quæ uero aduersantur, ut contraria, nullo modo ad seinuicem dicuntur: sed contraria sibi inuicem dicuntur: ut album & nigrum contraria, non referuntur ad seinuicem, sed sunt sibi inuicem contraria: non enim album nigri albū est, sed contrarium Neque bonum mali bonum*

est, sed contrarium. ¶ Contraria sunt quæ sub eodem genere posita, maximè à se inuicem distant, & eidem subiecto vicissim insunt, à quo mutuo se expellunt, nisi alterum eorum insit à natura. Illa sub eodem genere posita sunt, quæ sub eodem prædicamento continètur: quare diuersorū prædicamentorum dicibilia non contrariantur. Maxime distant, hoc est designant formas maximè ad inuicem repugnantes & differentes, si de ipsis denominatiuis fiat sermo: si vero de contrarijs denominantibus agatur, maximè distant, hoc est maxime repugnant & ad inuicem aduersantur. Eidem susceptibili vicissim insunt: hoc est successiue de eodem singulari verificari possunt, si talia fuerint denominatiua. Si vero denominantia, vicissim insunt hoc est successiue eidem subiecto accidere seu inhærere possunt, à quo mutuo se expellunt, hoc est non possunt eidem singulari simul inesse: nec prædicatione, nec denominatione, nisi alterum insit à natura, id est ab exortu naturæ cuiusdam cõgenitum. Vel, ut dicit Clichtoueus, Nisi alterum eorum fuerit accidens inseparabile naturaliter subiecto conueniens. De contrarijs exemplum: ut maxime album & maxime nigrum, sunt enim sub eodem genere posita, id est sub eodem prædicamento: pariter sub eodem genere propinquo, scilicet colorato: & maxime inter se distant, quia designant formas maxime inter se repugnantes. Vicissim insunt, ut de pariete successiue verificari possunt: & mutuo se expellunt, quia vnius affirmatio alterius est negatio. Nam si paries sit maxime albus, facile est depre-

hendere, maxime nigrum ab eo remoueri. Et nulum illorum designat formā accidentariam, quæ infit parietī à natura. ¶ Cum substantia quædam habet à natura qualitatem sibi congenitam, non oportet illi contraria vicissim inesse : vt cum fuerit igni caliditas congenita, nō potest natura frigiditas ei inesse : nec aquæ à natura, & à suæ naturæ dexteritate potest caliditas inesse, cum sit natura summè frigida. ¶ Contrariorum quædam sunt, quæ solum adesse suis subiectis nata sunt, non etiam prædicari : vt albedo, nigredo, caliditas, frigiditas. Nam horum nihil de substantia prædicari natum est : cum nulla substantia sit albedo, aut nigredo, aut alia qualitas : illæ tamen qualitates natæ sunt suis adesse subiectis. Alia sunt, quæ & prædicari & inesse dicuntur : vt denominatiua illorum, puta album, nigrum, calidum, frigidum. Ideo Aristoteles contraria immediata definiens adiunxit, vt in quibus nata sunt fieri, aut de quibus prædicari : vt contrariorum cum denominantium, cum denominatiuorum diuersitas deprehenderetur. ¶ Et cum Philosophus ex ijs quæ maxime sunt talia, declaret ea quæ magis & quæ minus sunt talia : per maximè contraria & simpliciter, ostendit quæ aliorum magis quæue minus sunt contraria. Abundè declarat cap. 10. 5. Metaphysic. contrariorum diuersitatem, vbi dicit contraria esse diuersa specie, aut omnia, aut ea quæ primo dicuntur, diuersa specie. sunt & ea, quorū in generis vltima specie, diuersæ sunt rationes, vt homo & equus, quæ genere quidem sunt indiuidua, at rationes habent diuersas, Contraria

non simpliciter ex maximè contrariorum definitione, sola hac exēpta particula maximè, cognoscuntur. ¶ Pōnit Boëtius discrimen inter contraria & repugnantia. Contraria definita sunt: repugnantia contrariorum sunt consequentia, verbi causa: Contraria sunt dormire & vigilare: stertere dormientibus adiunctum est, quare stertere & vigilare sunt repugnātia. Pariter prudētia cōtraria est imprudētiā. fraudibus ac imposturis obnoxiū esse, imprudētiā sequitur: quare fraudibus ac imposturis obnoxiū esse, repugnat prudentiā. ¶ Contrariorum partitio in contraria immediata & mediata. ¶ Contraria immediata, sunt contraria, quorum necesse est alterū suo proprio susceptibili inesse. Proprium appellant susceptibile, de quo disiunctum ex ipsis vniuersaliter prædicatur, vt sanum & ægrum. Nam necesse est alterū illorum susceptibili subiecto, puta animali inesse: cū hæc sit vera, omne animal est sanū, vel ægrū. Verum animal, cum vtrunque suscipere possit, non abs re proprium eorum susceptibile censetur. Nec aliter quàm par & impar respectu numeri: nam omnis numerus, est par vel impar, & cōtrā. ¶ Sanum vocant medici, quod in suis qualitatibus & humoribus commodè temperatum est. ¶ Aegrum bifariam definiunt. Primo, Aegrum quod in suis qualitatibus, & humoribus intemperatum est. Secundo, quod in aliquo huiusmodi deficiens, manifestam lēSIONEM habet. Primo cæpit Aristoteles, cum dixit sani & ægri nullum esse medium. Secūdo, Galenus & cæteri medici, qui dixerunt inter sanum & ægrum aliquod medium

posse occurrere: cum videlicet animalis qualitates, & humores, aut huiusmodi lapsa sunt, sed apertam non præferunt læsionem. Tale fit per abnegationem medium, quod non sit ægrū, neq; sanum. Sed ne falcem in alienam messem mittere videamur, de his subtricebimus, quæ forsitan ab instituto nostro aliena sunt.

¶ Contraria mediata, sunt quorum non necesse est alterum suo proprio susceptibili inesse: sed intercedet medium, quod si nominatum fuerit, medij nominati cōtraria dicentur. Si vero per abnegationem sumatur, medij innominati contraria nuncupabuntur: vt album & nigrū, respectu animalis contraria sunt mediata: non enim necesse est alterum illorū animali inesse: cum non oporteat omne animal esse album vel nigrum: quippe fieri potest & nihil prohibet, animal esse flauum, aut fuluum. Sic iustum & iniustum ad hominem contraria sunt mediata, cum non sit necesse alterum illorū inesse homini. Nam puer, nec est iustus, nec iniustus, cum in ea teneriuscula ætate nondum exerceat actiones iustitiæ aut iniustitiæ.

¶ Album & nigrum contraria sunt mediata medij nominati & affirmatiui. Nam flauum, fuscum, purpureum, puniceum, media sunt illorum extremorum nominata. Pariter tepidum, medium est positum inter calidum & frigidum.

¶ Iustum & iniustum cōtraria sunt mediata medij innominati, cum non sit positum medium inter illa affirmatum. Sed sola negatione exprimendum est: quod nec est iustum, nec iniustum. Similiter bonum & malum mediata sunt con-

traria medij innominati . Nullum enim affirmatum medium eorum interstes est: sed negatione vtriusque extremi vtendum est: quod nec est bonum neque malum: vt puer anniculus, nec est bonus nec malus . ¶ Priuatio uero & habitus dicuntur quidem circa idem aliquid : ut uisio & cæcitas circa oculum. ¶ Priuatiue opposita sunt habitus & priuatio, quæ habent fieri circa idem ordine irrepressibili, & tempore à natura determinato.

¶ Habitus hoc in loco affirmatione designatur, & est terminus qui nullam negationem includit: vt videns aptitudinem videndi denotans habitus dicitur: quia affirmatione exprimitur, & nullam negationem includit. ¶ Priuatio, uoculo priuationem importante designatur, & est terminus qui negationem includit priuantem.

¶ Negatio priuans : est quæ negati potentiam, seu aptitudinem importat . Exemplum de priuatiue oppositis, videns & cæcum . Nam sunt habitus & priuatio: videns enim est habitus, naturalem denotans videndi potentiam, qua significatione concedimus dormientem esse videntem. qui natus est in luce videre . Et talis habitus sub secunda qualitatis specie recipitur: licet alio in significato quo significat visionem esse in aliquo, ad prædicamentum passionis descendat . Et cæcum est priuatio, cum sit terminus priuātem includens negationem, sensum ei respondentem explicando : vt cæcum ex Aristotele, est animal quod non videt cum sit natum videre : hoc est quod non intuetur tempore sibi à natura ad videndum determinato. Hinc colligimus catulum

ante nonum diem non esse cæcum: cum non sit tempus à natura præfixum vt videat . Si tamen post nonum diem non videat , cum in illo tempore sit natus ad videndum, dicetur cæcus . Deinde videns & cæcum habet fieri circa idem, puta oculum, seu aptitudinem videndi. Nam generatim, ut inquit Philosophus, circa quodcunque natus est fieri habitus, circa idem , & utrunque fieri debet, habitus uidelicet & priuatio : quare cæcitatem nulli alteri à visu sensui accommodare poteris : quia suus habitus, puta visio, soli visui ascribitur.

Ordine irregressibili: hoc est à priuatione ad habitum, per naturæ potētiam , impossibile est mutationem fieri: licet ex habitu in priuationem fieri possit mutatio . Non enim possibile est à cæcitate in visum mutationem & regressum fieri, nec certandum puto de diuina potentia , cum ex sacris proditum sit literis , deum humanæ naturæ amantissimum cæcis visum restituisse , & eos videndi radijs fulgidissimis perfudisse. Vnde Matthæi nono memorię proditum est Christū duos homines à cæcitate liberaſſe, qui ingenuè fatebātur deum id posse efficere . Nec sum nescius id vetulam non latere, sed sit conflictatio de naturæ physicæ potentia, de qua Philosophus loquitur.

Pariter audiens & surdus priuatiuè opponuntur: vt simili probatione suadere poteris.

¶ Definitio priuatiuè oppositorum datur de priuatiue oppositis potentia, in quibus negatio priuans occulta, negat potentiam, sed aptitudinem relinquit: vt cæcum, quod natura non potest videre, tamen natum est videre. Surdum quod non

potest audire, aptum tamen est audire: huius sententiæ est Clichtoueus, dicit tamen Philosophus edentulum dicimus, non quod non habet dentes, & cæcū non quod nō habet visum: sed quod non habet quando natum est habere: aliqua enim ex natiuitate, neque dentes habent, neq; visum: sed non dicuntur edentula, neque cæca: hæc ille.

¶ Priuatiuè opposita actus, sunt habitus & priuatio, quæ habent fieri circa idem ordine regressibili. Et in illis negatio priuans, solum actum negat, & negati potētiam importat, vt sunt sonorū & silens, luminosum & tenebrosum. Sunt enim habitus & priuatio, cū sonorū & luminosum sint habitus, silens & tenebrosum priuationes: & habent fieri circa idem, scilicet aerem, ordine tamē regressibili. Nam vt ex sonoro fit aer silens, ita ex silēte fit sonorus: & sicut ex luminoso fit tenebrosus, ita ex tenebroso fit luminosus. Et silēs dicitur quod non est, sed potest esse sonorum: tenebrosus quod non est, sed potest esse luminosus.

¶ Obijcies, A priuatione (vt inquit Philosophus) ad habitum fieri mutationem impossibile est: igitur ex tenebroso aere non potest fieri luminosus.

¶ Dices Philosophum loqui de priuatione eorum quæ simpliciter priuatiuè sunt opposita, quæ dicuntur priuatiuè opposita potentiae.

¶ Dissidēt priuari & priuatio, pariter habere habitū & habitus. Homo enim qui priuatur potentia seu aptitudine vidēdi, non est sua priuatio, nec habere visum est habitus. quod variè ostenditur. Primo, *Cæcum esse non est cæcitas, sed est priuatum esse: & cæcitas priuatio. & uisum habere nō est uisio.*

Non igitur idem erunt priuatum esse & priuatio:
 itidem habitum habere, & habitus. **¶** Amplius, si
 cōtingeret idem esse cæcum & cæcitatem, utraque de
 eodem prædicarentur: quod est falsum. Nā cæcus di-
 citur homo, cæcitas vero nullo modo de homine
 prædicatur: ita habere visum non est visio: nam
 homo habet visum, & nō dicitur visio. Et ait Boë-
 tius, aliud est habitus, aliud qui habet, & aliud ha-
 bere habitū. Nā habitus, vt visus, qualitas quædā
 est, & naturalis potētia vt videtur: qui habet, ho-
 mo est: & habere habitū, & homo & qualitas est.
 Hinc cōsidera habitū & qui habet, re ipsa duo es-
 se: sed qui habet, & habere habitū sola ratiōe duo,
 vt adnotauit Faber: nā pro eodē sumūtur. Et pri-
 uatio & cæcitas, carētia visus est, & qui habet, ho-
 mo est: & priuatū esse, & homo, & hmōi carētia.
¶ Et quanuis non sint idem, priuatum esse & esse
 priuationem: & habere habitum, & ipsum habi-
 tum: illa tamen cum priuatione & habitu aliquo
 modo cōueniunt. Nam vt habitus & priuatio in-
 ter se priuatiuē opponuntur, ita priuatum esse &
 habere habitum. sicut enim cæcitas visui oppo-
 nitur: ita cæcum esse ei quod est visum habere,
 oppositū est. **¶** Quoniam sermonem infleximus
 ad priuatiue opposita, congruum erit ostendere
 quonam pacto priuatiuē opposita, non vt relati-
 ue opposita pugnant. **¶** Relatiuē opposita ea ipsa
 quæ sunt oppositorum dicuntur, aut aliquo modo ad
 illa: sed priuatiuē opposita oppositorum non dicun-
 tur. Non enim uisus cæcitatē est uisus, nec cæcitas
 uisionis cæcitas: quanuis uisionis priuatio sit, igitur
 priuatiuē opposita, non ut relatiuē opposita op-
 l. ij.

ponuntur . Amplius relatiuè opposita, ad conuertentiam dicuntur : at priuatiuè opposita ad conuertentiam non dicuntur: ut cæcitas minimè ad conuertentiam cum uisione dicitur , igitur manifestū est aliā esse & diuersam priuationis à relatiuè oppositis oppositionem. ¶ Habent & priuatiuè opposita diuersam à contrarijs cum immediatis , tum mediatis oppositionem. Ab immediatis quidem hoc discrimine discreta sunt: nam huiusmodi ut in quibus fieri nata sunt , aut de quibus prædicantur , semper alterum insit necesse est : ut sanitatis & ægitudinis necesse est alterum susceptibili , puta animali inesse. Id autem de priuatiuè oppositis neutiquā oportere cognoscetur : neque enim susceptibili alterū eorum inesse oportet. Nam quod nondum natum præscriptum est , & determinatum ad videndum: neque cæcitatem, neque uisionem illi inesse dicimus : ut de catulo ante nonum diem perspicuum euadit, quāuis utriusque susceptibilis sit: non igitur priuatio & habitus opponuntur , ut contraria immediata . ¶ Aliam autem esse priuatiuè oppositorum à contrarijs mediatis oppositionē facile est demonstrare . Nam contrariorum mediatorum non est necesse alterum inesse susceptibili: etiam à natura benè nato & determinato ad alterum eorū recipiendum . Non enim omne albi aut nigri , calidi aut frigidi susceptibile , album aut nigrum , calidum aut frigidum esse necesse est : cum inter album & nigrum, pariter inter calidum & frigidum, possibile sit medium occurrere . At priuatiuè oppositorū omni eorum susceptibili, tempore à natura determinato alterum inesse necesse est : ut necesse est animal esse cæ-

cum aut uidens, tempore à natura ei definito & determinato ad uidendum . ¶ Rursus . Contrariorum susceptible nunc in unum, nunc in alterum permutari potest: ut quod sanum est, in ægritudinem decidere potest: & quod ægritudine malè affectum est, sanescere potest: & quem prauum intuemur, fieri potest ut resipiscendo, studiosus euadat: & ediuerso . Eam autem reciprocā mutationem in priuatione & habitu inuenire non contingit: quāuis enim ex visione in cæcitatem permutatio fiat, nulla tamē fiet natura regressio ex cæcitate in visionem.

¶ Contradictoriè opposita, sunt quæ subiacent affirmationi & negationi: hoc est, sunt finitum & infinitum. Nam quæ subiacent affirmationi, termini sunt finiti. Quæ vero subiacent negationi, termini sunt infiniti: vt album, nō album: homo, non homo, termini sunt contradictoriè oppositi. Hic non agitur de cōtradictorijs complexis: hoc est de his quæ sunt propositiones diuersæ quantitatis & qualitatis repugnātes, & veritate & falsitate. nam de illis disserit Philosophus primo per Hermenias. Non desunt tamen homiuntiones & imperiti, qui pertinaci errore & inueterata inscitia squalentes, asserunt temerè Philosophum in hoc oppositionis postprædicamento loqui promiscue de propositionibus contradictorijs & in complexis contradictoriè oppositis. Sed ex obliqua textus intelligentia, monstra pepererunt.

¶ Contradictoriorum oppositio per omnia spatiatur prædicamēta: vt in substantia, homo, & nō homo, contradictoriè opponuntur. In quantitate pedaneum, non pedaneum: & in cæteris facile

inuenientur. Nam cuiusque prædicamenti dicibi, li, adiiciendo negationem infinitatem, fit oppositio contradictoria. ¶ Si scruteris in quo prædicamēto sint termini infiniti, dicam quod cum Aristotele sentio, terminos infinitos per se in nullo reponi prædicamento: quia de ipsis nullum particulare fecit prædicamentum. Sunt tamen per accidens in prædicamento sui termini finiti: ut non homo est per accidens in substantia: quia suus terminus finitus est per se in substantia. Ratio hæc assignari solet, negatio ad affirmationē reducitur: ita termini priuatiui sunt per accidens in prædicamento sui termini positiui: ut cæcum & surdum, in secunda specie qualitatis. Nam eorum positiui termini, puta videns & audiens, sunt per se in secunda specie qualitatis: relatiuè vero propriè opposita in genere ad aliquid: & contraria potissimum in prædicamēto qualitatis inueniuntur. Augustinus quinto de Trinitate, capite septimo, inquit, qui dicit non homo, non negat aliud prædicamentum à substantia, quare infiniti termini, erunt per accidens in illa categoria, in qua sunt per se eorum finiti termini.

¶ Aristoteles contradictorie opposita designat affirmatione & negatione. Et ea quæ opponuntur, ut affirmatio & negatio, res ipsas, quæ sub affirmatione & negatione sunt: ut res suis signis subiectæ, intelligit. Id aperire conabimur, Socrates sedet, Socrates non sedet, sunt affirmatio & negatio oppositæ: hoc est affirmatiua propositio & negatiua contradictoriè oppositæ. Sedere autem & non sedere, quæ sub affirmatione & nega-

tione iacent, opponuntur vt affirmatio & negatio. Differūt autem affirmatio & negatio, & quæ sub affirmatione & negatione iacēt. Nā affirmatio, oratio affirmatiua est, negatio, oratio negatiua. At quæ sub affirmatione & negatione iacent, nō sunt oratio affirmatiua aut negatiua. Eadē vt dicit Boëtius in ijs ratio est, quæ sunt sub affirmatione & negatione: quæ in ijs quæ sub priuatione atq; habitu ponebantur. Nam sicut nō est idem habitus atq; priuatio, quod habere habitū atque priuari: ita non idē est affirmationē & negationē esse, & id quod est sub affirmatione & negatione. Affirmatio est, verbi gratia, sedet Socrates: negatio vero, nō sedet Socrates. Sub affirmatione autem hoc ipsum sedere Socratē, id est, hoc quod affirmatio dicit, facere. Sub negatione vero nō sedere Socratem, id est non facere id quod negatio submouet, conueniunt tamen affirmatio & negatio, & quæ sub affirmatione & negatione iacent. Nam quæ sub affirmatione & negatione locantur, ut affirmatio & negatio opponi dicuntur: idē enim utrisque oppositionis modus. Nam vt oratio Socrates sedet, opponitur huic negationi, Socrates non sedet: ita sedere & non sedere res sub affirmatione & negatione iacētes, opponi dicuntur. ¶ Vnum tamen quod à Fabro accepimus, adnotatione dignum est. Vt enim orationes sine rerum consideratione contradictoria non aduersantur oppositione: ita quoque neque res sine orationum ratione dicuntur, vt contradictorie oppositæ.

¶ Hæc affirmationis & negationis oppositio, à cæteris oppositionum speciebus discrimen habet.

Nam in his que tanquam affirmatio & negatio opposita sunt, necessarium est hoc quidem eorum verum esse, alterū vero falsum: vt necesse est Socratem sedere vel non sedere . Sed neque in contrarijs , relatiuis , priuatiuè oppositis, necesse est eorum vnum esse verum & alterum falsum: cum eorum quæ nulla complexione dicuntur , nihil neque verum neque falsum est : at quæ supradicta sunt omnia, sine complexione dicuntur.

¶ Sed dicet quispiam, Si contraria, & alia opposita cum cōplexione sumantur, oportebit vnū esse verum & alterum falsum, vt dicendo, Socratem sanum esse, & Socratem ægrum esse, mox videbitur vnum verum & alterū falsum. ¶ Licet sumantur, cum cōplexione cōtraria , aut alia opposita, non est necesse alterum esse verum & alterū esse falsum : vt enuntiando Socratem sanum esse, & Socratem ægrum esse (si Socrates sit) alterum esse verum & alterum falsum non diffitemur. Si vero non sit, vtrumque falsum est: quare non est necesse in ijs secundum complexionem contrarijs vnum esse verum , & alterum falsum: in priuatione vero & habitu simile perpēdetur. Si enim nō sit Socrates, minime verum est enuntiare Socratē esse cæcum, aut Socratem esse vidētem: sed falsum vtrique congruit. Neque si visionis susceptible sit, necesse est vnum esse verum & alterum falsum . Nam quanuis susceptible fuerit , si tamen nondum tempus sit ei à natura determinatum , vt habitum recipiat, neutrum illorum esse verum oportebit , sed ambo falsa erunt . Nunquam enim verum est affirmare quidpiam esse

cæcum aut videns , si nondum sit natum visio, nem recipere . At in oppositis affirmatione & negatione , necessarium est unum esse uerum , & alterum falsum . Nam siue Socrates sit, siue non : uerum est Socratem languere uel non languere . Quare manifestum erit solis affirmatione & negatione oppositis peculiare & proprium esse : semper eorum alterum uerum esse , & alterum falsum . Quæ igitur contradictoriè opposita sunt , alio modo à reliquis opponi dicuntur.

¶ Demum subnectit Philosophus sex contrariorum communitates . Prima. Bono contrarium est malum: ut sanitati lāguor aduersatur. Liberalitas autem bonum, aduersatur prodigalitati malo, ut medio extremo: nec bonum bono pugnat. Nam perfecta est boni ad bonum harmonia , sicut veri ad verum consensio.

¶ Secunda, Malum aliquando bono , & aliquando malo contrarium est : ut ægritudo malum, contrariatur sanitati bono . Et intemperantia malum, aduersatur temperantiæ bono . Etiam intemperantia malum contraria est insensibilitati malo, ut excessus defectui . Similiter prodigalitas aduersatur illiberalitati.

¶ Contendes, Tantum vnum vni cōtrarium est, igitur malum non potest bono & malo contrariari . ¶ Dilutio, Non negandum est tantum vñ vni esse contrarium vna & eadem ratione, sed non est incommodum vnum pluribus cōtrariari diuersa ratione . prodigalitas enim aduersatur liberalitati, ut extremum medio: & contrariatur illiberalitati, ut extremum extremo.

¶ Tertia, si unum contrariorum sit, alterum ut sit non est necesse: vt si sanitas accadat animali, suum contrarium, puta ægrotudo, non erit. si enim omne animal sit sanum, non erit ægrotudo. Et si omnis homo esset iustus, nulla esset iniustitia.

¶ Quarta, impossibile est cōtraria simul eidem inesse: vt fieri nequit idem simul esse sanum & ægrum. Et si Socrates sit albus, nigrum de Socrate negabitur. Hæc communitas, dignitas est in logica, adeo clara vt probatione non indigeat.

¶ Quinta, Palam est contraria circa idem aut genere aut specie nata fieri. Specie quidem vt iustitia & iniustitia circa animam hominis. Omnis enim anima quæ iustitiam & iniustitiam recipit, rationalis est, & solius hominis: sed omnes homines idem sunt secundum speciem, omnes igitur animæ rationales eadem secundum speciem sunt.

Genere, vt sanitas & languor circa corpus animalis. est enim animal omnium animalium vnū genus. Et albedo & nigredo circa corpus. Est enim corpus substantiale vnum genus.

¶ Sexta, Necessarium est omnia contraria, uel in eodem genere esse, uel in contrarijs generibus, uel ipsa genera esse. Albedo enim & nigredo sub eodem genere propinquo sunt, puta colore. iustitia & iniustitia in contrarijs generibus. illius nanque uirtus genus est: huius autem uitium. Virtus & vitium genera sunt contraria, & sunt sub eodem genere remoto, puta habitu: & sub contrarijs generibus propinquis ponuntur. nam uirtus est sub bono, & vitium sub malo. Bonum autem & malum, non sunt in genere virtutis & vitij: sed sunt illorum

genera. Bonum enim genus est virtute communius. Pariter malum communius est vitio.

¶ De priore scholia.



Discusso de oppositione primo post prædicamento, secundum aggrediemur: in quo de varia prioris natura, fit determinatio. *Quadrifariam accidit quippiam alio prius dici. primo quidem tempore: & id quidem maxime & propriissimè: ut quod alio antiquius est, & duratione præcedit, eo prius censetur: ut æternum prius est caduco. & trigesimum agens annum, eo prior est, qui duodecimum duntaxat annum agit: & dum proprie loquimur secundum temporis præcessionem, aliud antiquius dicimus & aliud senius. Antiquius quidem in ijs quæ inanimata sunt: ut quibusdam placet. Senius vero in animatis: ut si quis dicat bellum Thebanorum atque Græcorum antiquius fuisse Troiæ excidio, idcirco quoddam tempore præcedat: filij nanque ducum qui Thebano excidere prælio, Troiano conflictui interfuerunt: ut Diomedes & Sthenelus. Et id quidem ita esse approbat Boëtius, nec refragatur Porphyrio, qui censuit in rebus inanimatis antiquius dici: cum dicimus antiquiorem esse dominationem regum in ciuitate Romana, quàm consulum magistratum: in rebus vero animatis, senius vocamus. Seniores nanque dicimus Pythagoram Socrate: Socratem Aristotele.*

¶ *Secundo, quòd non conuertitur secundum subsistendi consequentiam:* hoc est, sine altero esse potest, alterum autem sine eo subsistere non potest: vt vnum duobus prius est: nam duobus existentibus, vnum esse necesse est: at vno subsistente, duo existere nõ est necessarium. Et summatim, quod consequitur aliud, sed non antecedit ad illud: id dicitur à quo non conuertitur essendi seu subsistendi consequentia: vt animal genus, sua specie puta homine prius est secundo. Nam si homo sit, nõ potest nõ esse animal: & animali subsistente, hominem existere non oportet. Et eadem ratio in quibuscumque alijs superioribus seu communioribus inueniri potest.

¶ *Tertio, Prius ordine.* & illud est quod alterum quodam ordine præcedit. Quod in disciplinis & orationibus perspicitur: vt elementa in Geometria figurarum descriptione & delineatione priora sunt. Et principia contemplandis priora sunt conclusionibus. Nam ex ijs, viam nobis conficimus ad contemplandam conclusionem de qua potest haberi scientia. Et in orationibus apud rhetores exordium prius est narratione. ¶ Sed quoniam in rerum varietate diuersum contemplamur ordinem: ne quid attentum lectorem lateat, varios ordinis modos explicare studebo. ¶ Quidam est ordo doctrinæ, quo quidpiam alio cognoscitur: vt ordine doctrinæ, principia conclusionibus priora sunt. Et in logicis nomen & verbum, priora sunt hoc ordine enuntiationibus, sicut in grammaticis literæ, syllabæ, dictiones, priores sunt oratione. Nam ex simplicium & partium cognitione,

in disciplinis ad compositiora & totius cognitio-
nem recte proceditur. Et qui hunc ordinem dis-
scientibus commodissimum præuertunt: porten-
tosa quædam monstra parturientes, sua imperi-
tia & atechnia vaframentisque callidissimis te-
nella ingenia eludunt: & animum ad bonas di-
sciplinas natum, perniciosissimis quibusdam ar-
gutijs obtundunt: & persimiles sunt ijs qui cur-
rum ponunt ante bouem. ¶ Alius est ordo natus-
ræ: quo perfectiora sunt priora: vt substantia, ac-
cidente: & simpliciora priora sunt compositis.

¶ Tertium, est ordo situs: quo secundum loci si-
tum quibusdā seriatim stātibus primus est prior
secundo, & secundus tertio. Et de quolibet isto-
rum ordinum (vt volunt aliqui) hic tertius prio-
ris modus intelligitur, tamen ni plurimum hal-
luciner, videtur Philosophus solum hoc in loco
de ordine doctrinæ, vt sua exēpla euoluenti per-
spicuum euadet, differere. ¶ Quarto. Prius perfe-
ctione & natura quod alio melius est & honoratius:
vt Deus prior est angelis, angeli hominibus, ho-
mines brutis: & quicquid alio dignius est, hoc
modo prius dicitur: vt anima corpore, præceptor
discipulo, rex suis subditis. Et inualuit mos apud
homines: vt honoratiores & eos qui insigni di-
gnitate cæteris præstant, priores appellent.

¶ Quinto, Præter assignatos prioris modos, aliis esse
uidetur, prius scilicet causa. eorum enim quæ con-
uertuntur secundum essendi consequentiam, vbi
vnum alterius aliquo modo causa est: quod alte-
rius causa est, dignum est natura prius dici: quod
autem quædam sint huiusmodi, intueri opus est

& ostendere. Nam hominem esse & orationem qua dicimus hominem esse conuerti dicimus. Si enim homo est, & oratio homo est, vera dicitur: & si hæc oratio homo est, vera sit, hominem esse oportet: & homo quodam modo illius orationis veræ causa est. Nam res quodammodo causa videtur, vt oratio vera sit. Eo enim quod res est aut non est, vera oratio aut falsa dicitur.

¶ Contendes, hominem esse, & hæc oratio homo est, sunt simul, non igitur vnum altero prius dicitur. ¶ Dilutio, Absurdum non erit, vt in tertio post prædicamento dicitur, aliquo modo aliqua esse simul, & vnum altero quodam modo prioris dici prius: quanuis hominem esse & hæc oratio homo est, essent simul tempore: nihil tamen prohiberet hominem, illa oratione esse quinto priorem. ¶ Obijcies, Dubitet quispiam hanc esse orationem homo est, homine existente, non oportebit hanc orationem esse veram homo est, igitur si homo sit, non est necessarium illam orationem esse veram. ¶ Vites cauillum, & studeas Aristotelem ad sanam intelligentiam accersere: palā est si homo sit, hæc orationem homo est, intelligēti eā esse orationem, dici verā. Nec crassis auribus & pistillo retusionis canit Aristoteles. ¶ Posterius & relatiue oppositum est priori, tot modis dicitur vt prius. Nam oppositorum eadem est disciplina. & quot modis dicitur vnum oppositorum, tot modis, & reliquum. Et debent referri modi posterioris ad consimiles modos prioris, quibus scilicet opponuntur.

Prius tempore	Posterius tempore
Prius natura	Posterius natura
Prius ordine	Posterius ordine
Prius perfectione	Posterius perfectione
Prius causa quodā mō	Posteri ⁹ causa quodā mō.

¶ Si plures ab his requiras prioris & posterioris modos, decurre ad Aristotelem quinto Metaphysices, qui cap. vndecimo affatim de priori & posteriori disserit.

¶ De modis simul Scholia.



Ntercipit Aristoteles tertium post prædicamentum tribus ipsius simul significationibus. ¶ Primo, *simul simpliciter & propriissime dicuntur: quorum generatio eodem in tempore est: ut duo filij eodem partu ex vtero materno egrediuntur, sunt simul tempore: illorum enim nihil prius nihilque posterius est. Et non citra rationem dicit Philosophus hanc significationem esse propriissimam. Nam si maximum prioris modum efficiat tempus: cur non quoque simul æditam naturam tempus efficiet? Quæcunque igitur vnius temporis exortu ædita sunt, & simul natiuum principium substantiæque sortiuntur, simul tempore dicuntur.*

¶ Secundo, *simul natura, quæcunque ad seinvicem conuertuntur secundum essendi consequentiam,*

Et neutrum alterius causa subsistit : vt duplum & dimidium simul sunt natura. Nam secundum effectus sententiam consequentiam conuertuntur. Si enim duplum intelligas, & dimidium te intelligere oportet, & e diuerso: & si vnum sustuleris, & te quoque alterum perimere necesse est: & neutrum alterius vt sit, causa est: vt si mihi suppetant duo nummi & tibi quatuor: duplum est, & dimidium: tuum tamen duplum, vt meum sit dimidium, causa non est. Tum etiam sciscitanti quare quidpiam duplum est, si respondeas quia dimidium est: aptam minime dedisti responsionem. Similiter pater & filius sunt simul natura. nam semper inuicem conuertuntur. Nam si pater sit, non potest non esse filius: & ne quidem vnum prius alio intelligentia percipi potest: & si vnum abstulero, alterum perire necesse est, & pater vt pater, filij causa non est. Nam neque materia, neque forma, neque finis, neque efficiens filij pater est, vt pater: quoniam vt explicatius demonstrat dominus Faber Stapu. nullo momento prius pater est quam filius. solent autem efficientia prius esse effectibus, nisi in aliquibus conseruantibus: vt quam cito lux tam cito lumen, hæc ille. Simul autem tempore sunt, contra imperitos, & amethodos pater & filius: nulla enim minutula temporis parte pater sine filio subsistere potest. Quare idem erit vtriusque intelligentie oculus, & hoc scite admodum explicat Boetius. Si Aeneas, inquit, habuerit Ascanium filium: non dicimus, quoniam non fuit Aeneas causa, vt esset Ascanius: sed non fuit pater causa, vt esset filius. Nam cum

dico Aſcani⁹, quædã ppria ſubſtãtia eſt: cū dico fili⁹, eſſe nō poteſt, niſi ad aliqd referat. & ſi Aeneã nomino, ſubſtantiã dixi: ſi patrẽ appello, nulla ratione cōſtat, niſi ad filiũ referat. igitur cauſa fuit Aeneas, vt eſſet Aſcani⁹: ſed nō eſt cauſa pater, vt eſſet filius. Pater nãq; fit cū filius fuerit. hæc ille. Hinc licebit dicere hãc enūtiationẽ, pater nō genuit filiũ, à vero nō abhorrere. Nec pſiſtere velim in his ridiculis forſitan ppoſitionibus, pater genuit filiũ. nō genuit pater filiũ. hæc em̃ & ſimilia, ſophiſmatũ vmbriſ cōtectis, in diſciplinis locũ nō habēt. perueſtigāt enim ī genuẽ diſciplinẽ nitidiſ ſimũ veritatis ſpecimẽ: p qua iubebat Plato totis virib⁹ certandũ: vaframẽta autẽ & infãtiſſima nugamẽta nō minus q̃ īmaniſſima mōſtra refugiũt. Non poſſum tamẽ diſſuadere aſino, vt à carduis abſtineat. ſimiles ſanẽ (vt fert parœmia) habēt labra lactucas. ¶ Contẽdes, pater dicit prior filio tẽpore: & id neutiq; aſſerendũ eſt niſi ratione generationis, igit pater genuit filiũ. ¶ Perſpicuũ eſt patrẽ, tẽpore nō eſſe priorẽ filio, etſi vulg⁹ imperitũ dicat cōtrarium, nullã illi oberrãti, & à diſciplinis defleçtẽti, fidẽ adhibendã eſſe cẽſeo, licet ſubſtãtia patris genuerit ſubſtãtiã filij. ¶ Obijcies, Socrates genuit filiũ, ſed Socrates eſt pater, igitur pater genuit filiũ. antecedẽs eſt poſſibile, igit & cōſequẽs, & cōſequẽtia eſt expoſitoria. ¶ Si cōſequẽtia ſit bona, nō ſatagas, q̃uis poſſet negari. maior à te & ab vnoquoq; naſum habẽte denegari debet. Nã ſi Socrates genuerit filiũ, genuit igit quod ad patrẽ refertur. at filius ad ſubſtantiã tanq̃ ad ſuũ correlatiuũ nō refert: quare abſone & abſurde dicitur, Socrates genuit filiũ. hanc tamẽ enūtiationẽ con-

cedere poteris, Socrates genuit substantiā viri: qui quatenus fili⁹, ad patrē refertur. ¶ Tertio, *simul natura diuisiōe: quæ ex eodē genere ediuerso abinuicē diuidūtur. E diuerso autē diuidi abinuicē dicuntur, quæ in eadē generis dissectione assumuntur: vt homo & brutum sūt hoc mō simul natura: nā dissecāt hoc genus animal. Similiter gressile, volatile, aquatile, simul hoc mō natura sunt. Nā ex eodē genere ē regione secta secūdū vnā & eadē generis diuisionē sumuntur. Diducitur enim animal in hæc, volatile, gressile, aquatile: quorū nihil pri⁹ vel posteri⁹ est: sed simul natura esse videtur. Diuiditur rursus & singulū horū in species: vt volatile quidē in ijs aui- bus quæ semine vescūtur, & ī ijs quæ carnib⁹, & in ijs quæ herbis: & ex species in quas soluitur & dirimitur volatile, erūt simul natura. Et hic modus ad oīa profundatur prædicamēta. In prædicamēto substantiæ datū est exēplū: in prædicamēto q̄tatis cōtinuum & discretū sunt simul natura. Nam in continuum & discretū quātitas diducitur. in prædicamento qualitatis, quatuor qualitatis species sunt simul natura. in prædicamēto actionis, mutatio ad substantiā, ad quantitātē, ad qualitātē, ad vbi, dirimunt hoc gen⁹ actio: quare sunt simul natura. Et licet eiisdē generis mēbra diuidētia, forsitan recti⁹ diuisa & secta appellata, sint simul natura, tamen genera semper speciebus priora sunt secūdo prioris modo. Nā secūdū essentiae consequentiā, cum suis speciebus nō conuertuntur: affectantur enim genera suas species, at ipsas species affectari genera nō oportet: vt si homo sit, & animal esse oportet: si tamen animal sit, hominem subsistere non oportet.*

De speciebus motus Scholia.



On incōmodum videbitur ancipitem motus naturā aperire prius q̄ ad eius species enumerādas & vnāquāq; p̄ticularim definiēdā accigamur ¶ Mot⁹ vocabulū est idifferēs, suū potēs ortū & à verbo actiuo & passiuo sumere. Cū descēdit à verbo moueo, actiuè significat, & equū est actiōi: cū vero à moueor, passiue: & idē est qđ passio, vt adnotat Clichtoue⁹. Verbalia siquidē in tus & in tio, modo actionē, modo passionē significāt. Itaq; moueo, & ago, sūt denominatiua p̄dicamēti actionis. Mot⁹ autē ab actiuo descēdēs & actio, sūt denominātia. Sic moueor & patior, denotiatiua sunt p̄dicamēti passiōis: mot⁹ vero à moueor & passio, denominātia eiusdē p̄dicamēti. Hinc decerpes motū homonymè sumptū, ad diuersa decumbere p̄dicamēta. ¶ Obfistes, probādo mouere & agere nō esse eadē. Mouere, vt iquit Arist. 5. Physic. est sub agere: & moueri, sub pati. igitur nō eadē sunt mouere & agere. ¶ Dices Philosophū in illo quīto Physicorū sumere motū & moueri presse & significatione Physico accōmodatissima. Est em̄ mot⁹ vt illic diffinit de subiecto ī subiectū mutatio. Sed cū dicitur motū actiuè sumptū esse actioni æquū, pariter mouere & agere nō esse disticta, sumitur motus p̄ mutatiōe & mouere secūdū significationem logicā, vt nō sit qđ ab agere distinctū. Et cū Philosoph⁹ in hoc quarto postp̄dicamēto motū partiū in sex species, puta gñationē, corruptionē, augmētationē, diminutionē, alterationē, & secūdū locū mutationē, sumit motū latè p̄ ipsa permutatione: in 5. tamen Physic. cap. 1. aliter dissecuit m. jl.

motū. Nā illic dicit aliud esse permutationē, aliud vero motū: & pmutatiōis duas ponit species, generationē & corruptionē. Motus vero tres, secūdū q̄titatē, secūdū qualitātē, secūdū locū. est em̄ mot⁹ proprie dict⁹, de subiecto ī subiectū, subiectū intel lige noīe affirmationis, vt īmutatio de calido ad frigidū, propri⁹ est motus. Sed qm̄ hic liber (vt dicit Boët⁹) ad introductionē fact⁹ est, quodā modo noluit nimis diuisionis attenuare rationē: ne ingrediētū animos, subtiliori diuisione cōfunderet. ¶ Generatio, est mutatio de nō esse ad esse, siue ingressus ad substātiā: & sola substātia ex Philosopho. 1. de gñatione & corruptione, simpliciter generat aut corrūpitur: vt cū ex toto semine fit sāguis, aut ex ligno ignis: sāguinis & ignis est gñatio, nā est mutatio de nō esse sanguinis aut ignis, ad esse sāguis vel ignis. ¶ Corruptio, est mutatio de esse ad nō esse, siue egress⁹ à substātia: vt ī exēplis datis, seminis & ligni, est corruptio: nā cū ex semine p̄gignitur sāguis, fit egressus à substātia seminis, & mutatio de esse seminis ad nō esse illi⁹. Pariter cū ex ligno accēditur ignis, fit pmutatio de esse ligni ad ei⁹ nō esse. prospicis & satis lucidē vni⁹ generationē, alteri⁹ esse corruptionē. ¶ Augmētatio, est cū nutricatione q̄tutatis incrementū: vt cū augetur puer cū cibo & potu grādescit & maiore acquirit q̄titatē. ¶ Diminutio, est q̄tutatis diminutū: vt cū quis graui morbo correptus extenuat corpore, & exiliore corpis molē habet, ibi est diminutio. ¶ Alteratio, vt hic diffinitur, est secūdū qualitātē mutatio: vt ex albo ī nigrum permutatio, dicitur alteratio. Nam est secūdum qualitatem mutatio, quæ fit in interitu albi

& acquisitione nigri. ¶ Sex inueniuntur alterationis modi. Primus, de contrario in contrarium: vt calidi ad frigidum permutatio. Secundus, ex contrario in medium: vt cum ex albo fit puniceus. Terti⁹, ex medio in contrarium: vt cum ex puniceo fit albus. Quart⁹, ex medio in medium: vt cum ex puniceo fit rubicundus. Quintus, ex habitu in priuationem: vt cum ex luminoso fit tenebrosus. Sext⁹, ex priuatione in habitum: vt cum ex tenebroso fit luminosus. Duobus potestremis modis à qualitate solus, aut ad qualitatem solus fit alteratio. Nam cum ex luminoso fit tenebrosus, sola fit permutatio vnius qualitatis, puta luminis ad priuationem. Hec autem alteratio, non est propriissima: & cum fit ex tenebroso luminosus, sola est permutatio priuationis ad qualitatem. Alijs autem quatuor prioribus modis à qualitate, & ad qualitatem fit alteratio. De his futura est amplior in Physicis determinatio. ¶ Mutatio secundum locum, est ad locum aut circa locum mutatio. Ad locum quidem, propter motus rectos, siue sint à medio, vt motus sursum, siue ad medium, vt motus deorsum. Circa locum adiicitur propter motum circularē, qui fit circa medium. sed hec, Physiici est exactius discutere. ¶ De alteratione fit addubitatio, Si quicquam alteretur, an oporteat ipsum secundum aliquem aliorum motum alterari. ¶ Dilute addubitationem Philosophus, dicens id minimè oportere. Nam penè aut secundum omnes aut complures passiones, nos alterari contingit, nullam aliarum mutationum recepturos: non enim quod secundum passionem mutatur, gigni oportet, corrumpi, augeri, diminui, secundumve locum mutari: vt qui in sole diutius stetit: si ex candido niger est factus, permutatus quidem colore dicitur, non tamen genitus est aut corruptus. Pariter

quidpiā augeri aut excreſcere poteſt vt quadra-
tū, quod tamē nulla paſſiōe alterabitur. Euclides
lib. 2. cap. 1. ſuæ matheseos demonſtrat quadratū
circūpoſito gnomone poſſe augeri, nō tamen id
circo (vt dicit Ariſtoteles) alterabit, quia ſemper
quadratū eſt, neque trāſit in aliud ſchema geome-
tricū, ſed ſolū fit maius iūctū gnomoni, maius qui-
dē ſeiſpo, ſeorſim poſito, erit igit alteratio à præ-
dictis motibus diſtincta. ¶ Deinde quid motui &
eius ſpecieb⁹ opponat docet Ariſtoteles. Quies,
vt inquit, ſimpliciter motui cōtrariatur, id eſt opo-
ponitur. Nā vſu plerūque euenit ſpeciē p genere,
vſurpari, & ſingula ſpecialia ſingulis ſpecialibus
aduerſari: vt generationi corruptio, augmētatiōi
diminutio, & motui ſecūdū locū, quies ſecūdū lo-
cū oppoſita eſt. Et maximē motui qui eſt ad locū,
motus in cōtrariū locū, oppoſitus eſſe videtur: vt
motui deorſū, motus ſurſū cōtrariatur. Sed alte-
rationi quid oppoſitū ſit, nō facile eſt aſſignare,
niſi quis illi quietē ſecūdum qualitatē oppoſitam
aſſignauerit: perinde ac quies ſecūdum locū mo-
tui ſecūdū locū oppoſita eſt, facile tamē erit ſecū-
dū alterationis ſpecies aſſignare quid alterationi
cōtrariet: vt calefactioni cōtrariatur frigefactio.

¶ De modis habere.



Vltimū felicius pſequuturī poſtprēdi-
camētū, de modis habere ad oīa ſpa-
tialis prēdicamēta, diſſeremus. ¶ Ha-
bere ſeptē modis dicitur. Primo habere
qualitatē: vt habitū aut diſpoſitionē,
naturalē potētiā aut impotētiā, paſſionē aut paſ-
ſibilē qualitatē, formā aut circa hoc aliquid cōſtā-
tē figurā. Et p hoc verbū habere, circūloquimur

oīm prędicamentorū denominatiua, vbi nomina
 defunt: vt habere rhetoricā, est esse rhetoricē. habe
 re eloquētiā, est esse eloquētem. habere caliditatē,
 est esse calidū. ¶ *Secūdo habere quantitātē*: vt tricubi
 tā habere magnitudinē, vel bicubitā: & idē est esse
 bicubitū, aut tricubitū. ¶ *Tertio habere aliquid circa*
corpus, vt tunicā, pileum, calceū, togā, prętextā. Et
 hic modus vltimō prędicamēto finitimus est, cui⁹
 habito principali, siue denominante, circūloqui
 mur per hoc verbū habere, eius denominatiua: vt
 habituatū nō aptē dicimus, sed aptius habere ha
 bitū. ¶ *Habere quarto, est habere mēbrū*: vt manū, pe
 dē, caput. Hęc autē nomina absolutē ab Aristote
 le sumūtur (vt dicit Clichtoueus) vt partes signifi
 cēt, sed nō denotēt esse partes. Aliud est hāc vocē
 pes significare partē, & denotare alicui⁹ esse par
 tē. In prima significatiōe est ī genere substātię ad
 totū minimē cōparata. In secunda sub genere ad
 aliquid cōtinetur: vt referatur ad totū cui⁹ est. Et
 hic quartus modus cōfert ad denominatiua ter
 minorū prędicamēti substātię explicāda. ¶ *Quin
 to habere contentū*: vt modius dicitur habere triti
 cum, & lagena vinū: & tēpus res sibi obnoxias, &
 quę sub eo cōtenta sunt: pariter locus dicitur ha
 bere res quę sunt in loco. Et hic modus respicit
 dicibilia triū prędicamētorū, quādo scilicet, vbi, &
 positionis. ¶ *Sexto habere possessionē*: vt domū vel
 agrū. Verū cum possessio sit possidētis possessio, &
 possidēs est rei possessę possidēs: ideo hic modus
 respicit ad aliquid. ¶ *Septimo habere uxorem*, sed hic
modus alienissimus est. Nihil enim est aliud habere
 vxorē, quāmodō eodē cōnubij thoro cū sua vxorē co
 pulari, & adinuicē vir & vxor referūtur. Nā nobi

liorē domus partē,puta cōiugalē,vt vult Philoſo-
phus primo Politicorū constituūt,sine cuius mu-
tuo foedere,mutuāque societate,legitima soboles
nō propagaretur,nec cōtinua hominū successio-
ne stabiliret respublica. ¶ Alios ponit modos Phi-
loſophus cap.vicesimotertio quāti Metaphysices.
Vt habere vi & īpetu, vt febris hominē habet, &
tyrāni ciuitates. Alio modo id quo quippiā est tā
quā in susceptiuo: vt æs statuz formā,& corpus
ægritudinē habet. Itē quod prohibet aliquid secū,
dū impetū moueri aut agere,habere dicit hoc ip-
sum:vt colūnæ dicūtur ea habere onera quę sup
ipsa posita sunt,& vt poētę fingūt Atlātem, cælū
habere,quod nisi suis humeris tāquā molē gesta-
ret,caſurū sup terrā quidā Physiologorū tradūt.
¶ Admirabitur quispiā cur Philoſophus,cū ipsum
habere superius in genere nominauerit, aliorūq;
prēdicamentorū numero ascripserit,nūc idipsum
multiplex & equiuocū ponat. ¶ Nō putes absurdū
idē prēdicamētū nūc vniuocē,nūc equiuocē prę-
dicari. vniuocē quidē q̄diu generis rationē obtri-
net,& equiuocē alia ratiōe:habere gen⁹ est istarū
specierū calciatū esse,armatū esse:æquiuocū vero
significationib⁹ citatis. ¶ Cū licuerit nostra scho-
lia varijs habere modis finire,vnū integerrimę vo-
lūtati quē vocāt diuini Philoſophi habere beatita-
tē,seu felicitatē æternā,infigam⁹. Quā velit no-
bis largire de⁹ rerū omniū largitor copiosissim⁹.

Laus toti trinitati.

VTILIVM ADMODVM AD PRÆDI-
camenta Aristotelis Scholiorum, à Ioanne Arboreo
Laudunensi,ex eruditissimis authoribus selectorum, Finis.
Anno Salutis humanæ, 1538. Mense Nouembri.

